

IOANNIS NICOLAI
SAVLII CARREGÆ
GENVENSIS
EPISTOLARVM
LIBRI TRES.
AD PERILLVSTREM
IOANNEM VINCENTIVM
IMPERIALEM.



GENVÆ, MDCIII.
APVD IOSEPHVM PAVONEM.
SVPERIORVM PERMISSV.

A D
PERILLVSTREM
IO. VINCENTIVM
IMPERIALEM.



DE VERA hominum nobilitate non eadem omnium sententia est. Ad vetusti generis claritatem multi, ad propriam cuiusq; virtutem alii eius ortum referunt. haud mearum virium causam huiusmodi disceptare. præclara certe scriptorum monumenta cum vere nobilem asserunt, qui maiorum decus cum propriis ornamentis coniunctum habeat. Ac mihi quidem Genuesem iuventutem contemplant huius ordinis non pauci occurrunt. inter quos te, Io. Vincenti Imperialis, elucentem conspicio. quippe Paterna, Maternaq; Gens tot iam per sæcula opibus, cognationibus, bellica, togataq;



virtute, egregiisq; in Remp. promeritis
claræ mire te nobilitant. præcipua vero
decora adco illustrent, vt non tam Lu-
næ lumen aliunde mutuanti, quam So-
li proprio splendore collucenti confe-
rendus videre. Tu priuatæ gloriæ, pu-
bliciq; commodi appetens non in otio,
non in alea, sed in ipso Palladis sinu
educatus eo altitudinis processisti, vt
omni virtutum genere emineas. Pru-
dentia quidem tua, doctrina, grauitas,
fides, liberalitas, comitas, modestia ra-
piunt omnes in amorem tui. Prauas
cupiditates, quibus se plæriq; emanci-
pant, tu in eas imperium habes. Opti-
mi Ciuis, integerrimi ludicis, perfecti
Senatoris partes tibi tam notæ, quam
cui maxime. Rectus vitæ tuæ cursus
facit, vt non obsoletam, sed vt rena-
tam in te agnoscamus Maiorum tuo-
rum amplitudinem. Rempublicam
autem haudquaquam inermis, sed
eloquentiæ armatus præsidis capes-
ses.

ses . Iam nunc te mihi grauiſſimæ munera ſplendide obeuntem , maximis de rebus prudenter differentem , difficultiſſima quaque conſiliis tuis explicantem propono . Huius rei non obſcurum ſpecimen editum eſt , quo die in celebri Academia Veſtra maturæ prudentiæ plenam Orationem habuiſti . Qui Virorum, qui Senatorum concurſus ad te audiendum ? qui ſermo de te tota Vrbe ? qui tuum ob os in te ora non conuertebant ſua ? o propriis laudibus felicem . o prudentem, qui Auiti, Paterniq; animi ad egregia facta indolem ſtudio , atque imitatione perfece- riſ . o generoſum , qui nolueris Auos , Atauosq; tuos mortali hac vita perfunctos notiores eſſe te , quem viuentem tota Ciuitas intuetur . Quid mirum igitur , ſi circumſpectaris vndiq; vt Genuenſis nominis ſingulare ornamen- tum ? ſi ex tantarum virtutum ſemine vberiore in dies meſſem Reſp. exſpectat ?

stat? si clarissimum Virum Parentem
tuum te tali Filio in primis fortunatum
appellant omnes? si hoc exoptant Ci-
ues, vt sui ipsorum liberi ad verum de-
cus per vestigia tua gradientur? si am-
plissimis Reipublicę muneribus, quæ
te profecto manent omnia, iam nunc
parem esse prudentiam tuam vna om-
nium voce celebratur? si deniq; veræ
nobilitatis titulum penes te tot bono-
rum præclaris insignibus conspicuum
esse diximus? Ac profecto meritorum
tuorum fama tota iam Italia volitans
longius in dies alas extendet. O si det
mihi Deus oratoriam, poeticamq; fa-
cultatem, propter quam tu in ore es
omnium; næ ego illam nusquam li-
bentius, quam in laudum tuarum præ-
coniis ostentem. Qua spe destitutus
te deprecor, vt his Ioannis Nicolai Sau-
lli Carregæ Epistolis tibi dicendis sinas
me meam erga te propensionem, at-
que obseruantiam aliqua ex parte de-
cla-

clarare. Peracri est ille vir ingenio, multipliciq; eruditione: tui, tuiq; similium amans supra quam cuiquam memorabile est. Quanto virtutem pretio estimet, id argumento sit, quod illa duce, morum suauitate comite, doctorum Virorum, eorundemq; clarissimorum amicitias sibi ex tota Italia adiunxit. Sed homo minime ambitiosus res luce dignissimas tenebris occultabat. De suis enim scriptis modeste. sentiens hominum conspectu indigna arbitrabatur. Cumq; in iis, exitura non existimans, secundo ingenio suo indulserit, atque ultra Epistolæ limites excurrisset interdum videri fortasse possit, non parum metuebat, ne certa animi deliberatio tamquam iudicii error notaretur. Ut vero a me instante quotidie, ne rem tam laudabilem diutius comprimeret, futurum audiuit, ut in clarissimo nomine tuo appareret, eam totam arbitrio meo permisit. Enixe igitur te rogo,

vt

vt hoc eruditi viri, amiciq; tui opus,
amicissimi, ac deditissimi munus, non
amice modo accipias, & legas; sed, quo
soles virtutem patrocínio, benigne e-
tiam tuearis, atque defendas. Vale.

Dat. Genuę XIII kal. Aug. MDCIII.

Perillustri Dominationi Tue

Additissimus,

Hieronymus Frugonius.

IOANNIS NICOLAI
SAVLII CARREGAE
GENVENSIS
EPISTOLARVM

LIB. I.

IO. THOMAE IVSTINIANO
CAMILLI FILIO.

N ON parua afficior voluptate, Ioannes
Thoma Iustiniane, quod, omnibus re-
bus posthabitis, litteris animum te to-
tum tradidisse intelligo, & in ijs ita ver-
sari, ut unam maxime spectes eloquentiam, unam co-
las, unam admireris; & nullos existimes maiores esse
fructus, quam qui ex ea colliguntur. rem tu quidem
omnium difficillimam, sed eandem omnium pulcherri-
mam diligis. cuius ego pulchritudine ita delector, ut
tibi non concedam, qui magis illius amore, ac desiderio
flagres. Ac profecto hoc mihi ad amicitiam nostram
deesse videbatur; ut, quemadmodum similitudo quae-
dam morum, & voluntatum consensio nos inter nos con-
iunxisset; ita studiorum societas, similitudoq; coniunge-
ret. Idem enim sentis, quod ego: homines ad intelligen-
dum, & agendū esse natos; eam denique esse vitam, quae

A

tota



tota in honestis actionibus, tota in præclaris litterarum studijs consumitur; nihil vero eloquentia esse præstantius, nihil laudabilius, nihil iucundius recte quidem uterque sentimus. Ecquæ, ut vere dicam, voluptas ea voluptate maior esse potest, qua afficimur, dum vel Poetas, vel Oratores, vel Historicos legimus? quid enim aut Ciceronis eloquentia dulcius, aut historia Cæsaris suavius, aut Virgilij poesi iucundius inueniri potest? hæ sunt ille præclaræ artes, quibus ad humanitatem, & morum elegantiam excolimur: quæ tantum possident utilitatis, ut ijs imbuti meliores efficiamur, ac melius, sapientiusq; viuamus. quæ quidem utilitas eiusmodi est, ut late pateat, neque ad nos tantum pertineat, sed ad vniuersos ciues, & ad Remp. se porrigat, atque explicet. quamobrem tibi magnopere gratulor, quod ex eo hominum numero te exemeris, qui ita viuunt, ut ad voluptatem omnia referant; ijs rebus seruiant, quibus imperare debeant: qui ita ignauia dediti sunt, ut hæc præclara litterarum studia contemnunt, nihil excelsum cogitent, nihil amplum, nihil illustre. quos quidem ego, tantum abest, ut homines putem, ut belluas quasdam existimem. Tu perge quæso; iter gloriæ ingressus es. Propone tibi ante oculos domesticæ virtutis exempla. O quam præclara sunt omnia, quam illustria, quam plena dignitatis, & gloriæ! Incipiam ab Ansaldo Iustiniانو auo tuo. vide quibus tandem gradibus ascendens
ad

ad summam gloriam, laudemq̃, perueniret. annum agebat vix dum sextum, & decimum, cum ita græcis, latinisq̃ litteris excellebat, vt prope singularis existeret. cum Patauium deinde eloquentiæ, & iuris ciuiliſ scientiæ comparandæ cauſſa ſe contuliſſet, tantos in vtroque ſtudio breui tempore progreſſus fecit, vt inter iuris peritos eloquentiſſimus, & inter eloquentes iuris peritiſſimus eſſet. Itaque, quamuis ille in maxima eruditiſſimorum hominum frequentia, non ambitione, ſed artium liberalium ſtudijs quotidie magis incenſus Patauij viueret; ea tamen de illius prudentia, & doctrina fama percrebuit, vt eſſet abſentibus etiam notus. Verum, cum in Patriâ carus, exſpectatusq̃ omnibus rediſſet; eius virtus re poſtea ipſa, quâ antea fama, illuſtrior exſtitit; vt nullius apud ciues noſtros auctoritas maior eſſet, quam Anſaldi Iuſtiniani vel propter ſummam eius eloquentiam, vel propter admirabilem iuris intelligentiam. Itaque maximis de rebus pacis, ac belli legatus modo ad Imperatorem, modo ad Pontificem ſapem iſſus eſt. quibus in legationibus talem ſe præſtitit, vt non tantum ipſe legati munere bene functus ſit, ſed etiam alijs legationis bene gerendæ exemplum tradi-derit. Hunc viri principes ita diligebant, atque admirabantur, vt omnia, quæ vellet, ab illis impetraret, & ad eos nunquam accederet, quin honoribus ornatus ampliſſimis in Patriam reuerteretur. Legationis vero

4 IO. NICOLAI SAVLII CARREGÆ

sua munere perfunctus non statim se otio, atque quieti tradebat; sed, ut otio communi consuleret, nullam ipse quietis partem capiebat. quoties ille improborum Civium conatus a Rep. auertit, furorem exstinxit, audaciam oppreßit? qua quidem in re admodum fuit eius virtus laudanda, qui Reip. studiosissimus nihil melius existimans, quam ab omni civili contentione abesse, nullius consilii, quod Reip. minus vtile videretur, particeps esse voluit. eximia eius erat in Patriam pietas, & amor, cui ille, quibuscunque rebus potuit (potuit autem plurimis) prodesse nunquam destitit. idq. cum faceret, non eum honorum cupiditas, sitisq. tenebat; sed secum ipse existimans conscientiam ipsam factorum egregiorum amplissimum virtutis esse premium; nihil habebat antiquius, quam ut suorum civium saluti, libertatiq. consuleret. Itaque, anquam Patrie parentem Anfal dum Iustinianum omnes colebant, summis honoribus prosequabantur. multiq. ex Nobilitate nostra eius domum frequentabant, alii ab eo consilium exquirentes, alij auxilium petentes. Nunc vero cum affecta iam sit etate (quartum enim annum agit, & nonagesimum) ac, omissa Reip. cura, in otium se contulerit; sacras litteras toto pectore complexus est, & Divi Bernardi sapientissimis scriptis maxime delectatur. Sed illud profecto raro accidere solet, ut ex probro patre, improbi filij nascantur. relinquet avus tuus effigiem, & do-

doctrinae, & integritatis suae filios, in quibus non minus, quam nunc in se ipso, clarus, atque illustris in posterum viuet. Marcus enim Antonius, qui ceteros aetate anteit, vestigia Patris ingressus ad summam iuris ciuilis gloriam peruenit. a rebus vero gerendis abhorrens, ipse sibi, ac Deo viuens, genus illud vitae secutus est, quod totum in rerum contemplatione versatur. Non enim illud tantum curandum esse existimat, ut floreamus ingenio, industria valeamus, litteris praestemus; sed hoc etiam simul considerandum, haec omnia inania esse, nihil solidi habere, nisi cum vitae innocentia, ac erga Deum pietate copulentur. atque, ut Marcum Antonium praetermittam, Camillus Pater tuus item iurisconsultus, Ioannes Thoma, non ne alijs exemplum praebet veteris innocentiae, & sanctitatis? nam, si quisquam est, qui domestica patris virtute ad verum decus excitari debeat, is es profecto tu. hic tibi est imitandus, huius vita, huius disciplina, tibi ante oculos ponenda. vide, ut in Deo ipse acquiescat, ut Deum omnibus rebus anteponat, ut ad Deum omnes suas dirigat cogitationes. Sed nolo te hoc loco pluribus hortari, ut ad imitationem patris tui te ipsum componas, ne id tibi suadere videar, quod te tua sponte facturum esse certo scio. atque mihi quidem in Familiam tuam intuenti hoc illius proprium esse, & omnino datum hoc ipsi diuino quodam munere videtur, ut laudibus undique floreat,

reat, ut clarorum virorum numerum augeat. nam de Fabio, ac Benedicto, ambobus e Societate Iesu, quid dicam? qui ille vir Deus immortalis, & quantus existisset, si ei vita longior contigisset? hic vero qualis, & quantus est? ita enim doctrina, & sanctitate clarus viuit, ac semper vixit Benedictus, ut vnus inter omnes emineat, ac eius vitæ splendor nullis possit maculis aspergi. Ita prudentia, consilioq; excellit, ut nemo ex Cardinalium Collegio fere sit, qui non eum in oculis ferat, qui non suorum consiliorum participem faciat, qui non maximarum rerum deliberationibus interesse velit. Ita de Republica Christiana benemerendi studio incensus est, ut nemo tam libenter labores fugiat, quam ille libenter suscipit, ut Ecclesiæ dignitas conseruetur, ut Dei gloria augeatur, ut veritas illustretur. Fabricius vero extra pueritiæ fines vix egressus vitam militarem ingreditur, & eques Hierosolymitanus factus, Religionem suam quantifaceret, semper ostendit. Nam, cum eo tempore Melitam insulam Turcæ obsiderent, ac vehementer oppugnarent, ille, ille vir, cui Religionis suæ dignitas, & amplitudo multo carior erat, quam vita; qui si in ea obsidione cecidisset, præclare actum secum putasset; ita strenue se gessit, ut non prius se ex periculo eripuerit, quam multas strages fecerit, & multis acceptis vulneribus ita languidus factus sit, ut iam se sustinere non posset. sed non placuit Deo, ut ille tunc e vita

e vita excederet, ad alia fortasse tempora reseruatus. Et profecto incidit tempus, cum Hierosolymitana Religio, ac vniuersa Christiana Resp. cum sibi maximo fuisse adiumento senserunt. in illa enim ad Echinadas nauali victoria ita diligenter, alacriterq; suum Imperatori, atque Magno Magistro officium præstitit, ut ijs gratissima fuerit admirabilis eius virtus. qui Magnus Magister dum tantis debita virtutibus præmia persolvere cogitat, Messanæ Fabricius interea moritur, ea in cælo maiora percepturus. Vides, Ioannes Thoma, Maiorum tuorum facta. hæc considera, ad hæc animum sepe conuerte. Undique tibi suppeditat, quod imiteris. liceat alijs laudabiliter nihil agere, & ita viuere, ut eorum fama ijsdem finibus se contineat, quos vitæ nostræ natura circumscripsit. tibi certe in hac tam illustri Familia, istis parentibus, ac maioribus nato, licere non arbitror. quare effice, & elabora, ut quam de te apud homines concitasti incredibilem expectationem, hanc tu sustineas, & nos Patris in te disciplinam, Auiq; gloriam agnoscamus. Ego equidem, cum id te præstaturum certe confidam, ac ideo hortationem minime necessariam esse existimem, haud vlla alia de causa ad te scribo, nisi ut intelligant homines, quantum tu me semper amaueris, quantumq; ego te semper & amauerim, & obseruauerim. Vale VI. Id. Nouemb. CIO. IO. VIC.

BAL-

BALTHASSARI AYROLO,

Bononiam.

QVIA te vnice diligo, optime Ayrole, & quia de existimatione tua valde laboro; te non modo Bononiam incolumem venisse, verum etiam eruditum doctorem nactum optimis te studijs deditum intelligere cupio. Non enim dubito, quin ipse te nunc tandem colligas, & quæ sit fortunæ varietas, qui humanarum tempestatum fluctus, diligenter consideres. Equidem sæpe dolui, cum te plurimis iactatum perturbationibus huc, & illuc vagari perspicerem, neque, tot rebus tentatis, vllum contingere exitum, quem optasses, etsi ea prudentia te semper gessisti, vt non tam id dolerem, quam animi tui magnitudinem admirarer. adeo enim fortunæ motum, quantum humano consilio licuit, ratione, atque constantia gubernasti, vt, etsi te per rectam viam expedito cursu gloriam petentem illa quidem retardare potuit, impedire certe non potuerit. Nunc igitur maxime vellem, vt occasione hanc oblatam amplecterere, & quo consilio parentes, & Patriam reliqueris, & Bononiam tanquam ad mercaturā optimarum artium te contuleris, sæpe numero cogitares. In ea enim es vrbe, in qua philosophiæ, & eloquentiæ studia ita vigent, vt inanem inde redire turpissimum sit. Ad has igitur præclaras

claras artes, quibus te maxime incensum semper cognoui, alteram cum altera coniungendo, hoc tempore, si minus antea, toto pectore incumbere debes. ex utraque enim omnis tua laus, omnis tua gloria pendet. nam siue in his humanitatis studijs excelles, siue, ut omnes vere augurantur, in Patriam reuersus maxima cum dignitate medicinam exercebis, nihil laudabilius, nihil gloriosius. quod utrunque aliquando te praestaturum, animi tui praestantia freti facile adducimur, ut speremus. Habemus enim a te maxima & virtutis, & ingenij signa, quasi quaedam tuae gloriae pignora, ut iam a te ipso vix videaris posse dissentire, quin aliquando ille futurus sis, quem fore speramus. Quod noui habeam, hoc est. Lucius Boerius in medicorum collegium nuper est cooptatus. Iacobus Arata, vir probus, & tibi notus, paucis ab hinc diebus, hora noctis fere secunda, misere interfectus est. cuius fratrem in Hispaniam profectum paullo ante vita excessisse audieramus. Vale. Genua. XII. Kal. Dec. CIO. IO. XCIII.

IOANNI ANDREAE CEVAE.

Romam.

QVOD optime nosti, Ceuæ doctissime vir, ad duas praestantissimas res hominem natum esse, unam, quæ in rerum cognitione alteram, quæ in actione versatur,

B

omnes

omnes philosophi existimauerunt. Vtra vero ex his præstantior sit, nondum illis plane deliberatum est; Ego nunc necesse non habeo disputare. tantum dicam, eas ita mihi copulatas a natura videri, & alteram alterius auxilio egere, ut nullo modo seiungendæ sint. non enim eorum probo institutum, qui ita sese in litteris abdiderunt, ut ab agendis rebus omnino abhorreant. neque eorum itidem, qui rerum gerendarum instudio ita versantur, ut doctrinarum cognitionem contemnant. hos semper reprehendendos esse existimaui, cum alteris prudentiam, & consilium, alteris vero instrumenta, quibus ad agendum utantur, deesse perspicerem. at vero qui rerum gerendarum usum cum optimarum artium studijs iunxerunt, & in vtraque re maxime excelluerunt, ij vere sapientes, ij maxima prudentia præditi, apud me semper habiti sunt. quæ quidem in re, ut multis in alijs nostri sensus maxime congruunt, nec a mea tua discrepat sententia. Putasti enim semper te frustra multa didicisse, multaq; a sapientissimis viris tradita memoria, & scientia comprehendisse, nisi ea usu, atque experientia comprobauisses. Itaque, cum incidisset tempus, cum de sufficiendo aliquo viro, qui Reip. nostræ arcanis præesset, prudentissimis illis patribus deliberatio esset habenda; cumq; te vnum ex omnibus dignū existimassent, cui hoc maximū munus propter vel singularem doctrinam, vel maxi-

mam

nam prudentiam deferretur; incredibile est, quantam ex hac re letitiam acceperis. quanta autem molestia affectus sis, quod sapientissimi illi Patres consilium illud, quod iam satis fixum videbatur, nonnullorum maleuolentia, an fortune iniuria? postea omnino mutauerint, facile perspeximus. existimasti enim occasionem tibi ereptam esse, in qua, quod maxime semper optaueras, quibuscumque rebus potuisses, Reip. atque amicis satisfacisses. etsi hanc dignitatem tibi optime de Patria merito omnes, qui recte sentiebant, deberi fatebantur, nec quisquam eorum inuentus erat, qui non maximam iudicij laudem ijs, qui de tua virtute aliquo premio honestanda cogitauerant, tribuisset; & illa Mathæi Senaregæ eloquentissimi viri plane diuina vox Reip. nostræ fore, ut restitueretur, non existimasset. quod si qui tunc fuerunt, qui inconstantie crimen merito tibi inferri posse dixerint, & gloriæ tuæ, cui plurimum fauere debebant, obsistere conati sint; eos profecto dubia esse, atque incerta nostrorum consiliorum euenta, & multa præter spem, atque opinionem euenire, non consulerasse satis constat. id enim si fecissent, ab alijs de te bene existimantibus dissentire non potuissent. quin immo prudentiam tuam potius admirati essent, quod ita vitam institueris, ut consilia tua temporum ratione moderari volueris, ac regere. quod maxime optabas, non contigit. numquid igitur te otio dedisti?

minime hercle .id facere neque volebas, neque poteras. Virtus enim tua ita in conspectu clarissimorum viro-
rum posita erat, ut in occulto latere non posset. nam, cum
aliquot nobilitatis nostræ primarij adolescentes in Rhe-
torices studium incumbere, te potissimum delegerunt,
qui sibi dicendi præcepta traderes, ac scientiæ tuæ the-
saurus suppeditares. hoc tibi legendi onere imposto ala-
criter suscepto, quam, Deus immortalis, distincte,
quam explicite, quæ documenta dabas, exempla quæ
afferebas? nihil a te dicebatur, quod non exquisitum, ac
singulare, quod non dignum eorum studijs, atque auri-
bus esse videretur. admirabantur ingenij, doctrinæq;
tuæ ubertatem, & copiam; quæq; a te docebantur,
sic auide arripiebant, quasi diuturnam eloquentiæ si-
tim purissimis tuis, uberrimisq; fontibus explere cu-
pientes. sed, cum exiguum sane curriculum uirtuti tuæ
circumscribi uideres; Romam, ubi magnus est campus,
multis apertus cursus ad laudem, te contulisti, & adi-
tum ad Amplissimum Sanctæ Seuerinæ Cardinalem
tibi tua uirtute facile pateficasti. qui, ubi tuam in re-
bus gerendis diligentiam, in consilijs capiendis pruden-
tiam, in laboribus perferendis constantiam perspexit,
te statim in suis esse, & numerari uoluit; & quod
tibi pluris esse debet, quam omnes omnium Regum di-
uitiæ, maxima amplexus est beneuolentia. nunc ani-
mi, ingenijq; tui præstantiam ostendis; nunc ex indu-
stria

stria tua fructus colliguntur uberes, & præstantes; nunc te maximis rebus natum esse omnes intelligunt. Nam, quantum in doctrinarum studijs uersatus sis, atque excellas, egregia tua scripta testantur. quorum eruditionem, & elegantiam, qui non perspiciunt, ijs, ne id faciant, inuidiam, & maleuolentiam impedimento esse perspicuum est. ego uero utramque orationem tuam libentissime lego, unam, qua quinque prudentissimis Senatoribus tunc recens creatis, totius Ciuitatis nomine gratularis: quæ tibi iamdudum est habita præsentē Serenissimo Reip. nostræ Senatu. alteram, in qua de summo bono, deq̃ illius adipiscendi instrumentis egregie disputas: quam Pisis habuisti in celeberrima Academia, cuius tum erat Princeps Petrus Lupus uir omni laude cumulatissimus. quæ quidem oratio Academicis illis ita probata est, ut eam admirarentur; & ita admirati sunt, ut in sua Academia te statim haberi uoluerint, cum in aliam tamen adscriptus iam esses. Sed, multa præterea non minus erudite, quam eleganter scripsisti. quæ si unquam in lucem proferrentur, suauissimos ingenij tui fructus uberius degustaremus. ea nunc habet in manibus Ioannes Lucas (lauarus uir summo ingenio, maximaq̃ prudentia præditus. qui per uestigia Patris ad æternum decus ita celeri cursu contendit, ut, quemadmodum ille ad summum Ciuitatis nostræ gradum peruenit; sic aliquando futurum, ut ipse

ipse quoque ad eundem gradum perueniat, omnes augurentur. Neque oratoria solum, sed poetica quoque facultate, ut omnes optime norunt, maxime excellis. Sæpe enim ex immensis oratorum campis in amænissimos Musarum hortos libenter te recipis, versusq; scribis siue latina, siue etrusca volumus lingua, tanta suauitate, & grauitate, ut eos tibi Musæ ipsæ dictare videantur. quod si eum magnopere admiramur, qui vel poetæ tantummodo, vel oratoris nomen affecutus sit, quanto admirabilior tu nobis videri debes, cum bonus sis orator, bonus idem poeta? Præclarum vitæ tuæ institutum, qui & in tractandis negocijs, & in contemplandis rerum admirabilium causis maxima cum laude verferis. hinc illa tua erga amicos plena amoris, plena studiij officia proficiuntur; hinc illa ingenij tui præclara monumenta, quæ tantopere admiramur; hinc illa exorta beneuolentia, quæ te Sanctæ Seuerinæ Cardinalis, & Cardinalis omnium maximus, amplexus est. Equidem de ista tibi diuinitus delata occasione magnopere gratulor; eoq; magis, quod non quibus honoribus nunc auctus sis, vnum considero, sed quod eos amplissimos futuros animaduerto. quod cum euenerit, utriusque nostrum maxime gratulabor; tibi, cui merita virtutum tuarum præmia persoluentur; mihi, qui, quod semper maxime optauerim, contigisse perspiciam.

Vale. Genua. IX. Kal. Maij. CIO. IO. XCIII.

GA-

GABRIELI CHIABRERAE,

Sauonam.

EGREGIVM illud Poema nūquam lego, quo sum-
 morum Imperatorum laudes grauiſſimo, ac ſuauiſſimo
 carmine proſequeris (quod ad animi mei letitiam ſepe
 facio) quin ingenium tuum maxime admirer, qui tan-
 tā tibi, & ſententiarum grauitatem, & verborum ele-
 gantiam cōparare potueris. Equidem ingenio, quo excel-
 lis, & natura qua plurimum vales, hanc tibi poeticam
 facultatem iam inde ab adoleſcentia comparafſe arbi-
 tror; ſed multo magis id accidiffe iudico ſtudio, atque
 induſtria, quibus labores facile perſers, & difficilia,
 atque ardua quæque ſuperas. Nam, cum intelligeres
 aditus ad Muſas difficilioreſ eſſe, ſed nihil difficile,
 quod idem non præclarum; ſummis tu quidem labori-
 bus, ac vigilijs eoſ tibi patefecifti, eo iam progreſſus, quo
 paucis adſpirare liceat. non enim tibi gloriæ duxiſti pe-
 dem ponere, Vbi eorum, qui noſtra patrumq; memo-
 ria exſtiterunt, veſtigia eſſent impreſſa; ſed vias haud
 tritas inquirens, vſitatas relinquens, aliam tu quidem
 in poematibus componendis longe perfectiſſimam ratio-
 nem inieſti. nam in antiquitatis præclara monumenta
 intuens, vnde optimarum artium ſtudia fere emanant
 omnia, tam incredibili veræ poeſis ſtudio exarſiſti, vt
 nihil

nihil tibi antiquius fuerit, quam relictis riuulis, ex ipsis græcorum fontibus vberissima illius præcepta haurire, & antiquis illis vatibus te quam simillimum reddere. Ex quibus omnibus solus Pindarus dignus tibi visus est, quem tu in manibus sæpe haberes, quem tractares assidue, quem omnino imitatione exprimeres. ardua res, ac difficilis, quod ex eo patet, quia nemo adhuc præter te hoc præstare potuerit. fertur quasi torrens Pindarus copia dicendi, & grauitate; qui siue mores hominum corrigat, siue Deos, Regesq; canat, siue res gestas, & bella narret; ita in dicendo admirabilis est; ut cum imitari pene sit τὸ ἀδύνατον. Sed hanc difficultatem, qua multi licet gloriæ cupiditate incitati impediuntur, sustulit prorsus ingenium tuum, atque ita sustulit, ut summum illum Poetam non imitari, verum adæquare videaris. Solent plerique eorum, qui hac nostra ætate se poetas dici volunt, & esse arbitrantur, inanes versus pangere, ut indoctam multitudinem delectent, & ab ea ipsi laudentur. tu vero solidam, veramq; gloriam querens a doctis viris tantummodo tua scripta probari maxime gaudes, & antiquam illam consuetudinem non modo nobis laudandam, verum etiam maxime imitandam, ut summis laudibus militari gloria præstantes viri in cælum tollerentur, longo intervallo retulisti. Te felicem, mi Gabriel, qui tot virorum illustrium memoriam reddis immortalem,

talem, & te ipsum quoque tuis amplissimis scriptis celebras, atque illustras. Viuunt enim fortissimi illi Heroes immortalitate dignissimi Viri, quos tu praeclarissimis Versibus ab interitu vindicasti; atque ita viuunt, ut mors, quae cum corporibus nomina simul extinguere conatur, nihil de eorum gloria detrahere posse videatur. quorum res praeclare gestas dum ipse canis, silere mihi prorsus multi huius aetatis Poetae videntur. qui quidem illam ingenij tui praestantiam plane diuinam admirantur, sed eam se consequi posse omnino diffidunt. quamobrem, nullos habes, mihi crede, tuorum Poematum, vel æmulos, vel imitatores; nam aut te imitandum suscipere, aut tecum contendere, neque audent, neque, si id faciant, quidquam se profecturos animaduertunt. nec mirum. quis enim te in verborum electione ingeniosior, quis in sententijs prudentior, quis in tota rerum structura admirabilior? maxima legentium admiratione orationem semper auges, atque amplificas, eamq; varijs figuris, & coloribus semper exornas. nunquam tui dissimilis es, nunquam non grauis, nunquam non admirabilis. Sed illud iam mirari destinamus, te tanta florum varietate, suauitate odorum, fructuum ubertate Italiam non modo, sed omnem terrarum orbem etiam compleuisse, cum Paulli Manutij, at cuius Viri? qui nimirum omni elegantis doctrinae genere politicissimus fuit; disciplina, atque diligentia excultus,

C

cultus,

cultus, institutusq̃ sis. quod mea quidem sententia tanti est, ut in eo non exigua laudum tuarum pars sita sit. atque ille letari magnopere solebat, cum te alumnū discipline suæ omni laude ornatū perspiceret, & qui futurus esses, iam tum quidem animo cerneret. & nunc, si viueret, plurimum sibi gratularetur, quod opinionem, auguriumq̃ de te suum laudabili exitu comproba-ueris, laudem illam, & gloriam tuis elegantissimis scriptis illustrans, quam olim ex illius doctissimi viri grauiſſimo testimonio cognoueramus. Has igitur omnes ob causas laudandus es; sed ob hanc unam vel maxime, quod cum omnes te vnice diligant, amicitiam tuam plurimi faciant, te admirentur, te denique maximis honoribus dignum existiment; nunquam tamen te ipsum laudes, nunquam de te prædices, nunquam te gloria efferas. quin etiam, si quando accidit, ut laudes ab aliquo tibi tribui audias, quæ tua modestia est, eas rejicere, & plane erubescere soles. ego vero non mehercule hæc eo consilio scripsi, quod mihi persuaderem splendoris aliquid laudibus tuis me allaturum (nam fecissem inepte, cum illæ ita excelsæ, & illustri loco sitæ sint, ut quemadmodum eas nulla inuidiæ nubes obscurare, sic illustrare nulla cuiusvis oratio possit) sed amore im, alius, quin aliquid dicerem, facere non potui. Vole. Genua. XIII. Kal. Ian. CIO. IO. XCIII.

GABRIELI CAESARINO,

Romam.

CVM antea sepe ab optimis, & eruditis Viris de tuis præclaris virtutibus multa prædicari audirem; tum eorum testimonio commotus, tum naturali quadam erga viros excellentes propensione adductus, te non mediocriter amaui. postea vero quam tuam legi orationem, quam in funere Alexandri Farnesij Parmæ, & Placentiæ Ducis nuper habuisti, & plus esse in re vidi, quam quanta fuit multorum predicatio; statui te omnibus non modo amandum, verum etiam summis laudibus ornandum. næ tu, Cæsarine præstantissime, cum primum aliquid sapere cœpisti, sapienter vitam instituisti. non diuitiæ, non opes, non honores, quæ inter homines maxima putantur, te ab instituto cursu reuocare potuerunt. sed hæc, quasi parum, aut etiam nihil ad te pertinerent, contempsisti, & alia multo maiora animo complexus es, quæ vere tua propria dici possent, nec tibi cum multis communia essent. omnes præclaras artes diligenter coluisti, quas nobilem scire æquum est adolescentem; virtutemq; ipsam tanquam pulcherrimam virginem ita adamasti, ut illam e conspectu tuo nunquam amiseris, cum tamen ceterorum adolescentiũ voluptatis illecebris alij, alij inanibus re-

C 2

bus

bus facile capiantur. quo minus mirandum est, si postea tantos, ac tam admirabiles in virtute progressus fecisti, & ex tanto adolescente vir ille exstitisti, qui in omni genere laudis pares quidem per paucos, superiorem vero neminem habeas. nam, ut bene adolescentiæ initia posuisti, sic, progrediente ætate, cetera sunt secuta. Nunc viuis Romæ in Patria tua, quam theatrum habes tuarum actionum celeberrimum; ita in studio virtutis defixus, ita præclaris disciplinis institutus, ut sis alijs magnum integritatis exemplum, familiæ vero tuæ decus, & ornamentum. quæ quidem etsi satis clara est, adhuc tamen eam sic illustras, ut plus ne splendoris maiores tui tibi, an tu maioribus tuis afferas, dubium relinquas. quantam debes litterarum studijs gratiam, quæ tibi ad æternum decus aditum patefecerunt; ne ve quis error a recta via te deduceret, cupide progredienti clarissimum lumen prætulerunt. Ea igitur merito quotidie magis amplecteris, & in earum cognitione, vel publicis, vel priuatis muneribus defatigatus, tanquam in tranquillissimo, ac iucundissimo diuersorio acquiescis. quæ cum antea omnino iacerent, nunc maxime vigent, ac florent, posteaquam te ijs mirandum in modum patronum profiteris, & eorum, qui ingenio, doctrinâq; excellunt, studia foves. qui nunc sibi maxime gratulantur, cum intelligunt te vnum esse, qui his perditis temporibus, & a virtute omnino alienis, nihil prætermittis,

mittis, in quo ad eos cohonestandos aliquid subsidij esse putes, qui lingua, qui consilio tuo, qui opibus uti volunt. Perge, ut facis, vir praestantissime in hoc tuae singularis industriae cursu. haec sunt actiones dignae viro nobili, dignae viro litterato; te vero & viro nobilissimo, & litteratissimo dignissima. Viam quidem ingressus es immortalitati proximam, vestigijs notatam sapientissimorum virorum, qui nostra, patrumque memoria, floruerunt, quiq; Italiae clarissima lumina exstiterunt. quorum decus omnium hominum ferit oculos, quorum splendorem nulla unquam obscurabit obliuio. Ego quidem minime dubito, quin hanc de studijs bene merendi voluntatem perpetuo retineas, & eorum, qui in litteris versantur, commodis semper, vtilitatiq; seruias. dubitent, qui tuos ad laudem impetus, tuos mores, tuaq; instituta omnino ignorant. mihi quidem, cui delex tuis elegantissimis scriptis, vel ex multorum sermonibus haec omnia notissima sunt, nullus relinquitur dubitandi locus. quin etiam in hanc deuenio spem fore, ut prius defessi sint homines laudando, atque admirando hanc tantam virtutem tuam, quam tu eam exercendo. atque vitam omnes in tuam vitam, tanquam in speculum intuentes, te imitandum sibi proponerent. profecto fieret, ut tua auctoritate, & exemplo incitati optimis artibus, quam diu viuerent, praesidio essent, & ornamento. Verum ineptus sim, si de tuis praeclaris laudibus



bus plura dicere velim; cum certo sciam me nihil unquam ita magnifice dicturum, id virtus quin superet tua. tantum dicam, si me in tuam benevolentiam receperis, nullum unquam me uberiorem, aut præstantiorem ex studijs meis fructum expectaturum. Vale.
Genua. XIII. Kal. April. CIO. IO. XCIII.

IO. NICOLAO SAVLIO CARREGÆ,
 GABRIEL CAESARINVS S.

NOLI, humanissime Sauli, hanc meam in scribendo tarditatem durius accipere; amplius enim sunt sex menses, cum urbe absum; atque hinc, ut puto, evenit, ut unus, & alter fere mensis intercesserit a die, quo tu scripseras, cum ego litteras tuas accepi. Non vereor igitur, quin hoc a te, quæ tua est humanitas, si facile impetraturus; ut huic scilicet tarditati ignoscas, meq; extra omnem culpam ponas. qui enim cum omne officij genus, tum hoc potissimum semper habuerim antiquissimum; nunquam committam, ut a quoquam, nedum a tui similibus, meum possit accusari officium, aut requiri. Verum ad tuas venio litteras, in quibus nescio utrum plus amem amorem erga me tuum, an latine scribendi, quam tenes, rationem suspiciam. De amore gratias tibi ago, ut debeo, immortales, habeoq; ; video enim te in litteris tuis multum plus illi, quam
veritas

*veritas concederet, tribuisse. neque enim is ego sum, qui,
 et si laudem non fugio; tantum mihi in litteris arrogem,
 quantum impertiris. Utinam, mi Sauli, quod mihi
 tribuis, sustinere possim: sane vberriimos fructus, me
 ex laboribus meis (quos non paruos in hæc studia impen-
 disse non inficior) percepisse existimarem. At quidquid
 sit; tu videris, an de me recte sentias; ego interim cum
 amoris, tum iudicij de me tui, recordatione fruar. De
 scribēdī ratione, & letor, et tibi gratulor. quod. n. adole-
 scens adhuc (vt de multis audio) verā Romanæ linguæ
 viam non solum fueris ingressus, sed in ea tantos fece-
 ris progressus; non satis mirari possum. atque hoc tibi
 confirmo; si, quam instituisti, tenere viam perges; breui
 te in hoc scribendi genere peruenturum, quo adspirare
 paucis; accedere, vel summis cum laboribus, & vi-
 gilijs, nemini fortasse his temporibus, contingit. Spero
 autem, vel potius confido, te huic, quod de te habeo,
 iudicio resposurum: nosti enim tu optime ex te, quan-
 tam ad generis nobilitatem afferat accessionem eloquen-
 tiæ studium: atque multorum vtriusque familiæ (cuius
 cognomen alterum habes hæreditarium, alterum,
 vt opinor, sumpisti) doceris exemplo. Nihil est igitur,
 cur te cum sponte tua, tum domesticis cōcitatum exem-
 plis ad summam laudem, gloriamq; contendentem, meis
 cohortationibus inflammem. quidquid autem scripsi,
 vel potius attigi, non tui inflammandi causa me fecit-
 se,*

se, sed testificandi amoris in te mei, Velim existimes: cui enim ceteris rebus respondere non possum; amore certe respondebo. extremum illud est, ut te orem, & obsecrem, quando in me sic animatus es; hanc tuam ut conserues in me voluntatem; tibiq; persuadeas, nullum me unquam, aut studij, aut officij genus, quod ad te honestandum pertineat, prætermisurum; ita ut, te benevolentiam meam tanti fecisse, atque expetisse, nunquam pæniteat. quorum alterum de me, ut tibi polliceri possum; alterum a te ut expectem, tua singularis facit humanitas. Vale. Ex Cora. Idib. Maij. CIO. IO. XCIII.

ALEXANDRO SERTINIO.

Florentiam.

PVDORE quodam factum est meo, Alexander Sertini, ut prius meam erga te benevolentiam tibi non declararim. Verebar enim, ne parum modesti hominis esset eum litteris appellare, qui me ne de facie quidem, ne dume sermone unquam nosset, & qui totus in litteris, ut audieram de multis, abditus esset. Verumtamen, cum te singulari humanitate præditum esse intellexerim, & arbitratus sim tibi pro tua prudentia esse competentissimum, tantam vim virtutis esse, ut vel absentes coniungat, ac inter eos amorem conciliet, omni pudore deposito, hanc ad te, tanquam pignus obseruantia in

te

te meae, epistolam mittere volui. multas habeo causas, mi Sertini, cur te praeter ceteros obseruem, ac diligam. nam & in Ciuitate omnium florentissima natus es, & in litteris ita versaris, ut poetica facultate excellas. addo illud: testes habeo multa mihi de tuis praecclaris Virtutibus quotidie praedicantes, homines ita probos, ita prudentes, ut nec ipsi errare possint, nec alios errare patiantur. Non enim beneuolentia mea mediocris est erga Ciuitatem hanc vestram, quae & omnium bonarum artium hodie veluti officina quaedam habetur, & litteratos homines omni officiorum genere amplectitur, ut nemo eorum ita immemor, aut ingratus esset, qui non omnes res, quae ad eius amplitudinem, & gloriam pertinent, libenter faceret. Est enim huius vestrae Ciuitatis laus quaedam, & gloria florere studiis, & artibus, atque in omni genere laudis ceteris antecellere. quis est enim qui hoc ignoret, nisi Vrbs Florentia tot viros illustres omni tempore peperisset, ac pareret, futurum fuisse, ut aut praeclae omnes artes iam extinctae essent, aut breui exstinguerentur? celebrantur vestri Poetae, laudantur historici, commendantur pictores. nihil est laudabile, nihil egregium, in quo non Florentinorum ingenia plurimum semper excelluerint. alios praeteribo (sunt enim complures) Ioannem vero Casam tacitus nullo modo praeterire queo. Possem ne eum ipsum non laudare, quem quidem post Franciscum Petrarcham Poetam sum-

D mum,

mum, Vere Poetam appellare possumus? qui tanquam
 clarissimum lumen Civitatem istam illustrat? istius
 quidē Viri præclara monumenta ita per Italiam omniū
 voce, & scriptis celebrantur, ut eius unius tum doctri-
 na, tum ingenio Vrbs Florentia pæne illustrior sit, quam
 multorum bellicis insignibus, & ornamentis. Hic mihi
 in delicijs est, hunc ego sæpe in manibus habeo, ac nemi-
 ni concedo, qui maiorem ex illius præclarissimis scriptis
 voluptatem capiat. Non enim ijs assentior, qui mino-
 rem gloriæ fructum ex Poetis etruscis, quam ex latinis,
 aut græcis percipi putant. errant, mea quidem senten-
 tia, qui ita sentiunt. ac ipsi de suo consilio viderint.
 Ego Poesim etruscam vehementer amo, atque colo,
 meq; tum Francisci Petrarchæ, qui unus ad summam
 Poesis gloriam pervenit, tum aliorum, qui ad eum pro-
 pius accesserunt, Poemata delectant, cum nec splendor
 in verbis, nec in sententijs gravitas, nec iucunditas in-
 numeris desideretur: cum multos habeant lepores, &
 multis tum ingenij, tum doctrine luminibus distincta
 sint. Pauci vero sunt, mi Alexander, & in hoc ipso
 paucorum numero tu merito habendus es, qui hac no-
 stra tempestate Poetæ nomen affecuti sint. eorum au-
 tem, qui inanes versus pangant, infinita est multitudo.
 quamobrem in tanta bonorū Poetarum penuria te in-
 re admiror, & colo; & quo maior est tui similium in-
 opia, eo tu mihi maiori quadam observantia, ac vene-
 ratione

ratione complectendus videris. contigit enim tibi, ut audio, quod paucis contigisse video, ut sententiarum gravitatem cum suauitate sermonis coniungeres, quarum altera prosis, altera vero delectes. Hæc sunt illa præclara, quæ in te magnopere laudo, quæq; in amorem tui me ita pellegerunt, ut teneri non potuerim, quin ad te scripserim. Non enim diuitijs, aut opibus, aut dignitatibus homines distinguere solco, sed doctrina, ingenio, & probitate. Nam, quod aliquis diuitijs affluat, honoribus abundet, nobilitate floreat, cum hæc omnia illi cum multis communia sint, non cum magnopere laudandum existimo; quod autem ingenio excellat, litteris præstet, pietatem colat, cum hæc vere sua propria dicere possit, eum omni laude dignissimum duco. incredibile igitur est, quantopere amicitiam tuam consequi cupiam, ac, ut tua mihi scripta mittas, desiderem. quod cum ita sit, maximum beneficium te mihi dedisse putabo, si voluntati meæ satisfeceris. Vale. Kal. Octob. CIO. IO. XCIII.

IO. NICOLAO SAVLIO CARREGAE,
ALEXANDER, SERTINIVS. S.

A IN' tu, pudore quodam tuo factum esse, ne prius ad me litteras dares, veritus immodesti hominis notam? te ne pudeat beneficia in eum conferre, quem tua exi-

D 2 mia

mia virtus, ac singularis humanitas tibi deditissimum, tuiq̃ amantissimum polliceatur? quid? aduerso potius meo fato dixeris; cum ipse iure optimo dolere possim honestissimo fructu voluptatis, & gloriæ diutius caruisse, quem maximum ex suauissimis litteris tuis percepi. Etenim, quod plurimi facias Urbem Florentiam, eius sermonem probes, Poetas legas, ac poetica facultate summopere delecteris, iucundissimum sane fuit; non enim mediocriter animus oblectatur, si earum rerum ceteros studio teneri intelligamus, quibus ipsi addicimur aut natura, aut industria. quod autem beneuolentia me prosequaris, quæ tua est humanitas, colas, in tuis habeas, laudibus ornes, id certe non modo iucundum, Verũ & gloriosum. Est enim hoc tuæ virtutis præclarum, ut, quos amore tibi coniunxeris, magna ijs accessio fiat honoris, & dignitatis. quare hac tua in me animi propensione nuper litteris declarata maiorem in modum letor, ac triumpho; & eo magis, quo minus meritis id mihi accidere sentio. Plurima tu de me scribis, perhonorifica illa quidem, sed quæ tibi, eisq̃, qui hanc de me opinionem concitarunt ob humanitatē, probitatēq̃ vestram, plus conferant dignitatis, quam mihi ob aliquam virtutis speciem, laudis, atque existimationis. Equidem, si in ea Ciuitate me natum inficer, in qua nullius egregiæ virtutis exemplum desideratur, sed omnia opportuna ad virtutem adipiscendam satis abunde suppetunt,

suppetunt, profecto mentiar. fama enim illustrium virorum, qui nobis domestica virtutis præbent exempla, id minime pateretur. habemus igitur, quos imitemur; Verumtamen, quo plus a natura accepimus, eo maiores virtuti debentur Usuræ. qua in re quam turpe sit fidem fallere, illinc deprehendere licet; quod si hominem rationis participem, ratione tamen nunquam vii videremus, aut oculos, ac manus habentem non secus se gerere, ac si oculis, manibusue careret, plane haud risum contineremus. quare, mi Sauli, dum subijcis me Patriam habere Florentiam, illud in mentem reuocatum intelligo, necessitatem mihi impositam esse amplectendæ virtutis, & omni ope, & studio colendæ. quod si vel ea præstitissem, quæ tu de me præclara sentire videris, nequaquam plus debito præstitissem; sed hæc ne spe quidem, ne dum re ipsa consequi possumus. non est enim vulgaris hominis in ea facultate excellere, quæ sit omnium præstantissima, & quantum voluptatis, & gloriæ, tantum habeat laboris, ac difficultatis; quæq; præ cæteris artibus plurimum ingenij in rebus inueniendis, doctrinæ in dicendis, iudicij in diiudicandis requiratur. quibus omnibus cum ego sim destitutus, quid laudis in pangendis carminibus potui promereri? accedit eo, quod fere omnia huius generis eo potissimum tempore a me profecta sunt, quo vires ingenij nondum per ætatem satis firmæ, quinimo imbecilles haud quidquam nisi tenuæ,

nue, & exile ferebant. cum vero per annos solidiores, ac validiores factæ fortasse quidpiam edidissent omnino non insuauis; diuersa studiorum ratio alio mentem distraxit. Nam, ex quo tempore ad iurisprudentiam me contuli, ita a musis sum alienus, ut quasi a Poetarum lectione uidear destitisse. Strozza unus superest, cuius ego scripta euoluam, ne si quid alias labore, & studio in hoc genere scribendi profecimus, longa intermissione prorsus ex animo dilabatur, sed huius facundissimi Poetæ usu potius confirmetur. at qui liber? de quo illud affirmare non dubitauerim, eos qui in conscribendis carminibus nostro sermone operam ponunt, seu maiorem, seu parem fructum ex nemine Poetarum petere posse. Tu, si quanta etruscæ linguæ uenustas, ac suauitas sit, quantæ humanæ mentis industria dignoscere cupis, hunc legas; hanc in uerbis, illā in rebus admiraberis singularem. cū igitur ego iam pridē mansuetioribus musis salutem dixerim, nihil huiusmodi habeo noui, quod ad te mittam. uerumtamē, ut quocunq; modo uoluntati tue satisfacerem, nonnulla ex ueteri penu deprompsi magis consulens necessitudini nostræ, quam meæ existimationi. Tu, si me amas, quæcunque ab homine officijs tuis, & amoris obnoxio expectare soles, ea tibi a me præsto esse credideris. Vale, atque Etrusco Pindaro, Chiabre-ræ inquam (hoc nomine clarissimū uirum appello) meis uerbis sal. pl. Floren. Pridie. Kal. Nou. CIO. ID. XCIII.

L E-

LEANDRO INVREAÆ.

SILVESTRI FILIO.

VERE loquar, mi Leander; si, dum ex urbanis molestijs, ac laboribus in istis pulcherrimis uillulis conquiescis, te mei oblitum esse mihi persuaderem, ac de tua erga me beneuolentia dubitarem, summo quidem dolore afficerer, & me a te disiunctum esse, tuo congressu, tuoq; sermone priuari, agre ferrem. Verum, cum certo sciam te talem absentem esse, qualis præsens eras, memorem scilicet mei; te istic esse, tantum abest, ut doleam, ut etiam summe gratuler. Equidem cum ad amicitias, honores, & dignitates, quibus Ciuitas abundat, animum refero, & hæc omnia plena esse insidijs, plena timoribus, plena molestijs animaduerto, cumq; præterea considero plerosq; esse, qui in Ciuitate ambitionis, ciuiliūq; negotiorum fluctibus ita iactantur, ut omnem animi tranquillitatem penitus amiserint; facere non possum, quin te maxime laudem, qui multam salutem negocijs dixeris, ac te in ista solitudine, tanquā in tranquillissimo portu contineas. Præclarum quidem uitæ genus complexus es, in quo neque temeritas, neque casus dominatur, & quod mihi totum in ratione, & prudentia, totum in præclaris actionibus positum esse uidetur. nec in ista solitudine tu mihi solus esse uideris.

Habes,

Habes enim libros tecum, quibus possis vere loquentibus aures facile dedere, amicissime admonentibus pro tua prudentia facillime parere. Et, ut libros omit- tam, Siluestrum habes patrem tuum, summum vi- rum, qui te suis præceptis instituat, disciplina erudiat, doctrina perpoliat, ut nullius præterea consuetudinem, nullius familiaritatem, aut vocem admodum iam de- sideres. Cui quidem, enitendum est, ut te quam similli- mum præbeas. quod profecto efficies, si in eius vitam intueberis, si eius mores, instituta, ac studia contem- plaberis. tibi contigit, domi ut habeas, unde discas, alijs fortasse non item. sic enim existimo nihil esse, quod ad laudem, gloriamque pertineat, quod non tibi in mentem veniat, atque ob oculos assidue versetur; nihilque esse, quod consequi aut prudentia homines, aut doctrina possint, quod tibi non sine cuiusquam voce, aut præcep- tis, intra domesticos parietes abunde suppetat. te me- rito igitur felicem, atque beatum existimo. quod si est, qui ab omni prorsus ambitione, rerumque urbanarum cu- ra remotus sit, qui in litterarum studijs omnes curas, cogitationesque fixerit, ex quo nec honoris spes, nec peri- culi metus eum valde commoveat; idemque si nihil præter honestum otium, ac tranquillitatem curet, nulla afficia- tur molestia, quid est, cur is non felix, beatusque sit? Vide, mi Leander, quot bona, quot commodâ, quantas utili- tates tua tibi suppeditat Albaria villa. idem tu, modo

ne ingratus esse velis, magnam ipsi bene merenti gratiam referas, necesse est. Orna igitur eam, quantum potes, & quod adhuc semper fecisti, Urbane commotioni longe antepone. nihil isto loco quietius, nihil iucundius, nihil amœnius, siue otium ad studia, tranquillitatem ad animum, salubritatem ad valetudinem quæras. O, si occupationibus me expedirem, quibus impedor, & in ista amœnitate tecum esse, ac vivere possem, me felicem, me fortunatum! mihi crede, non minus tuguriorum paupertate, quam regiarum ædium magnificentia delectarer; non minus volucrum, & pastoricijs fistulis, quàm musicorum cantibus aures meæ tenerentur; non minori taurorum, quam gladiatorum certamina, letitia spectarem. Alij auctoritate valeant, honoribus floreat, diuitijs abundent, suis denique ciuibus carissimi sint: ego istius vitæ tranquillitatem omnibus omnium Regum opibus, atque honoribus facile anteponerem. quippe tua in primis fruerer iucundissima consuetudine, & suauissimis, doctissimisq; sermonibus tuis interesssem. quanquam me non omnino a te abesse velim scias. sæpe enim me tecum animo coniungo, te mihi ante oculos constituo, modo sub platanis umbrifera nimios solis ardores vitantem, modo prope ripam murmurantis fluminis placide dormientem, modo in littore maris delectatione maxima deambulantem. absens tecum sum, tecum loquor: & siue

E

hamo

se, sed testificandi amoris in te mei, Velim existimes: cui enim ceteris rebus respondere non possum; amore certe respondebo. extremum illud est, ut te orem, & obsecrem, quando in me sic animatus es; hanc tuam ut conserues in me voluntatem; tibiq; persuadeas, nullum me unquam, aut studij, aut officij genus, quod ad te honestandum pertineat, prætermisurum; ita ut, te benevolentiam meam tanti fecisse, atque expetisse, nunquam pæniteat. quorum alterum de me, ut tibi polliceri possum; alterum a te ut expectem, tua singularis facit humanitas. Vale. Ex Cora. Idib. Maij. CIO. IO. XCIII.

ALEXANDRO SERTINIO.

Florentiam.

PVDORE quodam factum est meo, Alexander Sertini, ut prius meam erga te benevolentiam tibi non declararim. Verebar enim, ne parum modesti hominis esset eum litteris appellare, qui me ne de facie quidem, ne dume sermone unquam nosset, & qui totus in litteris, ut audieram de multis, abditus esset. Verumtamen, cum te singulari humanitate præditum esse intellexerim, & arbitratus sim tibi pro tua prudentia esse competentissimum, tantam vim virtutis esse, ut vel absentes coniungat, ac inter eos amorem conciliet, omni pudore deposito, hanc ad te, tanquam pignus obseruantia in

te

te meæ, epistolam mittere volui. multas habeo causas, mi Sertini, cur te præter ceteros obseruem, ac diligam. nam & in Ciuitate omnium florentissima natus es, & in litteris ita versaris, vt poetica facultate excellas. addo illud: testes habeo multa mihi de tuis præclaris virtutibus quotidie prædicantes, homines ita probos, ita prudentes, vt nec ipsi errare possint, nec alios errare patiantur. Non enim beneuolentia mea mediocris est erga Ciuitatem hanc vestram, quæ & omnium bonarum artium hodie veluti officina quædam habetur, & litteratos homines omni officiorum genere amplectitur, vt nemo eorum ita immemor, aut ingratus esset, qui non omnes res, quæ ad eius amplitudinem, & gloriam pertinent, libenter faceret. Est enim huius vestræ Ciuitatis laus quædam, & gloria florere studijs, & artibus, atque in omni genere laudis ceteris antecellere. quis est, n. qui hoc ignoret, nisi Vrbs Florentia tot viros illustres omni tempore peperisset, ac pareret, futurum fuisse, vt aut præclaræ omnes artes iam extinctæ essent, aut breui exstinguerentur? celebrantur vestri Poetæ, laudantur historici, commendantur pictores. nihil est laudabile, nihil egregium, in quo non Florentinorum ingenia plurimum semper excelluerint. alios præteribo (sunt enim complures) Ioannē vero Casam tacitus nullo modo præterire queo. Possem ne eum ipsum non laudare, quem quidem post Franciscum Petrarcham Poetam sum-

D

mum,

mum, Vere Poetam appellare possumus? qui tanquam
 clarissimum lumen Civitatem istam illustrat? istius
 quidē Viri præclara monumenta ita per Italiam omnium
 Voce, & scriptis celebrantur, ut eius unius tum doctri-
 na, tum ingenio Vrbs Florentia pæne illustrior sit, quam
 multorum bellicis insignibus, & ornamentis. Hic mihi
 in delicijs est, hunc ego sepe in manibus habeo, ac nemi-
 ni concedo, qui maiorem ex illius præclarissimis scriptis
 voluptatem capiat. Non enim ijs assentior, qui mino-
 rem gloriæ fructum ex Poetis etruscis, quam ex latinis,
 aut græcis percipi putant. errant, mea quidem senten-
 tia, qui ita sentiunt. ac ipsi de suo consilio viderint.
 Ego Poesim etruscam vehementer amo, atque colo,
 meq; tum Francisci Petrarchæ, qui unus ad summam
 Poesis gloriam pervenit, tum aliorum, qui ad eum pro-
 pius accesserunt, Poemata delectant, cum nec splendor
 in verbis, nec in sententijs gravitas, nec iucunditas in
 numeris desideretur: cum multos habeant lepores, &
 multis tum ingenij, tum doctrine luminibus distincta
 sint. Pauci vero sunt, mi Alexander, & in hoc ipso
 paucorum numero tu merito habendus es, qui hac no-
 stra tempestate Poetæ nomen affecuti sint. eorum au-
 tem, qui inanes versus pangant, infinita est multitudo.
 quamobrem in tanta bonorū Poetarum penuria te iu-
 re admiror, & colo; & quo maior est tui similium in-
 opia, eo tu mihi maiori quadam observantia, ac vene-
 ratione

ratione complectendus videris. contigit enim tibi, ut audio, quod paucis contigisse video, ut sententiarum gravitatem cum suauitate sermonis coniungeres, quarum altera prodis, altera vero delectet. Hæc sunt illæ præclara, quæ in te magnopere laudo, quæq; in amorem tui me ita pellexerunt, ut teneri non potuerim, quin ad te scripsissem. Non enim diuitijs, aut opibus, aut dignitatibus homines distinguere soleo, sed doctrina, ingenio, & probitate. Nam, quod aliquis diuitijs affluat, honoribus abundet, nobilitate floreat, cum hæc omnia illi cum multis communia sint, non cum magnopere laudandum existimo; quod autem ingenio excellat, litteris præstet, pietatem colat, cum hæc vere sua propria dicere possit, cum omni laude dignissimum duco. incredibile igitur est, quantopere amicitiam tuam consequi cupiam, ac, ut tua mihi scripta mittas, desiderem. quod cum ita sit, maximum beneficium te mihi dedisse putabo, si voluntati meæ satisfeceris. Vale. Kal. Octob. CIO. IO. XCIII.

IO. NICOLAO SAVLIO CARREGAE,
ALEXANDER, SERTINIVS. S.

*A*IN' tu, pudore quodam tuo factum esse, ne prius ad me litteras dares, veritus immodesti hominis notam? te ne pudeat beneficia in eum conferre, quem tua exi-

D 2 mia

mia virtus, ac singularis humanitas tibi deditissimum,
 tuiq; amantissimum polliceatur? quid? aduerso potius
 meo fato dixeris; cum ipse iure optimo dolere possim ho-
 nestissimo fructu voluptatis, & gloriæ diutius caruif-
 se, quem maximum ex suauissimis litteris tuis percepi.
 Etenim, quod plurimi facias Urbem Florentiam, eius
 sermonem probes, Poetas legas, ac poetica facultate
 summo opere delecteris, iucundissimum sane fuit; non
 enim mediocriter animus oblectatur, si earum rerum
 ceteros studio teneri intelligamus, quibus ipsi addici-
 mur aut natura, aut industria. quod autem beneuolen-
 tia me prosequaris, quæ tua est humanitas, colas, in tuis
 habeas, laudibus ornes, id certe non modo iucundum,
 verum & gloriosum. Est enim hoc tuæ virtutis præcla-
 rum, ut, quos amore tibi coniunxeris, magna ipsi accef-
 sio fiat honoris, & dignitatis. quare hac tua in me ani-
 mi propensione nuper litteris declarata maiorem in mo-
 dum letor, ac triumpho; & eo magis, quo minus meri-
 tis id mihi accidere sentio. Plurima tu de me scribis,
 perhonorifica illa quidem, sed quæ tibi, eisq; qui hanc de
 me opinionem concitarunt ob humanitatē, probitatemq;
 vestram, plus conferant dignitatis, quam mihi ob ali-
 quam virtutis speciem, laudis, atque existimationis.
 Equidem, si in ea Ciuitate me natum inficer, in qua
 nullius egregiæ virtutis exemplum desideratur, sed om-
 nia opportuna ad virtutem adipiscendam satis abunde
 suppetunt,

suppetunt, profecto mentiar. fama enim illustrium virorum, qui nobis domestica virtutis præbent exempla, id minime pateretur. habemus igitur, quos imitemur; Verum tamen, quo plus a natura accepimus, eo maiores virtuti debentur vsuræ. qua in re quam turpe sit fidem fallere, illinc deprehendere licet; quod si hominem rationis participem, ratione tamen nunquam uti videremus, aut oculos, ac manus habentem non secus se gerere, ac si oculis, manibusue careret, plane haud risum contineremus. quare, mi Sauli, dum subijcis me Patriam habere Florentiam, illud in mentem reuocatum intelligo, necessitatem mihi impositam esse amplectende virtutis, & omni ope, & studio colende. quod si vel ea præstitissem, quæ tu de me præclara sentire videris, nequaquam plus debito præstitissem; sed hæc ne spe quidem, ne dum re ipsa consequi possumus. non est enim vulgaris hominis in ea facultate excellere, quæ sit omnium præstantissima, & quantum voluptatis, & gloriæ, tantum habeat laboris, ac difficultatis; quæq; præ ceteris artibus plurimum ingenij in rebus inueniendis, doctrinæ in dicendis, iudicij in diiudicandis requiratur. quibus omnibus cum ego sum destitutus, quid laudis in pangendis carminibus potui promereri? accedit eo, quod fere omnia huius generis eo potissimum tempore a me profecta sunt, quo vires ingenij nondum per ætatem satis firmæ, quinimo imbecilles haud quidquam nisi tenue,

nue, & exile ferebant. cum vero per annos solidiores, ac validiores factæ fortasse quidpiam edidissent omnino non insuave; diuersa studiorum ratio alio mentem distraxit. Nam, ex quo tempore ad iurisperitiam me contuli, ita a musis sum alienus, ut quasi a Poetarum lectione uidear destitisse. Strozza unus superest, cuius ego scripta euoluam, ne si quid alias labore, & studio in hoc genere scribendi profecimus, longa intermissione prorsus ex animo dilabatur, sed huius facundissimi Poetæ usu potius confirmetur. at qui liber? de quo illud affirmare non dubitauerim, eos qui in conscribendis carminibus nostro sermone operam ponunt, seu maiorem, seu parem fructum ex nemine Poetarum petere posse. Tu, si quanta etruscæ linguæ uenustas, ac suauitas sit, quantæ humanæ mentis industria dignoscere cupis, hunc legas; hanc in uerbis, illā in rebus admiraberis singularem. cū igitur ego iam pridē mansuetioribus musis salutem dixerim, nihil huiusmodi habeo noui, quod ad te mittam. uerumtamē, ut quocunq; modo uoluntati tue satisfacerem, nonnulla ex ueteri penu deprompsi magis consulens necessitudini nostræ, quam meæ existimationi. Tu, si me amas, quæcunque ab homine officijs tuis, & amoris obnoxio expectare soles, ea tibi a me præsto esse credideris. Vale, atque Etrusco Pindaro, Chiabre-ræ inquam (hoc nomine clarissimū uirum appello) meis uerbis sal. pl. Floren. Pridie. Kal. Nou. CIO. ID. XCIII.

LE-

LEANDRO INVREAÆ.

SILVESTRI FILIO.

VERE loquar, mi Leander; si, dum ex urbanis molestijs, ac laboribus in istis pulcherrimis uillulis conquiescis, te mei oblitum esse mihi persuaderem, ac de tua erga me beneuolentia dubitarem, summo quidem dolore afficerer, & me a te disiunctum esse, tuo congressu, tuoq; sermone priuari, agre ferrem. Verum, cum certo sciam te talem absentem esse, qualis præsens eras, memorem scilicet mei; te istic esse, tantum abest, ut doleam, ut etiam summe gratuler. Equidem cum ad amicitias, honores, & dignitates, quibus Ciuitas abundat, animum refero, & hæc omnia plena esse insidijs, plena timoribus, plena molestijs animaduerto, cumq; præterea considero plerosq; esse, qui in Ciuitate ambitionis, ciuiliūq; negociorum fluctibus ita iactantur, ut omnem animi tranquillitatem penitus amiserint; facere non possum, quin te maxime laudem, qui multam salutem negocijs dixeris, ac te in ista solitudine, tanquā in tranquillissimo portu contineas. Præclarum quidem vitæ genus complexus es, in quo neque temeritas, neque casus dominatur, & quod mihi totum in ratione, & prudentia, totum in præclaris actionibus positum esse uidetur. nec in ista solitudine tu mihi solus esse uideris.

Habes.

ne ingratus esse velis, magnam ipsi bene merenti gratiam referas, necesse est. Orna igitur eam, quantum potes, & quod adhuc semper fecisti, Urbanae commorationi longe antepone. nihil isto loco quietius, nihil iucundius, nihil amœnius, siue otium ad studia, tranquillitatem ad animum, salubritatem ad valetudinem quæras. O, si occupationibus me expedirem, quibus impedor, & in iſia amœnitate tecum eſſe, ac viuere poſſem, me felicem, me fortunatum! mihi crede, non minus tuguriorum paupertate, quam regiarum ædium magnificentia delectarer; non minus volucrum, & paſtoricijs fiſtulis, quã muſicorum cantibus aures meæ tenerentur; non minori taurorum, quam gladiatorum certamina, letitia ſpectarem. Alij auctoritate valeant, honoribus floreat, diuitijs abundent, ſuis denique ciuibus cariffimi ſint: ego iſtius vitæ tranquillitatem omnibus omnium Regum opibus, atque honoribus facile anteponerem. quippe tua in primis fruerer iucundiſſima conſuetudine, & ſuauiſſimis, doctiſſimisq; ſermonibus tuis intereſſem. quanquam me non omnino a te abeſſe velim ſcias. ſæpe enim me tecũ animo coniungo, te mihi ante oculos conſtituo, modo ſub platano umbrifera nimios ſolis ardores vitantem, modo prope ripam murmurantis fluminis placide dormientem, modo in littore maris delectatione maxima deambulantem. abſens tecum ſum, tecum loquor: & ſiue

E

hamo

hamo pisces capias, siue auibus insidias pares, siue feras canibus agites, eisdem fere voluptatibus tecum perfruar. has ego exercitationes non improbo, moderate modo sint; immo nobili sane viro dignissimas existimo. nec impediunt, quominus in philosophia, & eloquentia, aut in historia, qua te magis delectari video, multas tibi diei horas consumere liceat. quæ quidem historia næ magni æstimanda est; si quidem ex vniuerso litterarum genere hæc vna maximam habet dignitatem, maximum fructum affert, mirabilem præbet utilitatem. facile, cum historiam legimus, quid diuersis temporibus acciderit, vno eodemq; tempore intelligimus; veritatem omni luce clariorem perspicimus; res innumerabiles memoria comprehendimus; actiones omnes nostras recte disponimus; totius antiquitatis cognitionem percipimus. In historia prudentium consilia, fortium facta, sapientium dicta commemorantur. Perge tenere istam viam, quam maiores tui tibi tritam reliquerunt; sic facile ad æternum decus, ad immortalitatem peruenies. Vere auguror, nec mea me fallat opinio. nam, quo die primum tecum locutus sum, & ad amicitiam tuam me contuli; eo ipso die in te specimen quoddam futura virtutis animaduerti: vt minime dubitem, quin hanc opinionem, auguriumq; de te meum laudabili exitu breui sis comprobaturus. Vale. Genua. x. Kal. Septemb.

CIO. IO. XCIIII.

MVL-

MVLTVM REVER. AC RELIGIOSO
PATRI, AVGVSTINO MAINERIO,
CLERICO REGVLARI.

MAGISTER ille omnium sapientissimus nostra salutis auctor Christus, Augustine Pater religiosissime, qui, ut humano generi consuleret, e cælo delapsus nostram induit mortalitatem, ac inter nos versari voluit; plurima nobis sane præcepta tradidit, quibus vitam omnem nostram recte institueremus: sed ex ijs omnibus nihil nos magis edocuisse videtur, quam errantibus viam salutis ostendere, homines singulari charitate amplecti, & saluberrimis documētis prodesse quamplurimis. quæ quidem omnia ipse prius, quam alijs tradiderit, vita, atque factis expressit, ut eius auctoritate, atque exemplo unusquisque in ijs rebus ardentiori studio se exerceret, & præclaras illas admonitiones re magis quam verbis, sequeretur. Hoc tu scilicet pro tua prudentia illo primum animaduertisti die, quo te sacris addixisti, & vitam tranquillam turbulentæ, tutam periculose, beatam misere prætulisti. neq; vero animaduertisti solum, quod alij quamplurimi fecerunt; sed etiam, in quo summum illum præceptorem imitaris, ita diligenter præstitisti, & præstas; ut nemo iam æqualium tuorum, mea quidem sen-

E 2

tentia

Deus immortalis , humanitate , ac benignitate , quanta non modo beneuolentia , verum etiam pietate me afflictum crexisti ? Vt tranquillo iam animo , & spe maxima confirmatus me totum tibi tradiderim , & præceptis , institutisq; tuis meam niti salutem cognouerim . dixisti nobis de illa perpetua iam , non de hac exigua vita esse cogitandum ; in vno Deo omnia esse ponenda , ceteraq; inania esse ostendisti ; nihil esse cum æterna salute conferendum ; omnibus , qui Deum dilexerint , coluerint , timuerint , amplissima esse in cælo præmia constituta . Hæc omnia mihi in animo hærent , hisce ego delector , hisce tanquam suauissimo , ac iucundissimo pabulo pascor . quis porro a veritatis luce aberrans in tenebris erroris , atque inscitie ita misere versetur , qui hæc vera , & utilia sibi maxime non arbitretur ? quis aut ita langueat , aut ita frigeat , qui ad studium summi boni non excitetur , & perpetuæ felicitatis amore non inflammetur , dum illa præclara secum ipse meditatur ? sunt quasi semina quedam salutaris disciplinæ , quæ in animis hominum quotidie spargis ; quæ quidem postea huiusmodi fructus ferunt , vt eis nihil possit esse præstantius . Equidem ego hæc humana iam contemnere incipio , etsi ea antea stulte quidem tantopere admirabar : iam te ducem sequor , te , inquam , qui certissimo cursu , diuinæ gratiæ aura prosequente , illam cælestem patriam petis . valeant , qui tam immoderate

te

te honores sitiunt, diuitias appetunt, & voluptates sequuntur; si quidem hæc omnia consecuti, tantum abest, ut acquiescant, & meliores fiant, ut etiam semper aliquid cupiant, & deteriores efficiantur. quid mirum igitur, si te omnes vnice diligunt, & tuam consuetudinem exoptant? si ad te accedunt quamplurimi timore perterriti, auxilio destituti, consilio egentes? multa enim habes, quæ beneuolentiam concilient, & suum unicuique malo proprium, ac certum remedium adhibes. inclinantes erigis, vacillantes confirmas, errantes reuocas, afflictos recreas. Per te alij vitæ integritatem, & innocentiam, alij in Deum pietatem, ac religionis cultum a Deo obtinent; ut nemo fere iam sit, qui maxima a te non habeat beneficia. ego equidem, quod e perturbationibus emerferim, quod maxima tranquillitate fruar, quod animum ad cælestium bonorum contemplationem transtulerim, quod denique ipse mihi, & Deo potissimum viuam, tibi acceptum refero. pro quibus omnibus si mea mihi imbecillitas referende gratiæ potestatem adimit, prædicandæ certe, atque habendæ non adimet. Vale. Ex edibus nostris. XI. Kal. August. CIO. IO. XCIII.

ALE-

ALEXANDRO PAGIO.

HIERONYMI FILIO.

Pifas.

ETSI is ego sum ; optime Pagi, qui ab amicis non plus, quam quantum ipsi velint, postulare unquam soleam: Verumtamen, si aliquando in amicitia illi mihi peccare videntur, facere non possum, quin ea ex re maxima afficiar molestia, ipsosq; amicissime admoneam, ut erratum suum agnoscere velint. Quod cum ita sit, illud pergrauiter fero, adduci potuisse te, qui mihi amicissimus semper fuisti, ut mecum de tua decessione minime communicares, & asperius, quam tui patiantur mores, mecum ageres. mihi itaque non alienum ab instituto meo visum est hanc ipsam ob causam ad te litteras dare, & veritatem exquirere, nunquid amicitie nostrae obliuione hoc feceris, & ab ea humanitate, quæ in tuis verbis agnoscebatur, quæq; in tuo etiam vultu elucebat, fortasse descueris. neque mehercule hoc ad te scribendi munus a me susceptum est ad reprehensionem (quin etiam maxime laudandus es, quod adolescens adhuc, & prorsus imberbis tanta prudentia præditus sis, ut nihil temere, nihil imprudenter agas) sed magis ad tranquillitatem animi

FABIO PAVLINO,

Venetias.

MIHI in dubium venit, doloris ne plus, an voluptatis, ex Reuerendiſſ. & Illuſtriſſ. Ioannis Grimani Patriarchæ Aquileienſis grauiffima morte accipiendum ſit. nobis quidem dolendum eſt, quod talem, & tantum virum amiſſimus, in quo magna ex parte vniuerſæ Eccleſiæ ſalus, & dignitas nitebatur: qui, quam diu vixerit, optimarum artium præſidium, & ornamentum fuerit: qui denique auctoritate, & exemplo omnes non modo, qui præſentes eius vitam intuebantur, ſed etiam qui abſentes eiufdem merita ſummis laudibus efferri audiebant, ad verum decus maxime excitauerit. Sed non minus letandum, quod ille ex ijs tenebris eductus, quibus hominum vita obſcuratur, in illa ſempiterna luce ſit collocatus, vbi Summi Dei, cæleſtiumq; animorum conſpectu fruatur, vbi denique magnorum laborum, quos propter Eccleſiæ ſalutem ſuſtinuit, nunc tandem maximos capiat fructus. quæ quidem omnia tu ita aperte, ita grauiter explicaviſti: vt nullum fere ſit laudationis, vel ornamenti genus, quo tua in eius funere vacauerit oratio. quam obrem illum letari ſummopere arbitror, quod te maximum laudum ſuarum præconem inuenerit, cuius opera factum eſt, vt is omnium

F

mor-

mortalium fama post mortem celebretur. quod autem orationem ipsam ad me misisti, pergratum te mihi fecisse, & me nihil iam diu libentius legisse existimes velim. nam mihi electis verbis, sententijsq; plena, maxima tum gravitate, tum etiam suavitate visa est. Video tragædiam tibi nondum redditam esse, nec ulla mihi relinquitur spes fore, ut illa tibi reddatur. Sed ille, cui commiseram, non tam est reprehendendus, quod promissa non præstiterit, quam laudandus, quod fortasse occupationum tuarum rationem habuerit. mihi voluntas, & benevolentia in me tua satis explorata est. Vale. Genua XII. Kal. Decem. CIO. IO. XCIII.

ANTONIO Mariæ SPELTÆ,

Ticinum.

QVOD me longo dierum interuallo tam artificioso epigrammate salutasti, ut præcipue te mei non esse oblitum intelligerem, tibi gratias ago. in hoc enim agnosco amorem tuum prope singularem. Nam, nisi me non vulgariter amares, tale profecto munus non misisses. equidem doleo, quod tibi respondere officijs minime possim; sed si hoc non licet, studio tamen, & observantia aliqua ex parte satisfaciam. Plus quidem artificij hoc epigramma, quam quæ iam dudum ad me misisti, habere videtur. itaque illud libenter legi. in hoc poësis genere

genere ita excellis, ut non modo neminem tecum conferam, verum etiam te omnibus anteponam. Sed cum laudi, & dignitati tuæ maxime studeam, facere non possum, quin ad grauiora te studia hortor. aliquid enim maius a te homines postulant, quibus satisfacere te posse, & velle scio, & ut velis, auctor sum. quin præclarum illud opus de Papiensibus Episcopis a te iam nuper institutum perpolis, atque conficis? quin tandem desiderium nostrum, quasi diurnam sitim explēs? mihi crede, optime Spelta, si hoc facies, & utilitati nostræ, & gloriæ tuæ maxime consules. Hanc, si forte minus de ea sollicitus es, quam vellem amplecterere, quam vellem omnibus rebus anteponeres. nihil est enim gloria admirabilius, nihil dulcius, nihil optabilius. Hæc igitur pro meo in te maximo amore, maximaq; obseruantia. velim enim putes me esse vnum, qui in te amando omnibus antecello; me esse vnum, qui nisi te colerem, atque obseruarem, grauitè peccare mihi viderer. Vale. Genua. prid. Non. Nouemb.

IOANNI ANDREÆ CEVÆ,

Romam.

POST sex menses, eoq; amplius, Ioannes Andrea Ceuæ, duabus de causis has ad te litteras dare constitui: quarum est altera, quod operam mihi tuam ut

F

2

præstes,

præstes, nunc opus est; altera ne, intermisso litterarum officio, amicitia nostra paulatim dissuatur. nam, etsi illam huiusmodi niti fundamentis arbitror, ut firmam, ac perpetuam fore confidam: tamen, ut sunt omnes, qui amant, solliciti, atque anxij, cogor non nunquam timere, ac multa cogitare, quæ si vera essent, in maximo quidem dolore, atque molestia versarer. Sed ea falsa esse iam ex tuis litteris cognoscam. scio enim te magnopere amicitiae constantia delectari, ac maxime laborare, quomodo eum perpetuo ames, quem semel amandum suscepisti. nunc audi, quod abs te velim. scis, Ioannes Andrea, me non modo illorum veterum, sed horum recentiorum poetarum lectione mirifice delectari. Equidem, cum Marco Antonio Flaminio non possem non primas concedere, tantâ ex illius scriptis voluptatem capio, ut vel eius carminum libellum, quam aliorum longa poemata malim. Sed hanc mihi voluptatem nescio quis asperset molestia, cum diceret nonnulla ex illius scriptis Ecclesiam non probare, legiq; prohibuisse. quamobrem, cum scire cupiam an ne Flaminij opera tuto legi possint; velim, inquam, quando tu apud Amplissimum Sanctæ Seuerinæ Cardinalem unum e supremis Inquisitoribus plurimum & auctoritate vales, & gratia, ut ad me, quomodo res se habeat, diligenter perscribas, & eum librorum indicem mittas, quem proxime factum esse intelligo. Non enim
salu-

salutem meam ita negligo, vt Ecclesie decreta contemnam, libros heretica prauitate infectos legere audeam, ac ea voluptate, qua legendo affici soleo, me priuari egre feram. nam si illud verum est, valeat Flaminius, nec mihi posthac in amoribus, ac delicijs sit. an potest vlla esse voluptas maiorum instituta contemnenti, a Sanctissimis Ecclesie legibus discedenti? ego equidem eam esse voluptatem in animum induxi maximam, quam maxime Ecclesie preceptis, institutisq; parere. in hoc igitur meo negotio ea velim prestes, quae maxima in te esse cognoui, industriam, & diligentiam. alium enim, qui mihi cumulatius hac in re satisfacere possit, istuc habeo neminem. Et cum his litteris responderis, adde verbum, si me amas, de Aldo Manutio, cuius mihi beneuolentiam vt conserues, magnopere cupio. mea enim erga illum mediocris non est. dices fortasse, quia te Paulli patris scripta valde delectant. hoc quidem mehercule verum est; sed tamen etiam, antequam Paulli patris scripta vidissem, Aldi filij tum doctrinam, tum eloquentiam maxime admirabar, ipsumq; maxime diligebam. sed quid est, quaeso, quod ille meis litteris nunquam responderit? est ergo vlla res tanti, vt istius tam debiti officij partes praetermittat? sane vt valeat, quid agat, scire vehementer cupio. etiamq; velim, vt carmina quaedam ab eo efflagites, quibus Paullus eius pater miserabilem Iacobi Bonfadij

dijobitum deflet, ac ea mihi quamprimum perferenda cures. ego nunc si quid de me, studijsq̃ meis scire cupis, optima fruor valetudine, & ad legendum, aut scribendum aliquando me confero. Verumtamen non perinde, ut solebam, in optimarum artium cupiditate uersor, sed quotidie magis langueo, ita ut studiorum satietas interdum me capiat. Otium, & animi tranquillitatem studia requirunt; ego occupationibus premor assiduus, maximisq̃ perturbationibus agitor. præterea mihi non numquam hæc studia inania uidentur, illa autem esse uera, quæ eternam pariunt salutem. a te post illas, quas ad me cum amplissimi Cardinalis tui commendatitia epistola misisti, nullas litteras accepi. quid agas, & ut iucunde uiuas, scire uelim; maximeq̃ quibus te litterarum studijs oblectes. omni cura incumbere, ut ualeitudini tuæ seruias; & quamquam absentes sumus, nos litteris tamen posse coniungi existimes. Vale.
Genua Nonis Ian. CIO. IO. XCV.

ADMOD. REVER. P. IOANNI

PETRO MAFFEO.

Mediolanum.

SVPERIORIBVS diebus, Ioannes Petre Maffee, uolumen quoddam epistolarum in manibus habui,
in

*in quo cum multæ clarorum Virorum, tum nonnullæ
erant a te non minus eleganter, quam sapienter scriptæ.
quas cum sæpe, ac sæpius perlegissem, admiratus ora-
tionis grauitatem, & elegantiam tanta tui videndi,
& cognoscendi cupiditate incensus sum, vt, quoniam
id, quæ ratione euenire posset, non intelligebam, cum te
iam hæc humana reliquisse existimarem, vitam mihi
iniucundam putarem. Illos quidem ex nobilitate no-
stra omni laude dignissimos viros, quod te olim potissi-
mum delegerint, qui studijs suis consuleres, quod hono-
rifice te Genuam accerferint, ac summa beneuolentia,
& humanitate exceperint, id & sapienter considera-
se, & considerate fecisse existimabam. felices eos fuisse
statuebam, qui tibi noti, familiaresq; fuerint, ac tuam
singularem doctrinam, & incredibilem eloquentiam
presentes degustauerint. feliciores autem, qui tecum
familiariter vixerint, & præceptis, institutisq; tuis,
tanquam recte viuendi norma, actiones suas forma-
uerint. In summo tamen dolore, quem ex desiderio
tui capiebam, hæc inerat consolatio, quod, & tuis le-
gendis, & peruolutandis scriptis, vt illud aliqua sal-
tem ex parte lenirem, futurum sperabam. hæc cogi-
tanti illud profecto accidit, quo nihil mihi gratius, aut
iucundius accidere poterat. cognoui enim ex Bernardo
Ferrario viro antiquitatis peritissimo te etiam nunc
huius lucis usura perfrui, superiore æstate Genuæ con-
stitisse,*

fuisse, & in ædibus Imperialium eo tempore interdum
 fuisse: nunc uero Mediolanite considerare, esse in oculis
 Clarissimo, atque Excellentissimo viro Iacobo Boncom-
 pagno, omnibus charum, omnibus iucundum. quamobrem
 maxima illico perfusus letitia sum, ac nihil mihi
 potius fuit, quam ut ad te scriberem, & meam tibi
 singularem erga te observantiam declararem. Habet
 hoc virtus, quam tu, cum iam inde ab adolescentia
 complexus fueris, nunquam postea dimisisti, ut nos in
 hominum admirationem impellat, & ad eos amandos,
 atque colendos incendat, quos ne uidimus quidem, ne-
 dum allocuti sumus. atque utinam mihi per occupationes
 liceret Mediolanum excurrere; caperem non medio-
 crem uoluptatem ex tuo iucundissimo, grauissimoq; aspe-
 ctu; multas diei horas in tuis doctissimis sermonibus
 audiendis consumerem; tibi præsens meam in te animi
 propensionem patefacerem. Verum quando id non li-
 cet, quod præsens facerem, quam te magnopere reue-
 rear, quantiū faciam, per litteras ostendam. Quan-
 tas tu debes immortalī Deo gratias, doctissime Mas-
 fee, qui non modo tibi hanc mentem dederit, ut sacris
 te addiceres, & in hoc amplissimum Collegium te con-
 ferres, uerum etiam tantis te uirtutibus ornauerit, ut
 illi decori esses, & ornamento. multa prætereo, ne sim
 longior. illud quidem non tacebo, quod proxime maxi-
 ma cum admiratione legi. Indiarum scripsisti histo-
 riam

riam ita grauitè, ita eleganter, & in eà præclara multorum Patrum facinora pro Christi gloria egregie ita narraſti, ut ad veteres illos proximus acceſſeris, & iſtius religioſiſſimæ ſocietatis nomen per omnes gentes diuulgaueris. Cum vero Beati Ignatiij huius collegij, Deo duce, auctoris, & conditoris vitam deſcripſeris, & eam nobis tanquam perfectum aliquod exemplar imitandam propoſueris, vix dicam, bone Deus, quam tu ornate, quam copioſe eius facta expreſſeris, quantam in dicendo vim, & eloquentiam oſtenderis, quomodo ad ſtudium ſummi boni nas excitaueris, atque inflammaueris. quamquam, quid opus eſt ea, quæ litteris mandaſti, hoc loco commemorare, cum te ipſum iampridem, & familiam iſtam illuſtrauerint, & inter manus doctiſſimorum virorum quotidie verſentur, atq; ab ijs & voce, & ſcriptis celebrentur? ſatis tu quidem, quantum & doctri-
na, & eloquentia præſtes, in tuis doctiſſimis, & elegantiffimis ſcriptis oſtendiſti; ut nemo fere iam ſit, qui ea legerit, qui non aliorum ineptias abijcere velit, & bonas horas, quas antea perdidit in te imitando melius conſumere. nemo eſt ex ijs, qui in rectam illam perfecte ſcribendi viam ſe dederit, qui non ſibi ad exoptatam eloquentiæ laudem certum iter per te patefactum exiſtimet, ac eo nomine te amet, ac tibi plurimum debere fateatur. ego equidem, qui ita latine linguæ ſtudio in-

G

cenſus

census sum, ut non dubitem, quin tu, qui de illius dignitate optime sentis, tuis me præceptis, atque consilijs; alij vero, qui in illius nomen temere irrumpunt, maxima reprehensione dignum existiment; dies fere nullus est, quin tua scripta legam, atque ex ijs tanquam ex perennibus, uberrimisq; fontibus ad hanc meam eloquentiæ cupiditatem explendam semper aliquid hauriam. Nunc intelligo te de rebus gestis Greg. XIII. Pont. Max. Iacobi Boncompagni rogatu historiam scribere, quæ cum erit perfectæ, sane tum propter res ipsas, tum propter orationis tuæ genus opus egregium fore confido. Perge igitur absolvere ea, quæ instituisti, & quamprimum ea perpolire, quæ iam habes absoluta. tibi certe hanc laudem relinques, te non modo nostros homines eloquentiæ fama antecisse, sed etiam nobis longo intervallo & Cæsares, & Salustios retulisse. quod autem in illius præstantissimi viri familiaritatem veneris, est sane quod gaudeas, & hoc nomine, id quod reliquum est vitæ, tibi iucundissimum esse debet. multæ in eo virtutes enitent, sed hoc vel in primis maxime elucet, quod erga litteratos homines præclare animatus est, illos amanter excipit, atque omni benignitate complectitur. Sed iam de te, tuisq; eximijis virtutibus plura dicere omittam, non tam, ut ne ad te de te ipso scribendo tuas modestissimas aures offendam, quam ne te laudando gratiam tuam me colligere

ligere velle videar. et sic ea, quæ dixi, ita patent, ita nota sunt omnibus, ut nemo me tanquam falsa loquentem possit reprehendere. tantum igitur a te peto, ut hoc meum scribendi officium in optimam partem accipias, & existimes me, ut scriberem, tum doctrina, & eloquentia tua, tum virtutum tuarum prædicatione esse adductum. quod si voles in me esse durior, ac modestiæ fines me præterisse existimare; id ipsum a me factum esse putabis incredibili desiderio, quo teneor me in amicitias clarissimorum virorum insinuandi. quodcum ita sit, spero fore, ut non modo mihi tui amantissimo ignoscas, sed etiam ad amicitiam tuam aditum libenter patefacias. Ego autem laborabo, ne ulla unquam in re officium, atque diligentiam meam desideres. in quibus autem opera mea uti velis, ex tua te voluntate statuere facile patior. de qua si certior unquam fiam, intelliges profecto neminem esse, qui doctrinam tuam pluris faciat, & qui te memoria, atque studio diligentius colat. Vale. Genua. Idib. Martij. CIO. IO. XCV.

ADMODVM REVER. PATRI
IO. PETRO MEDIOLANENSI
CARMELITAE.

Astam.

Ex silentio tuo magnam caperem molestiam, Ioannes Petre humanissime, nisi mihi silentij caussa notissima esset: nam, te tum in studijs tuis, tum in Cœnobij muneribus vehementer occupatum esse, certo scio. Verumtamen ex eodem silentio iure forsitan, ne te meï ceperit obliuio, subuereri possum: siquidem qui vere amat, etiam si valde occupatus sit, nunquam tamen scribendi officium prætermittit; nunquam cursum amoris interrumpi occupationibus patitur. quis me vno occupatior? attamen vides, ut meus est in te amor, me amicitie nostræ non immemorem fuisse, & occupationes me impedire non potuisse, quominus ad te scriberem. at ego in amicitia paullo senexior fortasse sum, & amicis plus, quam par sit, durior me præbeo. quid? plus ne oneris amicis est imponendum, quam per eorum negotia licet? sui ne muneris, & priuilegij ex virtute orta amicitia omnino expers erit? si ita fieret, nimis esset amicitie dura condicio. suo igitur iure utatur amicitia; errata dissimulet, amicis consulat. silentium itaque tuum in bonam partem accipio, Ioannes Petre,

Quiduis potius mihi persuadeo, quam quidquam
 de tua erga me benevolentia esse detractum. quid? cum
 iam hoc humanitati tue tribueris, ut me amares, te
 idem constantiae tribuere velle, ut me amare perseue-
 res, non existimem? hanc certe in me suspicionem resi-
 dere minime patiar. hoc tamen abs te velim, ut, cum in
 alijs rebus inferiorem me tibi esse concedam, in amore
 tamen superiorem esse æquo animo feras. Et, si verum
 fateri volumus, quid in me est eximium, aut singulare,
 ut aliorum mihi benevolentiam conciliem? in quo, ut
 voluntatem quisquam laudare possit, qua etiam multi
 me aut adequant, aut vincunt; ingenium certe, atque
 industriam, quæ voluntatem perficere potuit, iure ne-
 mo laudabit. In te vero tum ingenij, tum eloquentiæ
 præclara signa elucent: quæ absens animo sæpe contem-
 plor, cum ea iam antea maxima lætitia propius ad-
 spexerim, cum simul philosophiæ operam daremus: ut
 ex eo tempore singularis tua virtus me tibi valde de-
 uinxerit, ac ego te amore singulari semper amauerim.
 hic, Ioannes Petre, quamquam vere loquar, nec vere-
 bor, ne quis dicat me auribus tuis gratiæ causa inscri-
 uire: tamen, & maiorum tuorum iudicio, quo quid
 potest esse certius? & omnium consensu, ea, quæ dico,
 confirmari magnopere gaudeo. Tu n. cum annum agas
 vix dum quintum, & decimum, quæ ætate vix pauci
 inueniuntur, qui boni discipuli sint, Patrum tuorum
 appro-

ADMODVM REVER. PATRI
IO. PETRO MEDIOLANENSI
CARMELITAE.

Altam.

Ex silentio tuo magnam caperem molestiam, Ioannes Petre humanissime, nisi mihi silentij causa notissima esset: nam, te tum in studijs tuis, tum in Cœnobij muneribus vehementer occupatum esse, certo scio. Verumtamen ex eodem silentio iure forsitan, ne te me ceperit obliuio, subuereri possum: siquidem qui vere amat, etiam si valde occupatus sit, nunquam tamen scribendi officium prætermittit; nunquam cursum amoris interrumpi occupationibus patitur. quis me vno occupatior? attamen vides, ut meus est in te amor, me amicitie nostræ non immemorem fuisse, & occupationes me impedire non potuisse, quominus ad te scriberem. at ego in amicitia paullo senerior fortasse sum, & amicis plus, quam par sit, durior me præbeo. quid? plus ne oneris amicis est imponendum, quam per eorum negotia licet? sui ne muneris, & privilegij ex virtute orta amicitia omnino expers erit? si ita fieret, nimis esset amicitie dura condicio. suo igitur iure utatur amicitia; errata dissimulet, amicis consulat. silentium itaque tuum in bonam partem accipio, Ioannes Petre,

& quiduis potius mihi persuadeo, quam quidquam
 de tua erga me benevolentia esse detractum. quid? cum
 iam hoc humanitati tue tribueris, ut me amares, te
 idem constantiae tribuere velle, ut me amare perseue-
 res, non existimem? hanc certe in me suspicionem resi-
 dere minime patiar. hoc tamen abs te velim, ut, cum in
 alijs rebus inferiorem me tibi esse concedam, in amore
 tamen superiorem esse æquo animo feras. Et, si verum
 fateri volumus, quid in me est eximium, aut singulare,
 ut aliorum mihi benevolentiam conciliem? in quo, ut
 voluntatem quisquam laudare possit, qua etiam multi
 me aut adæquant, aut vincunt; ingenium certe, atque
 industriam, quæ voluntatem perficere potuit, iure ne-
 mo laudabit. In te vero tum ingenij, tum eloquentiæ
 præclara signa elucent: quæ absens animo sæpe contem-
 plor, cum ea iam antea maxima lætitia propius ad-
 spexerim, cum simul philosophiæ operam darcemus: ut
 ex eo tempore singularis tua virtus me tibi valde de-
 uinxerit, ac ego te amore singulari semper amauerim.
 hic, Ioannes Petre, quamquam vere loquar, nec vere-
 bor, ne quis dicat me auribus tuis gratiæ causa infer-
 uire: tamen, & maiorum tuorum iudicio, quo quid
 potest esse certius? & omnium consensu, ea, quæ dico,
 confirmari magnopere gaudeo. Tu n. cum annum agas
 vix dum quintū, & decimum, qua ætate vix pauci
 inveniuntur, qui boni discipuli sint, Patrum tuorum
 appro-

approbatione electus es, qui collegis tuis præceptor esses, & eos eloquentia erudires. non enim in philosophia ita versaris, ut ab ea eloquentiam seiungas (quod quidem prudenter facis, ac tuum equidem institutum maxime probo) sed philosophiæ studio ita deditus es, ut etiam in eloquentia operam optime collocari existimes. Permane in hac pulcherrima sententia. non me latet multos esse, qui eloquentiam reprehendunt, & philosophiam tantummodo laudant: scilicet, quia illa in verbis, hæc in rebus versetur; illa verborum scientia, hæc rerum intelligentia; illa inanis loquacitas, hæc vera sit sapientia. hæc imperiti homines dicunt, qui tamen eorum exemplo refelluntur, qui, cum in philosophia prope singulares exstiterint viri, omnium quoque eloquentissimi fuerunt. non ne videmus Platonem, & Aristotelem, utrunque in philosophia præstantissimum fuisse, utrunque tamen ita philosophiam cum eloquentia coniunxisse, ut alter omnium elegantissimus sit, alter vero flumen orationis aureum fundat? tu vero recte sentis, quod eos haberas auctores, eos sequaris, ceteros contemnas, qui te a recta eloquentiæ via deducere velent: quorum scripta, quia omnino fructu, & voluptate carent, raro admodum, aut nunquam legere soleo. quæ potest enim iucunditas esse in ijs libris, quæ utilitas, in quibus inquinate, atque barbære scripta sunt omnia? & in quibus nec verborum elegantia inest, nec

sen-

sententiarum splendor est ullus? nec ordo, nec dispositio, nec omnino simulacrū aliquod, aut vestigium eloquentiae? quamquā si ulla res est, quae te eloquentiae studio ardentem vehementius incitauerit, hanc certe fuisse crediderim; quod hoc animo omnes fere esse perspexeris; quoniam latinae linguae ornamenta vestri ordinis homines negligere videntur; nihil ut a vobis, nisi rude, nihil quod impoliticum non sit, exspectari posse arbitrarentur. quam quidem opinionem ut ex animis hominum aliquando euelleres, necesse fuit. in hoc etiam consilium tuum vehementer laudo; quod non aliunde, quam ex illo fonte Cicerone eloquentiam ipsam hauriendam esse duxeris. quis est enim, qui hoc in genere quidquam sciat, quinon ex isto scire fateatur? quis porro in hac latine scribendi facultate aliquid est, aut unquam fuit, qui, quidquid est, non omnino de illo fluxerit fonte? quis omnium prudentior, quis eruditior, quis Cicerone ornatior, atque vberior? etsi nonnullos ex nostris, in quorum scriptis omnium consensu, & approbatione, veteris refidere eloquentiae memoria videtur, nullo modo praetereundos existimem. ij autem qui sint, quid uede singulis sentiam, quid ego tibi parefaciam magna prudentia praedito, cui in hoc genere nihil potest esse occultum? taceo te praestantem in musicis; in philosophia magna cum laude uersatum: multa praetereo, quae causa sunt, cur te ament omnes, & amicitiam tuam

ma-

maxime cupiant. Perge: præclare quidem adhuc te præstitisti; maiora tamen expectamus. Nos quidem de futuris rebus nihil affirmare possumus: ex quibusdam tamen ingenij signis de futura hominum uirtute prædicere certe possumus. quis a te summa omnia non expectat? quis dubitat, quin aliquando ille uir futurus sis, qui maximis honoribus dignus habearis, qui familiam istam tuis uirtutibus ornes, atque illustres; cum in hac adolescentia, in ipso pæne ætatis flore, tam præclara uirtutis, & ingenij dederis documenta? sed nescio quomodo in laudum tuarum mentionem inciderrim, cum hoc neque mihi propositum fuerit, nec eas hic sit commemorandi locus. Uelim ut ad me sæpe scribas, ac de te, studijsq; tuis certio rem me facias. te in ea urbe nunc esse, quæ floret ingenijs, quæ bonas artes colit, non mediocriter gaudeo. Equidem ego non ignoro hanc urbem complures tum maiorum nostrorum, tum patrum ætate præstantes uiros tulisse; in quibus Marcus Antonius ill: Natta, qui præclara multa scripsit, uir tum sacris, tum humanis litteris insignis principem locum tenuisse uidetur. hisce autem temporibus multos in ea ipsa uiros esse, qui tum doctrina, tum humanitate excellunt, pro certo scio: quorum tu beneuolentiam (ut aditum sibi aperit uirtus ad amicitiam) non dubito, quin iam tibi conciliaueris: tuq; ex eorum congressu, ipsi uicissim ex tuo maximam utilitatem percipiant.

ex

ex quibus si aliquem mihi dederis amicum, quem amem, quem debitis laudibus ornem, pergratum mihi feceris. Hoc enim exploratum habeas velim, me cum multorum amicitijs augeri semper cupierim, tum in primis ad eorū beneuolentiam conciliandam, qui virtute excellunt, omnes curas, omniaq; studia intendere. Itaque eos laudibus ornando, meam illis beneuolentiam declarando, eorum commodis inscruiendo, nullum officium prætermitto, ut ipsorum mihi amicitiam omnium rerum charissimam esse cognoscant. Si autem de statu meo, meorumq; studiorum ratione aliquid scire cupis; hæc accipe. Valetudine vtor satis commoda, animo tamen paullulum sum perturbatus. Sed, etsi in hac vita nihil magis expetendum uidetur, quam animi tranquillitas, & secundissima omnia: tamen, si nihil contra voluntatem accideret, si ex voluntate fluerent omnia, nullam exercendæ virtutis materiem haberemus, neque ad Deum, a quo vno ad omnes euentus subsidia sunt quærenda, ita sæpe confugeremus. otio autem, ut multis occupationibus districtus, omnino non careo; ut miro quodam eloquentiæ studio incensus, parum abundo. studia igitur non magnopere calcant. Superiore hyemali tempore plane cessauimus. pauca enim scripsimus, nec multa etiam legimus. causam in frigora consero, quæ hic pertulimus intolerabilia. nunc vero cum hyems iam abierit, & ineunte vere

H

omnium

omnium rerum amoenitas ad scribendum nos inuitet, quidquid negligentia omisimus, maiori sarcinemus diligentia. sequar enim meum institutum, & quidquid supererit a negotijs orij, id pæne totum in præclaris litterarum studijs injumam. multa enim illorum beneficio consequor. quas ipsa vita molestias habet, modice fero; animo suauissimum præbeo alimentum; ad laudem, & ad honestatem excitor; vnam virtutem sequor, cetera contemno. Hæc vt scriberem, Ioannes Petre, officio impulsus sum; & cum ita occupatus essem, vt ad hanc epistolam scribendam vix orij satis haberem, eodem sum officio admonitus, vt ex occupationibus ad te scribendi tempus eriperem. Tu, si de te vicissim aliquid rescripseris, nihil mihi gratius facere poteris: sin per occupationes tuas hoc meum explere desiderium tibi non licuerit (tuo enim commodo fieri velim) amore ipso contentus hanc litterarum intermissionem haud ita grauiter feram. Vale.

NIHIL potuit accidere * quod magis mirarer, quam per tot menses nullas me a te litteras accepisse, & promissa illa, quibus me diu tenuisti, te ex memoria deleuisse. ac equidem, si a te petiissem, vt me in tuis scriptis laudares, & id a te impetrare minime potuissem, minus mirum: acquiescerem. sed cum te tua spon-

te

ne id facturum pollicitus sis, ac postea ea de re ne verbum quidem feceris, hanc immutatam voluntatem mirari satis nequeo, atque tuam fidem, tuamq; in me beneuolentiam paulkulum requirere cogor. scis quæ mea fuerit cupiditas. a te tantummodo diligi optabam: id si consecutus essem, te mihi satis dedisse existimarem: Ut autem nomen meum tuis insereres scriptis, tantum abest, ut optauerim, ut ne cogitauerim quidem. ac inquires fortasse te publice docendi munere distineri, ac idcirco consilium illud antea susceptum deposuisse. esto. Vide quam humaniter tecum agam. neque enim is ego sum, qui res aliter accipiam, ac debeam, & qui, quod potest esse, pertinaciter esse nolim. Verumtamen non ne hoc ipsum te scribere decuit? non ne animum mihi tuum indicare æquum fuit? enimuero eos maxime laudare soleo, quibus totus est apertus, & simplex animus; ut contra eos maxime reprehendere, qui sepe animum simulationis integumento occultant. quod sane vitium cum diligenter vitare debeant omnes, tum diligentius eos vitare oportet, qui in litterarum studijs versantur. & quamquam, quo meæ spectent actiones, iam notum esse arbitror: tamen quia fieri potest, ut id tu ignores, quando non consuetudo, non usus inter nos assiduus intercedit, rationibus nostris ita ferentibus, ut ego Genuæ, tu Ticini viuas, his de causis faciendum mihi putavi, ut hoc ipsum per litteras significarem.

ficarem. Ut primum nosse aliquid cæpi * hanc mihi proposui uitam, ut, cum doctrina, quæ in me sane exigua est, bonitatem quoque coniungerem. hoc unum specto, nec ullus mihi iam uel doctissimus aliter ut faciam unquam persuaferit. Itaq; placere Deo semper studui: nihil præterea mihi curandum esse duxi. quid enim hominibus prodest, ingenio præstare, plurimarum artium cognitione excellere, nisi hæc omnia uni Deo referantur accepta, qui perennis est, ac æternus sapientiæ fons, & a quo uno cuncta manare bona uere credendum est? equidem non possum non uehementer eos improbare, qui in litteris tantum ambitione uersantur, in quibus quasi omnia habeant constituta, uitæ integritatem contemnunt, pluris doctrinam, quam æternam salutem facientes. multorum autem impudentiam mirari non desino, qui, ut tales uideantur, quales re uera non sunt, uirtute abutuntur. homines, si a litteris, & doctrina spectentur, integerrimi; si a uita, & moribus, uitiosissimi. quorsum ista, inquires? ut intelligas, me magis uirtutem ipsam, quam uirtutis insignia consequi cupisse, & esse, quam uideri semper maluisse. hinc factum est, ut de sermonibus hominum minime laborauerim; at uero quid mihi faciendum esset, maxime semper cogitauerim. hinc etiam, ut laudem aliunde nunquam quaesierim, cum in ipsa uirtute, ac in optima præcipue conscientia ueram sitam esse laudem existima-

stimaucrim. ea enim gloria inanis, atque infirma mihi
semper visa est, quæ breui tempore posset amitti, quæq;
opinionem hominum potius, quàm veritate niteretur. quid
enim incertius esse potest, quam ex scriptorum arbitrio
pendere? nota est eorum in scribendo consuetudo, nota
licentia. Vt mirum videri non debeat, si multi clarissi-
mi viri de rebus suis commentarios perscripserint, &
vitam suam litteris mandauerint. ea nimirum perfe-
cta est gloria, quæ ex virtute pèdeat, quæ nullius lau-
dibus augeatur, quæ nullius vituperatione minuat. isq;
gloria satis abundat, qui virtute præstat, qui lau-
dabiliter viuit. quamobrem* si quod promiseras, præ-
stitisses, amicitie nostræ satisfecisses: Vt autem mihi af-
fentarer, Vt me denique magis diligerem, profecto non
effecisses. neq; vero te accuso; accusem te ego? te ne ego
accussem, qui omnia recte cogitas, omnia prudenter
agis? id me facere æquum esse non existimo. Verum meā
facilitatem accuso, quod promissa illa tua statim non
reiecerim, & vitæ meæ rationem tibi non patefecerim.
Sed quamuis nullam de me in tuis scriptis mentionem
feceris, non id saltem a te impetrare poterō, Vt mihi in
amore respondeas? non ne omnem humanitatem exui-
se videreris, si tui amantem non redamares? ego equi-
dem, quamquam tuis dictis facta non responderint:
tamen, quod te amauerim, & obseruauerim, operam
male collocasse nunquam existimabo. quod quidem
institu-

institutum, cum antea diligenter seruauerim, seruabo posthac diligentius, si a te me tantum amari intellexero, quantum ego te profecto & amo, & obseruo. Vale. Genua. VII. Kal. August. CIO. IO. XCV.

SINIBALDO FERRARIO.

TVA in me beneuolentia adductus, Sinibalde Ferrari, illud tacere non potuisti; Ut, quoniam antea nimium plenus, posthac in scribendo breuior sim, nam genus illud scribendi, etsi non omnino reprehendendum, non prorsus tamen laudandum esse existimas. equidem consilio tuo tum amoris, tum prudentiæ pleno, omnino parere constitui. quod si antea in oratione nimis redundans, & superfluens fui; detur hoc iuuenili ætati, quæ in scribendo haud semper exiguis finibus se continet, sed interdum liberius fluere, & vagari gaudet. omnino deinceps operam dabo, ut mea scripta tibi placeant. quod ego si assequor, displiceant alijs; non laboro. Tu, enim (quæ tua prudentia est) unus omnium de his studijs iudicare potes. Tu in ijs tantum processisti, ut ad perfectam laudem peruenieris, & complures ex nostris longereliqueris. nam, quamuis interdum in nostris sermonibus dicas, me tibi latine scribendi facultate anteisse, & longe maiora mihi tribuas, quam tribuere par sit: non ita tamèn desipiens sum, ut non magis

magis in hoc modestiam tuam, quam veritatem agnoscam. Ego equidem in his studijs laboriose uersor. feliciter parum; ut uerear, ne labor omnis pereat, quem in illis tractandis suscepim. quamquam lucri parum fecisse mihi non uideor, quod inuidis; & obrectatoribus meis silentium imposuerim. dictitabant maleuoli me orationem illam de Concordiæ laudibus non fecisse, quam tribus fere abhinc annis in nostra Dispersorum Academia habui scilicet, quia tantum, ac tam breui tempore in latina lingua tunc profecisse non poteram. Vere loquar, si nibalde, stultorum hominum sermonibus mea mihi detrahentium nonnihil commouebar. etsi nulla res me ab incæpta via retrahere unquam potuit. quin etiam magnam illis habeo gratiam; cum eorum maleuolis sermonibus factum sit, ut maiore constantia in mea sententia permanerem. non enim Balihassari Ayrolo assensus sum, qui me (beneuolentia credo adductus) ut cessarem hortabatur. cuius auctoritatem cum multis in rebus plurimum apud me semper valere passus sim: in hac una tamen eam omnino nihil valuisse non mediocriter gaudeo. quid, si non tantum fortasse doloris tunc capiebam, cum illa dicebant, quantum nunc caperem letitiæ, eadem si dicerent? satis oratio illa puerilis est. quippe ego me pure, eleganterq; tunc scribere existimabam, si alienas mihi sententias in meis scriptis vindicarem, & si in scribendo

scribendo a Cicerone sæpe, vel a quouis alio illi si minus
 pari, certe proximo, totus essem. cognoui postea maxi-
 mæ prudentiæ esse bonos scriptores eligere, quos diligen-
 ter imitemur; maximæ autem industriæ eos assequi,
 quos nobis ad imitandum proponimus. itaque nunc,
 quod absque arrogantiâ dictum sit, maiori studio ad-
 hibito, maiora si vellem, fortasse possem. sed invidos,
 & obrectatores missos faciam. Te vero, Sinibalde,
 cuius præceptis, & consilijs illud consecutus sum; ut, si
 non tibi similis esse possum, qui latine egregie loqueris,
 nostris dissimilis sim, qui non bene latine loquuntur,
 cur non amem? cur in ijs non numerem, qui de me opti-
 me meriti sunt? equidem iam tantum me tibi debere
 profiteor, quantum persolvere si velim; id ne minima
 quidem ex parte facere possim. Sed, si pro tuis in me
 meritis tibi referre gratiam non valuerò, ha-
 bere quidem certe non decro. alterum
 cum præstare non possim, si tentem,
 Valde sim demens: alterum
 cum possim, si præter-
 mittam, valde
 ingratus.

Vale. Ex adibus nostris III. Nonas
 Septemb. CIO. IO. XCV.

IOANNIS NICOLAI
SAVLII CARREGAE
GENVENSIS

EPISTOLARVM

LIB. II.

HORATIO LOMBARDELLIO,

Senas .

MAGNUM hoc est virtutis priuilegium,
optime Lombardelli, vt absentes non mi-
nus, quam praesentes amemus. complures
quidem Genuae adsunt viri doctrina
praestantes, quorum me consuetudo vehementer dele-
ctat, quosq; ego studiose colo: Verumtamen, cum eo-
rum scripta lego, vel de ijs alios loquentes audio, qui in
nostra Italia viuunt, aut in longinquis regionibus ha-
bitant, facere non possum, quin eos item diligam, &
eorum mihi beneuolentiam conciliare studeam. ex om-
nibus vero te mihi in primis amandum, colendumq;
proposui: quem ego de facie ignotum, multorum tamen
sermonibus, & scriptorum tuorum lectione plane co-
gnoui. equidem tua scripta cum antea saepe legissem,

I doctri-

doctrinam redolere mihi semper visa sunt, quam maxime probitas commendat. non multa tu quidem litteris mandasti; sed quæ legentibus non mediocriter profint: ut, qui plura scripserint, fortasse multi, qui meliora, pauci admodum reperiantur. sæpe alios maxima cum animi voluptate audiui de laudabili vitæ tuæ instituto, de morum integritate, de præclara exercenda virtutis consuetudine, multa narrantes; sed ea nescio quomodo iucundiora acciderint Balthassaris Ayroli adolescentis summa mihi necessitudine coniuncti testimonio cõfirmata. Te felicem, Horati, qui has humanas perturbationes vitare potueris. nam, dum alij in his vitæ tempestatibus naufragium sæpe faciunt, tu prope solus in litteris, velut in pleno tranquillitatis portu, acquiescis. quanti illud etiam apud me esse debet, quod Torquatus Tassius maximam de tua virtute opinionem habuerit, atque eam summis laudibus decorauerit? quis ab eiusmodi viris laudari maxime felicitatis loco non ducat? summus ille quidem poeta fuit, qualis ante acta ætate non exstitit, atque haud scio, an insequenti futurus sit unquam. itaque, eo morte extincto, verus poësis honor, & Etrusci sermonis splendor extinctus est. quid? parum ne illud valet ad benevolentiam conciliandam cuiates homines sint, quouoc loco nati? quis Senarum nobilitatem, ac dignitatem ignorat? quæ ornamenta isti Ciuitati desunt, cum hoc

vno

uno abundet, ut ingenijs floreat, atque studia, & bonas artes colat? sed eius laudes longam fortasse orationem desiderarent; epistola autem breuitatem requirit. Vides amoris in te mei multas esse causas, easq; quidem minime lues; hanc unam autem grauissimam esse, quod vitæ innocentiam cum doctrina coniungas. unum restat, ut vicissim te mei amantem præbeas, ac in numero tuorum me habeas. quod ego si assequor, in eo, quod maxime optauerim, mihi satisfactum esse existimabo. quem fructum ex studijs meis præstantiorem, vberioreme percipere unquam possum, quam si doctissimorum virorum beneuolentia fruor? nec solum me a te amari intelligere cupio, sed etiam, ut idem alij quoque intelligant, vehementer opto. alterum ad animi mei iucunditatem, alterum ad meam laudem maxime interesse arbitror. unum doceo me tecum assidue esse non posse: sed mutua inter nos litterarum missio magnæ mihi leuationi erit: utq; ex eo magnam molestiam, sic ex hoc magnam iucunditatem percipiam. Interim mea omnia studia, officiaq; omnia libenter tibi deferō: ijs enim si in tuis rebus vti volueris; operam dabo, ut non minus ex re ipsa, quam ex studio, & voluntate meam erga te beneuolentiam perspicias. Vale. Gen-
nua XII. Kal. Nouemb. CIO. IO. XCV.

OCTAVIO AMALTHEO,
HIERONYMI FILIO.

Venetias.

CUM doctissimorum virorum præclara testimonia de Hieronymo patre tuo iam pridem vidissem, ita illius amore incensus sum, nihil ut senserim ardentius; ita illius scripta legendi cupiditate exarsi, nihil magis ut expetiuerim. fidem facile habebam huiusmodi viris; nec eos alucinari potuisse existimabam, quia prudentes erant; nec falsa narrasse, quia veritatis amatores. itaque magnam de eo opinionem conceperam, quæ in dies magis magisque augebatur. etsi ea quidem tanta non erat, quin futurum, ut res ipsa eam superaret, pro certo haberem. sed cum eius scripta maxima diligentia conquisissem, ea non modo non inueni, sed ne spes quidem ulla erat fore, ut unquam inuenirem. hominem autem doctissimum, & in primis Poetam præstantissimum adduci potuisse, nihil ut litteris mandasset, & nos tanto fructu, tantaque voluptate priuasset, mihi persuadere non poteram. erat hæc in summo desiderio maxima molestia, tantiq; viri scripta tanquam in tenebris latere, digna, quæ in clarissima luce versarentur, agre ferebam. Verum posteaquam filium

te

te suum reliquisse illum intellexi, te inquam, qui eius
 tum corporis, tum animi imaginem ita refers; qui con-
 suetudinem ita imitaris, ut non modo paternæ virtu-
 tis, sed amoris etiam, quo ille amicos amplexabatur,
 hereditatem adiisse videaris; quod maxime optabam,
 me consecuturum speravi: simulq; illud impetraturum,
 ut me, qui patrem tuum mortuum colo, eorum loco ha-
 beas, qui eum viuum obseruarunt. Itaque statim ad
 te scribere constitui, maluiq; immodestiae notam subire,
 quam non hanc meam tibi erga patrem tuum, atque
 adeo erga te ipsum propensionem significare. equidem
 præsens præsensem te alloqui cuperem, tum ut te, quem
 admodum fama, ita de facie quoque cognoscerem; tum,
 ut ea, quæ de Patre tuo ab alijs accepi, ex te ipso intel-
 ligerem. sed occupationes impediunt: quod si per eas
 liceret, ijs sane nominibus contemnerem huius urbis
 pulchritudinem, & magnificentiam præ illa volupta-
 te, quam ex tuo ipsius adspectu perciperem. Te igitur
 rogo, ut hanc meam voluntatem amplectaris, & pa-
 tris scripta, aut meo nomine Ioanni Paulo Iolito Fer-
 rario dare ne graueris, aut illi saltem, ubi ea perqui-
 rere debeat, indicare velis. is enim, ut vir optimus
 est, atque officiosissimus, ea ad me perferenda diligen-
 ter curabit: etsi non tam cito id faciet, quin nimium
 sero ea mihi reddi videantur. Pluribus tecum age-
 rem, si aut humanitas tua mihi dubia esset, aut tu is
 esses,

esses, qui patris virtutem longe distribui, & communicari nolles. tantum dicam, si in eo, quod a te peto, mihi morem gerere volueris, me tibi in perpetuum fore deuinctum. Vale. Genua. XIII. Kal. Decembris. CIO. IO. XCV.

ALDO MANV TIO,
PAVLLI FILIO,

Romam.

QVOD antea tam diuturno silentio vtereris, & ad ea, quæ per litteras ex te quaesieram, nihil rescriberes, vt de homine parum diligenter officium colente, de te non nihil queri cogebar. Verum, postea quam tuas noui occupationes, & multorum sermonibus de immutato rerum tuarum statu certior sum factus; tantum abest, vt de te iam querar, vt etiam ex eo magno dolore afficiar; simulq; illud mirer, qui fieri possit, vt ijs destitutus auxilijs, quæ industriam adiuuare possent, tot litterarum causa susceptos labores sustinere queas. Itaque has ad te litteras dare volui, tum vt me tibi purgarem, si aliquando plus tibi oneris imposui, quam occupationes paterentur tuæ; tum, vt quam ex hac tua tam aduersa fortuna sollicitudinem capio, tibi declararem. nam si quisquam est, qui animo angatur,
cum

cum virtuti locum esse non vides, & letitia afficiatur, cum merita virtuti præmia tribuuntur, cum me esse scias velim. alterum mihi contigit superioribus diebus, Matthæo Senarega Reip. meæ Duce creato. eo enim nomine tanta sum perfusus voluptate, quanta, qui in eo, quod votis optauerat, sibi satisfactum intelligit. quis sibi Reiq. publicæ maxime non gratuletur, bonorum tandem omnium consensum plus, quam paucorum iniquitatem valuisse; & nostræ Ciuitatis principatum eum obtinuisse, qui eloquentia, atque prudentia fere princeps est? alterum in tuis, tuiq. similium virorum calamitatibus sentio, ex quibus quantum molestiæ suscipiam, qui meam consuetudinem, ac meos plane sensus tenent, optime norunt. at quis non ingemiscat, complures ex ijs, qui, si opes spectentur, literatos homines subleuare maxime possent: si quid autem merita valent, maxime deberent; vsque eo crudeles esse, vt ijs vel necessaria deesse pariantur? te vero, quem maximis præmijs accersiri ex ultimis terris æquum esset, vt hominum studijs consuleres; in ipsa vrbe Roma id tua sponte facientem tam domesticis incommodis laborare, quis non ferat inique? nam, cum ita vixeris, vt ad homines iuuandos haud fere alius quisquam fuerit propensior: tamen, tantum absuit, vt digna meritis tuis præmia tuleris, vt etiam eos ingratos expertus sis, atque immemores. sed veniet tēpus,

cum

cum eos, qui tibi de hominibus optime merito plurimum debebant, in te ingratos exstitisse pœniteat, & quam adipiscendæ virtutis occasionem habebant, eam sublata frustra desiderent. Tu tamen, quando optimi viri officio satisfacisti, bonarumq; artium studiosis optime consuluisti, tuum ab omni cura animum vindicare debes: cum præsertim duas res habeas, quibus maxime sustentaris, pietatem erga Deum, & partem tuis scriptis gloriam; quarum altera præstantissimum tibi in cælo fructum, altera nominis eternitatem promittit. en fructus, quos pater tuus ex tantis laboribus, atque uigilijs tulit. ualeant iniqui, & in obscuris ignorantie tenebris perpetuo iaceant. Ille, dum Romane littere splendorem suum obtinebunt, dum probitas inter homines elucebit, obscurus esse non poterit: quin etiam doctrina, & eloquentia clarus, bonitate, & in Deum pietate clarior, immortalitatis luce fruatur. quod reliquum est, te rogo, ut tuam mihi beneuolentiam conserues, ut in tantis occupationibus mihi rescribas, non postulo: cum præsertim rationem inierim, qui litterarum tuarum desiderium, si prorsus non tollerem, aliqua saltem ex parte minuerem. nam, ut Venetijs a Ioanne Paulo Iulio Ferrario, tua ad me scripta mitterentur, curavi. ea enim cum sæpe in manibus habeam, hoc assequor, ut silentium tuum minus mihi molestum sit. quæ quidem scripta ita mihi placent, ut, qui ea non legunt,

legunt, maximo fructu, qui uero legunt, ac non probant, omni iudicio carere existimem. nam Auū tuu m, non tantum nomine, sed etiam doctrina, Parentem uero & doctrina, & eloquentia mihi referre uideris. ego autem nemini concedo, qui plus te obseruet, ac diligit. quod si mei tibi sensus, æque ac ea, quæ oculis cernuntur, omnino paterent, ita esse perspiceres: & non modo, quæ mea sit in te animi propensio, sed eam ipsam, quam omnibus notam esse cupiam, facile cognosceres. Vale.
Genua. CIO. IO. XCVI.

VT Academiam istam instituis^s hoc a Deo Opt. Max. precatus sum, ut tanta res, quam omnibus profuturam intelligebam, uobis feliciter, prospereq; succederet. quod cumulatissime consecutus nihil mihi adhuc in uita accidisse iucundius uere affirmare possum. ex eo enim tempore Academia uestra ita floruit, ut omnibus Academijs, quæ iam fuerunt, quæq; nunc sunt, nobilitate, atque doctrina facile antecellat; Ciuitatiq; nostræ splendoris tantum afferat, ut illa non tam pulcherrimis ædificijs, ac diuitiarum amplitudine, quam hac ipsa Academia clarior sit. quamobrem hoc uestrum institutum cum magis considero, magis summis laudibus offerendum censeo: nihilq; utilius, aut ad ciuitates illu-

K

strandas

strandas, aut ad homines studio uirtutis inflammandos excogitari posse arbiutor. nam, cum natura ita comparatum sit, ut ex hominibus alius in aliare, nullus in omnibus excellat, ac idcirco alter alterius indigeat; optime, mea quidem sententia, consultum fuit, Academia instituta. hic sese mutuo ad laudem, & decus homines hortantur, suas quisque cogitationes in medium profert, & quod alteri deest, præsto plerumque est alteri: ut suavis quidam cōcentus Academia mihi videatur, qui ex dissimilibus vocibus oriatur, tanta tamen arte conciliatus, ut aures, animumq; dulcedine compleat. nam quāuis e vobis alius historia magis delectetur, alius poetices in studio laudabilius versetur, alius iuris scientiæ propensius deditus sit: vnum tamen scopum, immortalitatem scilicet, velut facta conspiratione, omnes spectatis. præclara consensio, ut nihil tam difficile, arduum uesit, quod non, & tam concordistudio, tantaq; mutui amoris concordia, ad exoptatum exitum perducere possitis. Sed, si quemadmodum de gloria vestra maxime laboro, ita ipse, quæ ad eam pertinere sentio, aperte dicere debeo; hæc vestra Academia tanquam illustre aliquod monumentum ad memoriam magis spectare debet posteritatis, quam ad præsentis temporis gratiam. præclare quidem illius fundamenta iecistis, altius eam sustulistis; quis negat? sed expolitio, siue perfectio operis restat: quæ quidem in

comihi posita esse videtur, ut aliquid mandetis litteris, quod posterius in manibus habeant. nisi hanc etiam partem absolueretis, videremini hominibus haud secus egisse, atque aliquis architectus, qui maximo artificio admirabilem fabricam inchoaret, sed eam rudem, atque impolitam relinqueret. Præclarum est assiduus tum legendi, tum disputandi exercitationibus tanquam suavisimo pabulo ingenium alere; sed longe pulchrius est cogitationes suas litteris mandare. ille in nostrum duntaxat usum accommodantur; hæ etiam ad alienas utilitates se explicant. Ille obliuione quandoque delentur; hæ nulla unquam vetustate tolluntur. nam, quod in studio excogitandi, atque effingendi insignia vos tempus conterere audio, res profecto inanior est, quam ut in ea industriæ vestræ nervos contendere debeatis. id enim ingenium, idque studium est omnium vestrum, maiora ut a vobis homines expectent, atque eadē, quæ ab ijs, quibus summa voluntas, summaque facultas non desit. quid cessatis ingenij thesauros multis laboribus, multoque studio congestos explicare? num vobis maiori voluptati eos asseruatos, quam gloriæ, cum alijs communicatos, fore censetis? famæ igitur vestræ ita male consulitis, ut eam angustis Lyguriæ terminis contineri velitis? scilicet hoc fuerat, propter quod, relicta patria, domestico studio non contenti, doctrinæ comparandæ causâ, modo Bononiam, modo Patavium vos olim

contulistis, & præstantibus in omni scientia viris operam dedistis. quod si, quemadmodum adhuc virtutis cognoscendæ studio incensi fuistis, ita posthac illius ornandæ desiderio flagraretis, quos fructus ex laboribus vestris homines non colligerent, aut quas ipsimet laudes diuino vestro ingenio, eximiaq; industria non consequeremini? nolite igitur solidam, veramq; gloriam contemnere, quam scribendo vobismetipsis profecto comparabitis. ea enim, quæ ex opibus, aut populari gratia paratur, ut falsa prorsus, ac inanis est, ita ad breve tempus, exiguumq; perdurat. Litteris vero de vobis optime meritis, eas excitando, atque ornando, præmium reddite. nam plus quam naturæ illis, pene dixerim, a nobis debetur. quod viuamus, hoc quidem naturæ munus est; quod autem melius, sapientiusq; viuamus, litteris acceptum referre debemus. longiorem epistolam non faciam, spero enim fore, ut homines tum vos assidue vigilasse animaduertant, cum somno sepultos iacere crederent. hæc pauca vero, quæ dixi, ut omnino superuacanea non existimo; sic ea in optimam partem ut accipiat, vos omnes rogatos velim. nam ludorum spectatores imitari. volui; saltem si præ virium mearum imbecillitate vos per hoc virtutis stadium ad immortalitatem tanquam ad metam currentes non sequer, acrioribus stimulis ut incitarem.

IO. VINCENTIO PINELLO,

Patauium.

CUM ad eos animum conuerto, qui in Italia nostra præclara litterarum studia excitarunt, ac summum in honorem adduxerunt, Pinelle vir præstantissime, tu mihi vnus omnium id maxime fecisse videris; Ut vere litterarum patronus, vere litteratorum Mæcenas inter alios appellari possis. nam, ut omit-
tam, quod ipse omnibus liberalibus disciplinis ita excellis, ut nemo prorsus ex nostris tecum conferendus sit, nedum anteponendus; litteratos homines libenter ita amplecteris, ut nihil prætermittas, quod ad eorum studia fouenda, atque alenda pertineat. quodcum ita facis, non minorem a studiosis omnibus, qui alienis scriptis maxime delectantur, quam a doctissimis viris, qui tua cohortatione aliquid scribunt, gratiam inire videris. tibi referuntur accepta tot præclara monumenta, quæ viri ingenio, & doctrina præstantes, tanquam vberimos industrie suæ fructus, reliquerunt, & ea se a te habere omnes fatentur. nam, nisi doctissimorum virorum studia tuis opibus sustentasses, eorum scripta in lucem non prodissent; &, quæ illis proposita erant, haud perficere potuissent. quis per totam libenter in explendas voluptates pecunias unquam effudit,

effudit, quam tu libenter in libros tum græcos, tum latinos Undique comparandos semper effudisti? illud certe constat, qui uel exquisitiorem, uel plurium nummorum bibliothecam habeat, hac ætate existere neminem. minimeq; mirandum videtur, si quis superioribus diebus inconuentu doctissimorum virorum dixerit hanc tuam bibliothecam iucundiori spectaculo sibi fuisse, seq; ex ea maiorem voluptatem percepisse, quam ex illo multiplici armorum apparatu, quo tantopere Venetie gloriantur. næ tu præclarum vitæ genus, quod est totum in virtute constitutum, summa cum laude, ac tranquillitate semper coluisti, & in tantis humanæ uitæ tenebris, in quibus plerique mortalium sepe offendunt, ex omnibus virtutibus clarissimum lumen emittis, ut errantes uerum iter gloriæ iam agnoscere, qui uero illud iam ingressi sunt, alacriter progredi possint. ac bonum quidem fatum sortita est Patauina ista Ciuitas, quod in ea sedem ita locaueris, ut illius pæne, quæ te genuit, oblitus uidearis. nam, quamuis illa artium liberalium studijs, doctissimorumq; hominum concursu clara satis sit: splendoris tamen accipit plurimum ex maximis tuis clarissimisq; uirtutibus. quæ quidem bona sua intellexisse mihi uidetur, cum te non modo libenter acceperit, sed acceptum tanti faciat, ut eorum in numero ducat, in quibus omnino suam niti gloriam fateatur. uerum non isto tantummodo Patauino am-
bitu

bitu tuæ uirtutis fama terminatur, sed ad aures omnium, qui ubiq; terrarum sunt, mortalium etiam manauit; ut non modo, qui præsentibus tua singulari uirtute fruuntur, te ament, atque obseruent, sed etiam longinqui omnes, qui eam animis assidue intuentur, in tui amorem, & obseruantiam alliciantur. non mirum igitur, si nulla adhuc historia tuas laudes prætermisit, si nomen tuum scriptis omnes extulerunt. Ego equidem, cum tuam ipsius animi imaginem egregijs tum Oratorum, tum Poetarum scriptis expressam uidißem, tuam quoque corporis ita uidere cupiebam, ut, nulla modestiæ habita ratione, eam a te petere non dubitauerim. futurum enim pro certo habebam, ut illa cubiculi mei ornamentum existeret, & ego eam sæpius intuens magnam non modo oblectationem caperem, sed etiam ad studium summæ laudis maxime excitarer. nec, quamuis mihi hoc munus denegaueris, in quo tamen modestiam tuam licet agnoscere, de te queri ausus sum, sed ad tuam uoluntatem, quæ apud me plurimi semper erit, totum me contuli, & ceteris in rebus, quas deinceps expeterem, tuam mihi humanitatem non defuturam existimaui. itaque ut in eo, quod nunc a te uelim, mihi satisfacere ne graueris, si rem laudabilem esse, & ad uirtutem augendam, atque ornandam, pertinere intelliges, te etiam atque etiam rogo. nam, cum in tua locupletissima bibliotheca nihil inelegans, nihil

non

non exquisitum locum habeat, cum doctissimos viros contubernales semper habueris, multa quoque præclara scripta te habere, quæ inter manus non ita uersentur, mihi persuadeo. ea igitur, si operam dederis, ut ad me legenda, atque describenda perferantur, quod commodius fiet, si Venetijs Ioanni Paulo Iolito Ferrario humanissimo uiro meo nomine in manû dari iusseris, gratissimum mihi feceris. me mirum desiderium tenet illius Lucretianæ interpretationis, de qua Paullus Manutius in ea ad te scripta epistola mentionem facit; incredibile autem elegantissimorum scriptorum Nicasij Casletani, Andreae Patricij, horumq; similium uiro-
rum, id est litterarum elegantia excellentium. cum uero pauca quedam de ijs rebus a te petam, quibus ita abundas, ut, quantum uis alijs impertias, earum tibi copia semper sit maxima, quasq; omnibus ita libenter communicas, ut his ipsis plus alijs, quam tibi diues esse uidearis, cur facile me impetraturum non sperem? sed huius epistolæ non solum ea causa est, ut scripta, si quæ habes eorum, qui philosophiam cum eloquentia coniunxerunt, quibus conuictu tuo frui, & contubernio licuit, ea te rogarem, mihi ut impertires; sed etiam hæc iustior, ut quo te studio colam, quam te uehementer obseruem, tibi denuo significarem. hoc mihi propositum est, hoc unum scilicet maxime specto. ut enim, quod nunc a te peto, minime impetrem; satis tamen lucri fecisse

fecisse existimabo, quod me indignum non iudicaueris, qui in tuorum numero locum obtineam. Vale. Genua. CIO. IO. XCVI.

ROBERTO TITIO.

Florentiam.

DE tuo statu superioribus diebus ex Vincentio Alzario quasiui, & ex eo te summo uitae discrimine egrotasse intellexi. maximum ex hac re dolorem suscepi, quem tamen incredibilis letitia statim consecuta est, quod ex eodem ipso paullo post valetudinem te recuperasse cognoui. hoc verissimum esse, mi Roberte, ex ipsa mea erga te beneuolentia conijcere potes; de qua quidem si te dubitare mihi persuaderem, omnium, quotquot viuunt, mortalium miserrimus essem. Ego equidem te amo, & ut debeo, usque dum viuam, amabo, cum omnium nemo merito magis, quam tu, ametur: nec mirum, cum te uno omnium nemo amabilior sit, nec mihi omnes omnium diuitiae, & opes tantie essent, ut amicitiam tuam contemnerem. nec si me natura multis ingenio, atque doctrina inferiorem finxit, continuo in amicitijs colendis inconstantior finxit. in hoc equidem peccaui, quod rarius ad te scripserim, cum occupatio nulla debuerit esse tanta, quae me

L

retar-

retardaret, quo minus istam officij partem etiam præstarem. hoc sane nomine magnam sollicitudinem sustineo; ac tantum abest, ut meam culpam excussem, ut etiam te rogem, ut illi ignoscas. quod si in me durior esse volueris, quas cumque pœnas mihi impones, eas libenter sufferam, nec subire recusabo. Sed caue, ne ex silentio meo tui me oblitum esse suspiceris. An ego illius obliuiscar, a quo uno tot in me sunt profecta officia? quem unum ex omnibus colo, atque observo? nunquam faciam. Velim scire ex te, quod opus in manibus nunc habeas. nam cum apud te pluris nihil sit, quam ut litterarum studiosis consulas, haud quiescere potes, sed semper aliquid ex ingenio promis, tibi quod laudem, alijs fructum ferat. nec, ut vere dicam, aliter facere debes. nam, cum ijs scriptis, quæ adhuc in publicum protulisti, plurima obscura loca in antiquis scriptoribus illustraveris, cumq; multa nostrorum hominum errata patefeceris, in eorum nobis fidem quasi obstrinxisti, te de hominibus bene merendi consuetudinem nunquã dimissurum. Gabrielem Chiabreram poetam egregium istuc venisse, & vos una esse intelligo. O dulcem congressum. cur mihi vestro aspectu, vestroq; alloquio frui non datur? cum una me hercule ambulatiuncula, atque uno sermone nostro magni Ferdinandi Ducis vestri thesauros non contulerim. salutem ei plurimam meis verbis, si nondum
istinc

istinc discessit. redeo ad illud, quod initium epistolæ fuit, quodq; maxime ad communem utilitatem interesse arbitror. maximas Deo Opt. Max. gratias ago, quod tuam tibi pristinam restituerit sanitatem; atque eundem precor, ut tibi concedat, ut ad summam senectutem optima valetudine viuas. Vale. Genua. Kal. Lun. CIO. IO. XCVI.

IO. NICOLAO SAVLIO CARREGÆ
ROBERTVS TITIVS. S. D.

CONVALVI non ita pridem e graui sane morbo, ac valde periculoso, quo multos dies maxima cum molestia sum conflictatus: nunc vero mirifice lator non tam ob recuperatam valetudinem, quam ob elegantissimas tuas litteras amoris, atque officij plenas, quibus fortasse caruissem, nisi illa scribendi occasio tibi fuisset oblata. Alzario autē nostro plurimum equidē me debere profiteor, propterea quod tibi auctor fuit, ut me tam solida voluptate cumulares. nam, per Deū, quid potuit mihi hoc tempore iucundius accidere, quā tui, hoc est iuuenis nobilissimi, atque eruditissimi erga me amoris, ac benevolentie tam insignis testificatio? ne viuam, mi Sauli, nisi magnum quiddam, atq; adeo maximum mihi adeptus fuisset videor, propterea quod intellexi mei memoriam tibi non excidisse, immo

L 2 . vero

Vero adhuc eo loco esse, quo ego maxime velim. nam
 cū ipse nullos in liberalioribus studijs progressus, aut cer-
 te perquam exiguos me fecisse sentiam, probe intelligo
 aliunde me famam aliquam assequi non posse, quam a
 te, tuiq; similibus, quibus vel de nomine tantum in-
 notuisse plurimum ornamenti, ac laudis in omne tem-
 pus mihi asferre potest. itaque stultus omnino sim, nisi
 amicitiam tuam plurimi faciam, eamq; omni cura,
 & diligentia colere porro enitar. quamquam in eo ma-
 le prorsus mecum agitur, quod nulla ratione fieri posse
 video, ut mea opera, ac studium alicui tibi vsui esse
 queat: verum tamen, quod vnum licet, cumulatiſsi-
 me præstabo. te igitur summo in honore semper habeo;
 atque, ut virtus tua, insignisq; eruditio postulat, su-
 spiciam, & admirabor: nec mihi vnumquam quidquam
 magis in votis erit, quam ut possim aliquando non-
 nullam grati animi significationem tibi præbere. id
 autem faciam tum mea sponte, tum abs te admonitus,
 si quid vnumquam acciderit, in quo tibi deservire possim.
 Quod vero scire cupis meorum studiorum rationem, &
 quid nunc potissimum in eo genere elaborem; facile ex-
 plicauerim, si dixero, me prorsus languere, ac nihil egre-
 gij iam amplius cogitare: adeo varijs occupationibus di-
 stineor, quæ me ab incæpto cursu non modo remorantur,
 sed prorsus etiam reuocant. Voluntate igitur potius,
 quam re ipsa aliquid præstare conor; atque Aristotelis.

Pro-

Problemata mihi interpretanda sumpsi, quorum iam bonam partem absolui, suadente in primis Hieronymo Mercuriale, qui, si non plus amori, quam veritati tribuit, laborem meum non usquequaque improbat, ac, ut in eo pergam, vehementer hortatur. iam vero commentarios de soluendis amoribus penitus absolui, sic quidem, ut in publicum prodire possint: sed prius res tota iterum communicanda est cum Mercuriale, a cuius ego iudicio, ut par est, totus pendeo. en habes, quod cupis. Chiabrerae praesentia non sine maxima mea voluptate aliquandiu fruor, utinam te quoque eodem pacto uidere, & complecti possim. is homo est omnium, quos umquam nouerim, eruditissimus, atque in pangendo etrusco carmine aequales paucos, superiorem certe habet neminem; immo vero, si quid iudico, is unus hodie regnat, atque omnibus palmam eripit. addo ipsius suauissimos mores, & in amicitijs colendis egregium studium, quibus virtutibus omnium animos ad se amandum facile pertraxit: me vero ita deuinxit, ut nulla umquam temporis longinquitas, nulla locorum intercapedo tanta esse possit, quae me ab eius amore abstrahat. tu ab eo plurimum saluebis, ita enim, ut adscriberem, ipse mihi iussit, dum hic uterque in mea bibliotheca suum negotium peragit. sed & ego quoque plurima te salute impertio, & ut me amare pergas, etiam atque etiam rogo. Floren. v. Id. Iunij. CIO. IO. XCVI.

H A-

HABES cum his Chiabrerae binas literas, una ad te ipsum, ad Salinerium alteras. tibi significo, eum (Chiabreram intelligo) apud nos futurum usque ad festum Diui Ioannis, quod est huius Urbis numen tutelare. per eos dies plura spectacula celebrantur. his Chiabreram interesse volumus amici eius omnes, nec ante eum diem ipsum hinc discedere permittemus: itaque si rescribere vobis libuerit, poteritis huc epistolas dirigere. nostin? Iterum Vale.

MVLTVM REVER. P. FRATRI
CONSTANTINO MONTOBIO

CARMELITAE,

Romam.

CVM de perhonorifico munere nuper tibi delato, ut Reuerendissimi Generalis tui arcanis praesses, quam voluptatem maximam ceperunt, eam tibi omnes ostendant; ego quoque, qui in te amando nemini concedo, hoc officium praetermittere nolui. Equidem libentius praesens praesenti tibi gratulatus essem, ut letitiam meam ex dignitate tua susceptam non minus voce, quam oculis, & vultu tibi indicarem; sed cum id non licuerit propter tuam pæne improvissam profectiorem, certe quod proximum est, libenter praestabo, ut eam tibi
litteris

litteris declarẽ. quam quidem præcipuam esse velim
existimes. siquidem alij tibi gratulantur, quod te hoc
honore affectum tantummodo considerant, præterea ni-
hil; ego vero, quod fore confido, ut is tuæ gloriæ prin-
cipium sit, ac. ut eam ipsam dignitatem maiores di-
gnitates subsequantur. quamobrem hoc. Generalis tui
de te iudicium non possum quin. maxime. probem, qui
cum diligenter caueat, ne Religio vestra rectis institu-
tis fundata prauis moribus euertatur, te præcipue sibi
voluit esse a secretis, ut laborum socius secum adsis,
ut de maximis rebus una tecum consilium capere pos-
sit. cuius sane iudicio, non dubitamus futurum, quin
egregie respondeas, & eam, quam de te apud homines
expectationem concitasti, sustineas, ac tuearis. nam,
quantum consilio, ac iudicio excellas; quantum pru-
dentia, ac rerum gerendarum. usu. valeas, sæpe per-
speximus; quantam vero theologiæ, ac philosophiæ co-
gnitionem consecutus sis, id maxime in circulis, ac do-
ctissimorum virorum coronis, cum celeberrimæ dispu-
tationes haberentur, cognitum est. in quibus sane di-
ssputationibus tuas partes acerrime tuens tam. Dehe-
menter præliabaris, ut in te summus amor laudis,
summaq; victoriæ cupiditas cerneretur. en habes, cur
gaudeas, vehementerq; Leteris, cum ex laboribus tuis
nunc satis iam uberes fructus percipias, uberiores ta-
men in dies percepturus. Sed nolo esse longior. illud ta-
men.



men te rogo, ne me amare desinas. Vereor enim, ne illud fortasse axioma inducas, ideo quia, dum hic eras, ad te rarius adierim, necessario sequi, ut te non amem. quod si facis, pace tua dixerim, recte non inducis. ad te enim crebrius uisendi causa non ueni; primum, quod, ut scis, Collegium uestrum deuium est, ut illud petentibus non ita facile occurrat; deinde quod per occupationes mihi non licuit. quamobrem hoc tibi penitus persuade te a me & amari, & summa obseruantia colifiquas tua causa res prestare possum, eas tibi polliceri, ac deferre, cum in tua sint potestate, & ijs, æque ac tuis uti, uel abuti etiam possis, superuacaneum esse existimo. Vale. Genua v. Kal. Iulij. CIO. ID. XCVI.

FABIO BELLONIO,

Ticinum.

VINCENTIVS Alzarius superioribus diebus, cum inter nos sermo esset ortus de ijs hominibus, qui hac nostra ætate doctrina excellunt, ac bene de litteris meriti sunt, multos quidem commemorauit, qui suum nomen utraque laude illustrant; sed te præcipue ita laudibus extulit, ut, quæ singule uirtutes in illis prædicantur, eas in te omnes simul esse fateretur. illius sane oratio tantam uim habuit (ut omittam, quod hoc habet

bet virtus in se, sicubi eam esse audimus, statim de-
amemus, ac imitari cupiamus) ut me ad te aman-
dum non inuitauerit solum, sed etiam pene coegerit.
at qui fieri potest, ut quis tuas virtutes prædicari au-
diens, etiam si ei, te ut viderit, nunquã contigerit, non
incredibili tui amore, ac desiderio ardeat? haud ita
difficile est aliquem prouectiore ætate existere, qui
vnam, aut alteram scientiam optime calleat: hoc qui-
dem mirandum est, quomodo in primis adolescentiæ an-
nis tantam ipse omnium liberalium doctrinarum co-
gnitionem acquirere potueris. accedit illud, quod cum
maxima barbaries in bonas litteras irrepserit ex eorum
scriptis, qui politiozem doctrinam contemnunt; tu his
temporibus eas ipsas suam in veterem elegantiam re-
stituere conaris, ut qui cultioribus studiis dediti sunt,
te profecto non modo, qui ab omnibus ameris, verum
qui etiam summis laudibus orneris, dignum existi-
ment. en habes, cur & vehementer, & perpetuo gau-
deas, cum ea iam consecutus sis, natura dono, an stu-
dio, atque industria? quæ dix alij, cum multum desu-
dauerint, & totam in litteris ætatem consumpserint,
consequuntur; ut, quando adolescens nunc tantus es,
adultæ ætate qualis futurus sis, conijcere possimus.
quocirca huic Nobilissimo Gymnasio in eo consultum
esse egregie existimo, quod tu præcipue electus es, qui
de loco superiore iuris civilis scientiam interpreteris, &

M

sing.

singularem industriam tuam omnibus probes. quo quidem in munere perfecti interpretis personam ita sustinere te audio, ut singulari in eo, maximeque propria laude dignum te præbas, simulque ostendas, non magis te ab hoc amplissimo loco splendorem accipere, quam ei redere. hinc mirum non est domum tuam a doctissimis viris frequentari, qui etsi te difficiles iuris nodos soluentem publice audiunt, tuis tamen sermonibus privatum, & proprie frui volunt. neque vero in litteris ita versaris, ut quemadmodum iis, qui nunc vivunt, voce satisfacis, non posteris quoque scriptis satisfacere velis; sed utrumque egregie amplecteris, & ocium illud, quod a publico legendi munere tibi conceditur, totum in scribendo consumis. ea vero, quæ adhuc scripsisti, Alzarius noster ita probat, ut summis laudibus efferrat, digna existimans, quæ in manibus omnium versentur. meas vero in manus cum nondum pervenerint, tanta mihi eorum scriptorum avido, quæ politioem doctrinam contineant, legendi cupido incescit, ut non prius quieturus sim, quam ipsorum mihi copia fiat. perge adolescens publice prodesse. nullus labor præclarior existimandus est, quam qui pro communi utilitate suscipitur; nec quicquam præstantius, quam de hominibus bene mereri. Laboribus vero tuis ipsam immortalitatis gloriam premio futuram sperare debes. quod extremum restat, quidquid valeo, tibi polliceor, ac defero:

defero: in ijs enim rebus, quas ad te pertinere intelligam, aut re ipsa, si potero, aut aliqua saltem amoris, gratiq; animi significatione tibi satisfacere conabor. Vale. Genua. Oct. Kal. Sept. CIO. ID. XCVI.

FABIVS BELLONIVS S. D.
IOANNI NICOLAO SAVLIO
CARREGÆ.

CVM litteris tuis, humanitate, & studio plenissimis, tandem respondiſsem: accepi a te alteras Ticino allatas, eodem plane non solum argumento, verum etiam exemplo. ex quibus cognoui, nihilo citius meas tibi redditas fuisse, quam tuas mihi. neque enim libet coniectare meas intercidisse; tametsi, quo tempore tu posteriores scripsisti, eæ iam ad te peruenisse debuerant: si tamen perierunt, obsecro, fac id ut quamprimum sciam: siquidem illarum iacturam exiguus exscribendi labor sarciet; ut neque tu durius quidpiam de me suspicere, neque ipse doleam, quæ maxime cupio, nimirum tibi obsequi, & omni officiorum genere respondere, his me non mea, sed aliena culpa frustrari. Bartholomeum Mainierium, cum maiorum suorum nobilitate, tum sua ipsius eruditione, morumq; elegantia perquam illustrem Virum, qui nominis, & virtutum suarum fama, & claritate vel exteros, & pro-

92 IO. NICOLAI SAVLII CARREGÆ

cul remotos homines ad se amandum, & colendum allicit, impellit, trahit, non dubito, quin tu probe noris, immo amicitia, & necessitudine tibi coniunctum habeas. ei si multam salutem a me nunciabis, ac meo nomine gratias ages, quod me diligat ignotum, & faciat non parui, cuius rei haud ita pridem mihi fidem fecit Philippus Masinus I. C. præstantissimus: magnam a me inibis gratiam, & ille non iniucundam ducet hanc meæ erga se benevolentia, & observantia significationem. Vale. E Foro Fulvii. VII. Kal. Nouemb. GID. ID. XCVI.

FABIVS BELLONIVS S. D.
IOANNI NICOLAO SAVLIO
CARREGÆ.

FICIT me certiolem Vincentius Alzarius priores meas ad te litteras, quarum in alteris VII. Kal. Nouembris datis mentionem faciebam, tibi redditas non fuisse: quamobrem earum exemplum nunc ad te mitto, non quod ego mea tanti facere consueuerim, sed, ut tu me officio meo, quod antea fortasse requisuisti, plane non defuisse intelligas; neque te subtrahas huic palestre, ad quam ipse me pronocasti. Ad vnastuas habes ianternas meas. Vale. Ticini, Non. Decemb.

F A-

FABIUS BELLONIUS S. D.

IOANNI NICOLAO SAVLIO

CARREGAE.

ET serius accepi epistolam tuam, & eo tempore accepi, quo animo eram a scribendo maxime alieno, ut pote publicis occupationibus, ijsq; molestissimis, ut numquam antea, oppresso, debilitato, ac, pæne dicam, fracto: iamq; Forofuluianos meos reuifere cogitabam, ita ut, quæ ad scribendum in primis necessaria est tranquillitas mentis, & corporis, utraque me destitutum viderem. Et quamquam motus ille, & agitatio nondum resedit, quin immo mihi cursandum est modo in hoc, modo in illud opidum: tamen ut officium, quod a me tibi iamdiu deberi fateor, & vero etiam profiteor, tandem aliquando præstem, mitto ad te, quidquid hoc est, quod inter equitandum meditatús exaravi. Qua in re valde vereor, ne Alzarij erga me amor, ortus ille quidem ex morum nostrorum similitudine, & ingeniorum facilitate, sed tamen παραλαίτωση & mea omnia longe maioris faciens, quam debeat, mihi, & tibi, atque ipsi fraudi sit. Nam ubi ego expectationi, & opinioni de me vestræ respondere nequeam: & illud, quod nimis honorifice de me prædicaritur, & te pudebit, quod ei, atque adeo amicitie ple-

pleraque tribuenti, plus fidei adhibueris, quam par erat; me autem pigebit magnis laudibus a vobis elatum, & summis viris adscriptum, mox quasi de gradu deici. Ita enim mecum agitis, ita me compellatis, ita excipitis, ac si cum Alciao quopiam, vel Corasio, vel Cuiacio vobis res esset; ea mihi tribuitis præconia, quibus si me dignum aliquando fore considerem, ipse iam serio triumpharem, & vos nacti essetis virum, qualem animo concipere, verbis describere, querere, haud sane difficile sit; inuenire autem longe difficillimum, ut ne inueniri posse inficias eam. Et posthac audebitis me talem, ac tantum ducere, & subinde adolescentem dicere? quasi vero illa in adolescentem cadant, quæ humanum ingenium vix, ac ne vix quidem longissimo tempore assequi posse, quotidie querimur. At narro tibi, mi Sauli, pridem mihi canos, tametsi intempestiuos, utrumque tempus occupasse: ut mirum non sit, si hi multo pallore, & macie coniuncti non nihil auctoritatis mihi apud vulgus attulerunt. Neque tamen negarim me sic satis acri natum ingenio, multorum annorum spatio, labore, diligentia, industria aliquod doctrinæ adiumentum comparasse: Verum ut deum me a carceribus cursum non male instituisse, quantum mihi restat ad metam? a qua tam procul absum, quantum me prope accessisse autumas. Proinde cum nunc nuper Nouas diuertissem ad amicum,

cum, & inde Genuam cogitarem, ut te, Mainerium, Alzarium, aliosq; præclaros viros viserem, quibus cum ego fere tam libenter vixerim, quam cum Tullijs, Hortensijs, Mæcenatibus: hæc una caussa fregit consilium meum, quod animaduverterim virgini deformi non captandâ esse lucem, non optanda theatra; quamq; vos de me spem concepistis, eam me nec augere, nec sustinere posse: Verum potius meam, simulq; vestram estimationem in discrimen adductum iri. quamquam non ignoro, uos, quæ estis prudentia, æquitate, urbanitate, etiam si me hominem esse longe infra famam comperissetis, sedulo fuisse dissimulatuos. Ad epistolam tuam sigillatim respondere, & grauitatis tuæ, & pudoris mei ratio me prohibet. Illud nequaquam prætermiserim, non dubitare me, quin tantam istam, quæ te teneri ais, scriptorum meorum cupiditatem his nugis expleuerim: siquidem fieri solet, ut uel ipsi librorum belluones, si in aliquem scriptorem ineptum inciderint, ne unam quidem, & alteram paginam legere sustineant: quemadmodum vehementem sitim exiguus aquæ turbidæ, & limosæ haustus uidetur extinguere. Vale, & me amare perge, quando ego te, sicuti debeo, facio plurimi; nec quidquam tam arduum esse puto, quod non tua, tuiq; similitum caussa velim. E Fero Fuluij. v. Kal. Octob.

LEAN-

LEANDRO INVREÆ,
SILVESTRI FILIO,
Rusticanti.

NÆ tu recte, & sapienter facis, Leander mihi carissime, qui, dum hic nos huiusmodi calores perferimus, ut ijs mundus incendi videatur, Urbe relicta, ruri te oblectas, vitalibusq; auris te recreas. Sed ut calores omittamus; quid, quæso, hic habemus, quod nos delectare possit? Civitas in maximis rei frumentariæ angustijs versatur, & eam antea satis pulchram, nunc caritate annonæ pæne deformatam non sine magna commiseratione aspiciamus: quamquam humanas calamitates magis ipse deplorem, quam quod id hisce hominum moribus accidere mirer. addo etiam, quod multos ferre non possum, qui mihi ante oculos obversantur, quiq; magis auri, quam virtutis splendore capti, nihil præter divitias sibi curandum esse existimant. Sed, dum procul a me vivis, vereor, ne te mei capiat obliivio. quam causam habes, fortasse inquires, cur ita dubites? nimirum hanc; quod usu fere venire video; ut res prope stantes amemus, procul remotas obliuiscamur; quodq; nulla adhuc munuscula ad me misisti, qualia tibi istic ruri nascuntur. an esse dicat quisquam te verum amicum? quid est, quæso, amicitiam contem-
nere,

nere, si hoc non est? neque ea te excusatione tueri potes, quod ad fructuum copiam, & bonitatem attinet, cum istis villulis ita male actum esse, ut amicos nullo modo munerari possitis: cum illud contra tu non ignores, & me tantum querere, quantum satis sit modica mense, & amicorum munera non ex copia, aut bonitate, sed ex animo spectare solitum esse. quamobrem non est, cur ita te excuses; & causam probabilem, quam afferas, nullam habes. Vides ne me per litteras tecum iocari? liceat mihi per humanitatem tuam; alioquin verus amor munera non desiderat. quid? cum propter virtutem, supra quam dici possit, te diligam, propter munera qui te magis diligere possem? satis superque habebo, si me tui amantissimum redames, atque me tuo semper amore dignum existimes. hi enim paullo dulciores sunt fructus, quam qui ex villula ista tua percipiuntur. quid agas, & quomodo exercitationibus tuis utaris, scire velim: ijs enim valetudinem ipsam non modo confirmari, sed etiam conseruari quis ignorat? sed inter omnes exercitationes eas magnopere commendari, in quibus corporis motum animi consequitur oblectatio, te fugere non arbitror. Ex quo quidem numero venationem illam esse videmus, quæ dispositis retibus, & viscatis ramis, quibus incautæ aues decipiantur, perficitur: si quidem, dum ex volucribus alias inuolutas, atque impeditas, alias alis, pedibusque im-

N plicatas

plicatas vides; dum eas huc, & illuc cursans manibus prehendere pergis, & corpus remissiori motu exercetur, & animus incredibili pascitur voluptate. Librum illum tuum de tuenda valetudine, quo non modo tibi, sed amicis etiam tuis consulere soles, ut in manibus semper habeas, atque frequenter, accurateq; legas, se etiam, atque etiam rogo. quid? oblitum ne me putas illius temporis, cum apud Bartholomæum, & Antonium Borzonios fratres, modestissimos adolescentes, una cum Ioanne Thoma Iustiniano viro non minus sua virtute, quam Familiæ dignitate claro, in eorum Galbiana villa diuersabamur? quæ consilia tunc nobis dedisti ad offensiones in cibis dijudicandas, quam Utilia, quam salutaria? hoc vnum non tacebo, quod, eum ea die coagulatum hac initio mensæ positum liberius comedere vellemus; id prius nos facere prohibuisti, quam nonnulla menthæ folia, quæ perferri iusseras, sumeremus. O medicum singularem. Sinibaldus Ferrarius noster in eo suburbano, qui ab arena nomen accepit, cum nobilissimis Grimaldis adolescentibus rusticatur. quid agat, nescio; sed eum nunc uxorem habentem liberis magis, quam libris operam dare existimo. Ioannis Baptistæ Scenaregæ Iurisconsultorū peritissimi Orationem remitto; eam libenter legi, mirifice placuit; ordinis vero præstantiam maxime sum admiratus. quod scribam, noui nihil habeo, nisi fortasse cum hortorum custode

stodemale actum esse me scribere velis. sed futurum non dubito, quin, quemadmodum ipse ab asello illo, qui amores suos intempestiuo clamore interpellauit, pœnas olim sumpsit, sic ab ijs, qui nunc egregias suas virtutes, atque præclara facta ex hominum memoria delere conantur, grauissimas pœnas sumat. Sed hæc fortasse non assequeris. fac, ut valeas, & nos aliquando inuisas. nam quamuis tuum mihi spectrum semper in animo versetur, quo quidem, dum a me abes, nihil mihi iucundius accidere solet: maiore tamen voluptate afficior, cum una sumus, cumq; non solum ex oratione, sed ex vultu, & oculis, qui indices animi sunt, alter alterius erga se amorem perspicere potest. Vale. Genua. Pridie Id. Sept. CIO. IO. XCVI.

IO. PAVLLO IOLITO FERRARIO,
GABRIELIS FILIO,

Venetias.

QVOD multorum inconstantiam expertus eram, Ioannes Paulle vir humanissime hanc animo conceperam opinionem, ut existimarem nullum esse amicum tam fidelem, cui omnes animi sensus aperire possis; neque amicitiam vllam ita diuturna consuetudine confirmatam, quæ non aliqua tandem offensione infirmetur.

N 2

metur.

metur. Sed postea quam tecum amicitiam constitui, quanto in errore versatus fuerim, cognoui, & illud me fefellisse animaduerti, quod ex priuatis eorum exemplis vniuerse, ac generatim ceteros omnes metiebar. nam omnia, quæ ad amorem conciliandum apta sunt, ita perfecte in te reperiuntur, ut me tibi haud mediocriter deuinctum fatear, mihiq; gratuler, quod cum certe amicum nunc habeam, qualem maxime optabam: eoq; magis, quod nostrum vterque ita vicissim, & amat, & amatur, ut par amicorum arctioribus vinculis adstrictum nullum sit, amicitiamq; nostram diuturnam, ac stabilem futuram animaduertam. Equidem, quod paternæ virtutis non immemor Patris similiorem in dies te præbeas, quamquam sane gaudeam, minime tamen miror. ea enim sententia vera semper est habita, ex bonis bonos oriri, & ex optimis plantis optimos percipi fructus. quis enim recentiorum scriptorum non loquitur, quibus moribus, qua probitate Gabriel Pater tuus fuerit præditus? quem illi in domo administranda, domesticisq; institutis seruandis anteponeamus? huc ut bonus Paterfamilias omnes curas, cogitationesq; contulerat, ut liberi sui, domesticiq; omnes probitatis fama florerent; prodesse omnibus; nulli obessent; nihil dicerent, facerentue, quod non ad vnius Dei gloriam, hominumq; utilitatem posset referri; ut ex vestra tam recte constituta domo ad alias

alias domos, modestiæ, & tranquillitatis exempla deducantur. ad quam quidem utilitatem totus conuersus, cum multa tum antiquorum, tum nostrorum hominum scripta in mendis, & sordibus obscura iacerent, tanquam e tenebris ea educens, præclaris typis, & ornamentis ita illustrauit, ut legentium oculis nihil clarius esse possit, ipse vero ceterorum omnium quasi luminibus obstruxisse videatur. litteratos homines quis nescit ab eo humaniter semper exceptos, liberaliterq; tractatos fuisse? Ut mirum non sit eorum ita obtinuisse beneuolentiam, ut nullus ex his fuerit, qui non cum istam Ciuitatem uidere uehementer cuperet, tum uel in primis Gabrielis Ioliti Ferrarij uidendi, & alloquendi desiderio arderet: Ut merito, quemadmodum ille doctissimis uiris gratissimus uixerit, ita nunc ab eis præclaris ingenij monumentis celebretur. Illius per uestigia ad summam laudem peruenit Ioannes frater tuus, & relictam sibi ab eo gloriam haud parua accessione cumulauit; qui quam ijs artibus fuerit ornatus, quæ libero uiro dignissimæ sunt, præclara illius scripta inditio esse possunt. Sed de illo parcius loquor, quod vereor, ne vulnus illud refricem, quod ex illius interitu accepisti, quodq; nescio an ulla temporis medicina sanatura sit unquam. nam cum paucis ab hinc annis ad eum scripsissem (nondum enim uita excessisse cognoueram) & tuas in manus litteræ peruenis-

sent;

sent; recordatio illa, tanquam quædam retractatio dolore tuum ita auxit, ut lachrymas haud continere potueris. te igitur ex tali Patre natum summæ vitæ integritati summam humanitatem coniunxisse; ab ijs rebus abhorre, quibus sæpe pernicies comparatur, eas autem amplecti, ex quibus vera gloria nasci potest, quis miretur? taceo quod in ijs litteris, quas ad me quotidie mittis, quæq; diligenti quadam negligentia scriptæ quo magis artem dissimulant, eo magis artificiosæ mihi videntur, Fratris doctrinam non minus referas, quam in Vita Patris mores, disciplinamq; referre soleas. quis in amicitijs tuendis diligentior? quis in amicis adiuvandis promptior, atque alacrior? multa prætereo, quæ mea causa studiosè fecisti: unum illud non præteribo; quod, cum tibi negotium dederim, ut multos libros, qui in officinis non exstant, sicubi eos latere inaudires, statim erueres, & ad me quam primum perferendos curares; illud tam diligenter agis, ut nihil prætermittas, quo satis in hoc genere desiderio meo fiat. nec illud etiam omitto, quod ex multis libris adhuc mihi a te missis eos mihi semper dono dederis, qui typis vestris exierint impressi. Sed non faciam, ut omnia nunc de te dicam, quæ vere dicere possem, tum quia ea non est hic commemorandi locus, tum quod vereor, ne ipsi tibi molestus sim, qui conscientia ipsa contentus humanis laudibus celebrari haud facile pateris. tuis ve-

ro erga me officijs, atque Studijs equidem letor, sed ita,
 ut in magna simul molestia verſer, quod, cū tu in meis
 rebus nihil vnquam aggreſſus ſis, quod non perfeceris,
 ego contra idem raro ſim conſecutus in tuis, Vereor, niſi
 voluntate ipſa contentus ſis, ac eam ſatis eſſe putes, ne
 tibi videar eſſe ingrātus. non merito igitur te amo tot
 ſuauiſſimis ingenij præditum? non iure igitur de tuo
 amore, tuaq; mihi amicitia gratulor? Equidem liben-
 ter id facio, faciamq;, dum viuam; & ut præſentes
 non modo, ſed poſteri etiam, & te mihi fuiſſe amicū,
 & me tibi, omnes intelligant, operam dabo. Vale. Ge-
 nua. II II. Idus Nouemb. CIO. IO. XCVI.

L A V R E N T I O F A B R O.

Lucam.

PROFECTO quanto magis tuam hinc proſectio-
 nem conſidero, tanto maius ex ea Ciuitas noſtra in-
 commodum cepiſſe mihi videtur. ex tua enim conſue-
 tudine maximam iucunditatem, vberriſſimos vero fru-
 ctus ex induſtria percipiebamus: tuaq; nos ita allicie-
 bat morum elegantia, ut ſæpiſſime tecum eſſe optare-
 mus; tuoq; nos ita commouebas exemplo, ut te in opti-
 marum artium via pergentem alacriter ſequeremur.
 nunc vero, te abſente, omnino iacemus; ac tantum
 abeſt;

abest, ut eo peruenire possimus, quo te praeunte adspirabamus, ut in medio cursu nos vires deficiant, omnisq; nostra tanquam in salebra hereat induritia. quod cum plane intelligamus, si tu nostra fortasse non libenter, nos tua certe inuiti consuetudine caremus; doloremq; illum, quem ex tuo discessu suscipimus, nulla aliare, quam spe tui ad nos reditus, leuatum iri arbitramur. omnes fere dies, cum hic eras, domi te conueniebamus: erat illa quidem parua, atque angusta domus, sed eleganti suppellectili ornata, doctissimisq; viris semper referta. hic de litteris, aut de rebus ad litteras pertinentibus loquebamur, & suauis quadam diffensione veritatem in occulto latentem inquirebamus. cum vero Torquatus Tassius Poeta haud paullo melior, quam ceteri omnes, nobis in delitijs, & amoribus esset, dum te egregium illius Poema legentem audiebamus, quanto pulchrius id nobis videbatur? ut illud animaduverteremus, praeclara hominum scripta, haud parui referre, quo uocis sono, quaq; pronuntiatione legantur. hos congressus maximæ consequebantur utilitates; sed ille mihi cum multis erant communes; aliæ erant meæ præcipuæ. quoties tuam in me fidem, beneuolentiam, ac constantiam sum expertus? memoria teneo, cum meam quandam elucubrationem hic imprimi cuperem, te mihi in ea re maximo fuisse adiumento, ac negocium illud tibi curæ fuisse, æque at
si tuum

*si tuum fuisset negocium. quoties obrectatorum meo-
rum impetus, tanquam saxo fluctus, tua auctoritate
fracti sunt? quid? non ne maximum a te habeo bene-
ficium, quod te auctore Gabrielis Chiabrera Poetae
summi amicitiam sum consecutus? Sed nolo nunc om-
nia enumerando persequi, quæ mea causa libenter fe-
cisti. alius dabitur fortasse commemorandi locus. ea
enim ex animo nunquam exciderunt, sed ita hærent,
ut ipse mihi pene succenseam, quod, quæ mea imbe-
cillitas est, pro tantis acceptis beneficijs, nullam adhuc
tibi gratiam referre potuerim. quod si talis facultas
in me esset ad referendam gratiam, qualis ad haben-
dam animus est; næ tu me magis, cum alios remunera-
rer, quam, cum beneficium acciperem, letari videres.
Ere ipsa potius, quam verbis me gratum esse cognos-
ceres. Vides, mi Laurenti, te absente, iacturæ pluri-
mum nunc factum esse in studijs nostris. id aliqua ex
parte resarcies, si ad nos sæpe scribes, & si quid pa-
riet ingenium tuum, etiam mittes. Itaque cum in Col-
lodiana Villa summo fruaris ocio, maioremq; dici par-
tem legendo, aut scribendo traducas, ut operam dare
velis, ne, si dulcissimis sermonibus tuis caremus, tuis
quoque suauissimis litteris, elegantissimisq; scriptis ca-
reamus, te etiam, atque etiam rogamus. Ego equi-
dem si meas litteras ubi non iniucundas accidere co-
gnouero, ad te sæpe scribam: neque verebor, ne mihi
O scribenti*

scribenti sententia desit; amor enim ipse, qui nos sæpe ad scribendum impellit, etiam si, quod scribamus, nihil sit, mihi dabit argumentum ad te litterarum. Nunc vero, si quid novi fortasse scire cupis, hæc accipe. ex eo enim tempore, quo hinc discessisti, huiusmodi insecuta est frugum omnium panuria, rebusq; ad viuendum necessarijs huiusmodi fuere imposita pretia, ut nemo fere sit, quin ubi vis, quam hic, ubi est, viuere malit. Superioribus diebus ad aures nostras acerbissimus, minimeq; a nobis expectatus nuncius allatus est, Hispaniarum Regem, quas Genuensibus pecunias debet, in præsentia soluere nolle. hinc fides ubiq; angustior; ut nullum iam inter negotiatores contrahatur negotium, omnisq; sublata videatur vitæ communio. i. confide opibus, quæ, cum ex fortuna pendean, ad eius arbitrium & amittuntur, & retinentur, & in vnius hominis voluntate, ne dicam libidine, sæpe posita sunt. multi ex Nobilitate nostra Principes Viri de rebus suis solliciti nauim conscenderunt, & in Hispaniam profecti sunt, anni quidem tempore difficillimo, sed omnem molestiam, omnemq; vincet difficultatem haud dubia spes, quam de fortunis recuperandis, susceperunt Regis benignitate confisi. Nihil præterea superest, quod scribam. Vale, & me ama. Genua. VI. Id. Ian. CIO. IO. XCVII.

QVOD

QVOD nunquam euenturum credidissem, id contigit, ut, insciente me, Mediolanum te conferres. magnum ex hac re dolorem accepi. amicitiam enim nostram vel te oblitum esse, vel certe parui fecisse argumentatus sum. quod a te factum esse eo magis miror, quod, cur ita faceres, nihil unquam a me commissum esse intelligo. Illud etiam ad dolorem accedit, quod, cum hanc tuam me. profectiōem celare volueris, profecto aut omnino iudicii expers tibi visus sum, qui de ea nihil iudicare potuerim; aut certe maleuolus, qui, si eam e re tua fore cognossem, illius tibi suasor, & auctor futurus non fuerim. Equidem, quod verum decet amicum, te fecisse non arbitror, & tuam in me beneuolentiam vehementer requiro. Sperabam certe te pro tua virili parte operam daturum, ut non modo de amicitia nostra nihil detraheretur, sed mutuis studijs, atque officijs illa in dies auctior esset. Sed illam nunc spem me sefellisse intelligo; quin etiam ex hoc tuo facto conijcere possum, etsi vere antea me diligere videbaris, totam illam fictam fuisse beneuolentiam. ego vero qua fide, atque constantia amicitiam nostram semper coluerim, testis tute es: nam ut ad amicitias instituendas non temere adducor, sic institutas ita tueor, ut non minus in hoc constantie, quam in illo consilio tribuam. etsi rursus is ego sum, qui nullam tam libenter amicitiam

appetierim, quineam, si opus fuerit, æque libenter recusauerim. Sed ita te fortasse excusabis; quo tempore de discessu cogitabas, te nihil mihi negocijs impedito significare potuisse; ita factum esse, ut discedens satis officio minime feceris. hanc ego excusationem non libenter accipio; ut enim illa probabilis sit, non ea tamen te satis purgatum esse existimo: siquidem debitum amicitiae nostrae officium præsens quod prætermiseras, id absens per litteras præstare debebas. quod si forte alias finxeris causas, ut es ingeniosus, scito multa esse, quæ imperitos homines facile excusant, quæ non item doctos. viros a culpa defendunt. itaque, ut varijs nectendis causis te ab omni reprehensione vindicare velis, unde hoc tamen efficere possis, minime video: ut satius fuerit te erratum tuum libenter agnoscere, quam illud pertinaciter defendere. Verum, noli putare me nunc, cum ad te scribo, eo potissimum nomine id facere, ut tui defendendi, aut excusandi onus suscipias. ego ne, cum in discessu tuo salutationis officium neglexeris; neque postea, Mediolanum ut ueneris, hanc ipsam negligentiam litteris excusaueris; ut nunc, cum minime velim, minimeq; opus sit, te mihi satisfacere cupiam? sed ob hanc causam ad te scribo, ut intelligas, me non ita iudicij expertem fuisse, ut tuæ partes in amicitia quæ essent, non animaduverterim, & cum animaduverterim, non ita maleuolum, ut te eas abijcien-

tem

*rem mōnere noluerim . nam deinceps fortasse pudore
adductus non tam temere ab officio discedes , neq; cum
ceteris amicis ages eodem modo . Vale . Genua . IIII.
Kal. Aprilis . CIO. IO. XCVII.*

CORNELIO ET AVGVSTINO,
SPINVLIS, AC IOANNI
BAPTISTAE MARINO.

QVOD summa inter vos necessitudine iuncti, to-
tōs fere dies una estis, Adolescentes Nobilissimi, quam-
quam sane gaudeo , minime tamen miror . nam , ut
etate fere pares , ita consimilibus moribus pręditi estis ,
ijsdemq; studijs , ac disciplinis maxime dediti . huius-
modi vero amicitia quanto sit iucundior , cum eam mo-
rum similitudo coniugauerit ; eaq; quanto sit firmior ,
cum sola virtute nitatur , quotidie certius intelligitis .
Ac amicitia quidem ad vitam agendam res ita neces-
saria est , ut ea carere nullo modo possimus . quis enim
est , qui sine amicis hanc sibi vitam optabilem ducat ?
habere prosperis rebus amicos , una qui tecum gau-
deant , gaudium auget ; aduersis pariter qui doleant ,
dolorem imminuit . Ut in hac vita nihil magis expeten-
dum , nihil charius , vel iucundius esse posse , quam in
utraque fortuna amicis abundare , omniumq; beneuo-
lentiam tenere , fateamur necesse sit . Ac in multis
quidem

quidem commoditatibus, quas ex amicitia uestra ipse percipitis, illa quidem maxima iudicanda est, quod neque amicorum, neque librorum cedium vos unquam capiat. nam, ubi multas diei horas in libris posuistis, & legendo defessi estis, illico ad amicos confugitis, & reliquā diei partem suauissimo cum illis sermone iucundissime traducitis. sic ex consuetudine quoti diana modo a libris ad amicos, modo ab amicis ad libros traducti, vosq; ipsi in hoc quasi curriculo identidem exercentes, illud consecuti estis, quod amicitia uestra, ut optabilis, & iucunda, ab omnibus expetitur, progressus vero in studijs omnes admirentur. ad quæ quidem studiæcum per ætatem rerum accesserit usus, dubitandum non est, quin Maiorum uestrorum honores, ac dignitates, maioribus dignitatibus, atque honoribus accumulaturi sitis. optime quidem vitam instituistis viam uirtutis ingressi, quæ ad immortalem gloriam ducit, uia uoluptatis neglecta, qua plerique adolescentes se perditum eunt. quod autem in legendo sæpe comitem uobis assumitis Aloysium Laurentium, recte uos quidem, & sapienter facitis. nam cum ipse, quo minus oculis, eo magis & mente, & animo uideat; ea uobis profecto patefaciet, quæ alij, ut hebetes minus clara, alij uero ut cæci prorsus obscura esse existimant: ut, si unus ex uniuerfis eligendus sit, alium acutiore ingenio haud ita facile reperiatis. neque uero reprehendo, immo

immo uehementer laudo, atque probo, quod subcisiuis horis animi caussa uel iocis, fa ceterisq, indulgeatis, uel ijs artibus operam detis, quibus oculi, auresq, tenentur. quæ enim quæ hanc uitam amariorem efficiunt, perferre possemus, nisi ea, amicorum suauitate, dulci otio, uel negotio quasi temperamento aliquo condirentur? est etiam suus in uita requieti locus, in eaq, ipsa requie seria licet ingenuo temperare lusu, inter amicos iucundissimis de rebus differere, sales lepidissimos iacere, familiariterq, iocari. non ne legistis summos illos uiros Africanum, Lælium, aliosq, nobiles Romanos, siquædo a Reipublicæ curis animum relaxare uoluerint, Vrbe relicta, in amœniora loca secessisse, ac ibi paullo laxius, & solutius uixisse? in hoc autē uitæ genere uobis mirifice satisfaciet. quem idcirco uobis socium sæpe adiungitis, ut habeatis, unde sumere possitis ad otium temporis oblectandum. quis in consuetudine facetior? quis suauior, atque iucundior? potest ne quisquam tam seuerus esse, ac tristis, qui non ad hilaritatem a seueritate traducatur, cum illius sermonibus adest? nam cum uix ipse litteris etruscis tinctus sit, ac in ipsa metiendi carminis ratione sæpiissime peccet, tamen summum se Poetam profitetur, ac ceteros omnes ita carpit, ut ne Franciscum Petrarcham quidem, ac Ludouicum Ariostum excipiat; si quidem alterum in multis dormitasse, alterum uero e Poetarum numero exclu-

dendum censet . i nunc tu , & conterito in peruolutan-
dis libris uitam , atque etatem tuam , cum hunc uideas
sine ullo labore optimum multo post homines natos Poe-
tam , atque Oratorem unum exstitisse . profecto dum il-
lius adspēctū , atque sermone frui licebit , maxima
nunquam uobis est defutura uoluptas . itaque , quā-
uis hoc per se mihi dolendum sit , quod propter occupa-
tiones minus saepe , quam uellem , uestra consuetudine
fruar : tamen , pace uestra dixerim , illud multo magis
mihi dolendum est , quod * leporem , facetiasq̃ crebro
regustare haud possim . plura me scribere cupientem oc-
cupationes impediunt : finem scribendi igitur faciam .
at uos amandi , dum ullus in me erit sensus amoris ,
finem nunquam faciam ; ut , quamuis ceteris rebus uo-
bis me inferiorem confitear , ex hoc tamen quasi mutui
amoris certamine , amore superior sim discessurus . amo-
ris uero mei singularis erga uos , uelim ut has litteras ,
tanquam pignus , libenter accipiat . quas quidem in-
ter uos communes idcirco dedi , ne , si singulis singulas
misissē , uos tam arcto amoris uinculo adstrictos litte-
ris meis distinguere , & separare uiderer . Genua . Ex
adib. Kal. Ian. CIO. IO. XCVII.

BALTHASSARI AYROLO,

Scnas.

CVM ex suauissimo, optatissimoq; Ioannis Thomæ Iustiniani nostri aduentu magnam voluptatem perceperim, quod illius consuetudine nunc mihi frui datur, qua carui tot menses: maiorem tamen ex ipsius oratione dolorem me percepisse velim credas, quod ex eo intellexi te sicut antea litteris, ita nunc bellicis artibus operam dare, & in Pannoniam proficiscendi consilium cepisse. Versantur mihi ante oculos optima Mater tua, optimiq; Fratres, quos tu afflictos in maxima sollicitudine, atque animi mœrore relinquis. qui cum antea magnopere dolerent, quod a se tandiu abesses, nunc lacrymare coguntur, quod diutius sis absfuturus, quodq; cum se vnum haberent vnicum in domesticis malis solatium, id vnum se perdidisse nunc videant. Nos vero, qui tua maxime delectabamur iucunda consuetudine, ita macerat, atque conficit discessus iste tuus, vt vitæ nos prope ipsius odium capiat. Ergo omnem humanitatis sensum ita exuisti, vt longe a nobis discedere, longe a nobis viuere velis? tu ne, qui nobis ipsa pene vita charior es, versaberis inter Scythas, ceterasq; barbaras gentes aperto cum vitæ discrimine? hoc vnum mihi restabat pluribus malis oppresso

P

presso

presso, ut ex amicis alij vita excederent, alij viverent patria procul. in qua quidem, cum nobili loco natus sis, cumq; illius rei tanta sit vis, ut ille apud Homerum sapientissimus Vlysses, modo sibi patriæ summum aspicere contingat, æquissimo animo a vita sit discessurus: ipse tamen eam ita negligis, ut illud, Quævis terra patria, tibi plane hæsisse videatur. hæc sunt, quæ me, ut hoc tuum proficiscendi consilium reprehendam, impellunt. At contra, cum, quo in statu res tuæ sint, rursus considero, in alteram partem multa occurrunt, quæ me, ut illud laudem, atque probem, facile inducunt. Nam, cum tibi uelut solidæ laudis metam exquisitam quamdam, & reconditam doctrinam proposuisses, viam tu quidem ingressus eras, quæ ad optimarum artium cognitionem contenditur, ac per eam iam tantum processeras, ut eo, quo institueras, brevi tempore peruenturus esses: sed quæ præclaris conatibus semper aduersatur, progressus tuos fortuna retardavit, atq; tibi cupide procedenti aditum ad eam gloriam interclusit. moritur Pater tuus, in quo spes omnes tuas, cogitationesq; sitas habebas, & ille tibi moriens spes omnes tuas, cogitationesq; præcidit. Patris amissionem patrimonij sequitur amissio; quippe a fortuna uix unum est iniectum telum, cum illico alterum instat. adeo ut, cum hæc sese tibi impedimenta simul obiecerint, ab incæpto desistere, & in medio studiorum cursu insistere

insistere coactus sis. In tantis tamen malis, quod sapientis est, nunquam animo defecisti, nunquam tibi fortitudo, nunquam prudentia defuit, sed semper constans, semper paratus fuisti, quicumque accideret casus, hunc æquo animo ferre, & quod una non succederet, altera aggredi uia. nemo igitur sapiens te ut inconstantem reprehenderit, si litteras armis mutare decrueris, si quoduis potius periculum tibi adeundum existimes, quam a sperata bellica laude, militariq; gloria discedendum. at Urbis aspectu cares. scilicet, quia hæc superbe exstructa ædificia haud quotidie contemplaris, quæ tibi præsens ne uisenda quidem existimabas, id tibi dolendum crediderim. ceteris de rebus, opinor, non laboras. neque enim quæ a tuis Ciuibus aguntur, hæc tibi cum eis conueniunt, aut placent. ego equidem, si in ea Ciuitate, in qua natus es, eo progressa sit hominum inscitia, atque auaritia, ut uirtuti tuæ locus omnino sit nullus; quiduis potius ferendum censeo, quam in tanta perfidia, atque iniquitate uersandum. illud te fortasse excruciat, quod Matris tuæ, Fratrumq; tuorum aspectu te subtrahis. id ego minime miror. ægre enim diuellimur ab amicis; quanto magis a Parentibus, unde uitam ipsam, qua fruimur, accepimus? sed, si diligenter attendes, plus fortasse in ea re momenti esse intelliges, quam ut nihil dolere; minus certe, quam ut te omnino debeas excruciare. nam, quia si.

FIG IO. NICOLAI SAVLII CARREGÆ

hic adesses, ipse auxilio destitutus, ubi re opus esset, tuos re iuuare minime posses, eorum iccirco aspectus plus tibi doloris, quam voluptatis afferret; ut eorum absentiam equius ferre debeas, ea spe nitens fore, ut ad eos breui te referas, eosq; ita subleues, ut e fortunæ fluctibus aliquando emergant, & tranquille, placideq; vitam traducant. neque illud valde te moueat, quod amicorum consuetudine careas; siquidem litterarum sermone sæpe coniungimur, quamuis locorum interuallo disiuncti: & amicitiam nostram, ut antea firmam, ac stabilem expertus es, eandem nunc esse, & perpetuo futuram existimes licet, cum virtute penitus hæreat. huc accedit, quod non bellum illud ingrederis, in quo aut ciues belluarum more pugnent inter sese, atque prælientur, aut in quo Italicis agris vastitatem, vrbi- bus incendia milites minentur; sed illud bellum, quod pro iustissima causa susceptum est; pro Imperatoris Optimi, & Inuictissimi Maiestate defendenda; pro ijs locis recuperandis, quæ illi adempta fuerant, & pro Religionis nostræ tuenda, atque amplificanda. illud denique bellum, in quo communem Christiani nominis hostem omnes Christiani Principes communibus viribus prosternere, atque opprimere tentant: ut minime dubitandum sit, quin ex hoc bello, hostibus deuictis, incolumes reuersuri, letamq; victoriam deportaturi sis. quanti vero illud est, quod litteris instructus ad arma tra-

Etanda

Et anda aggredieris? nam neque cum ijs sentio, qui a literis parum adiuuari arma existimant; & ab ijs, qui litteras inter arma prorsus inutiles esse contendunt, magnopere dissentio. I Nobilitatis nostræ decus, Dispersorum Academiæ splendor, & ea pete, quæ tibi proposita sunt præmia immortalitatis. nam, quamuis fortuna multas tibi rerum varietates attulerit, atque mutationes, de animi tamen constantia deijcere te nunquam potuit. opes tibi abstulit, at quocunque inieris, eas tecum affers opes, quas nec ipsa dedit, nec tibi eripiet unquam. Patria cæres. at illam veram tibi Patriam esse existimas, in qua virtus honestissimum habeat domicilium. nos, qui te unice diligimus, qui te discedentem non sine magno dolore dimittimus, Deum Opt. Max. precabimur, ut ille consilia tua unus moderetur, ac regat; & hac una ratione tui absentis desiderium leniemus. te nobis sæpe ante oculos proponemus. modo cum barbaris hostibus fortiter pugnantem, modo inter Duces de bellicis rebus consilium dantem; ut quamuis absentes, præsentem tecum futuri simus, ac pene tecum locuturi. idq; libenter faciemus, donec letissimus ille dies illuxerit, cum rebus præclare gestis in Patriam reuerteris, & tranquillo animo nos tuo sermone, tuoq; congressu, tu nostra vicissim consuetudine, nostrâ familiaritate frueris. Vale. Genua XIII. Kal. Sept. CIO. IO. XCVII.

FRAN-

FRANCISCO BONONIETTO,
ALEXANDRI FILIO,

Bononiam.

PROXIMIS superioribus diebus, litteris perlectis Roberti Titij viri doctissimi, quibus mihi significabat Patrem tuum statuisse, ut Vincentius Alzarius Bononiam se conferret studiorum tuorum socius, adiutorq, futurus; ex ijs voluptate affectus sum tanta, quantum animum meum iampridem non percepisse velim existimes. Hoc enim & ipsi Vincentio studijs suis otium querenti vehementer utile; mihi vero haud inutile Virorum nobilium amicitias expetenti, futurum speravi. quod utrunque evenisse nunc video. nam, & illi nunc eas artes colere licet, quibus semper deditus fuit; mihi vero ad amicitiam tuam aditus patefactus est, quæ mihi maximo semper est futura præsidio, & ornamento. Ut enim ipse Vincentius tibi de mea erga te singulari observantia sponsor, ita mihi de tua erga me benevolentia existit testis; perfecitq, quod omnibus & diuitijs, & opibus antepono, ut me diligeres, amplectereris, haberes in tuis. quocirca nunc ipse mihi carior sum, nunc ego fortunatus esse mihi videor, omniaq, incommoda, quæ unquam in vita pertulerim, hac voluptate

luptate compenso. eoq̄, magis, quia fore confido, ut, quemadmodum in amicitiam tuam me nunc recepisti, ita receptum in posterum cōserues; mea vero ergo te obseruantia vitæ sit æqualis. Itaque ipsis Titio, atque Alzario, qui mihi tanti boni fuerunt auctores, tantum me debere confiteor, ut, si eorum causa omnia præstiterim, vix satis gratus esse videar futurus. illa vero me ad te amandum impulerunt, quod cum etas tua nondum ad annos XV. accesserit, nihil tamen earum rerum facias, quas ceteri solent adolescentes; quod ita viuas, ut legem ipse tibi perpetuæ continentiae indixisse videaris; quod denique alios non imiteris, qui a Maioribus suis prorsus degenerant, te vero recte factis quotidie magis confirmes non prius conquieturum, quam Maiorum tuorum laudibus omnino responderis. quod euenturum spe certissima auguramur, cum hæc fundamenta ieceris adolescentiæ tuæ, cum hos fructus iam afferas in ipso ætatis flore. statuisti tu quidem nihil præclarius esse, quam in cognoscenda virtute, atque ornanda industriam locare; & in eo ita perscueras, ut ipse tibi quotidie magis in bene agendi perpetuitate constes, ac in ipsa virtute progrediaris. nimirum hoc est, quod Francisci aui tui, Alberti patruī Cardinalis memoria, & Alexandri patris domestica disciplina ad præclare agendum magnopere te excitat, atque studio immortalitatis incendit. hos tibi ad imitandum proponis,

ponis, ex horum nobilissimis actionibus omnium actionum tuarum exempla petenda existimas. itaque nunc in ijs studijs, quibus illi quasi per gradus ascendentes ad summas dignitates pervenerunt, ita versaris, ut, si quis te ad ea hortari vellet, currentem incitare, ac celerique calcar adhibere videretur. nunc Philosophiæ, ac utriusque Iuris thesauros anide congeris, quos postea Romæ libenter explicabis, & cum hominibus communis; Romæ, inquam, ubi debita virtutibus tuis præmia feres; ubi non modo antiqua Maiorum tuorum facta renouabis, sed etiam novum ipse in tuam Familiam inferes decus. Diem letissimum ex omnibus diebus, quos unquam in vita uiderim, cum ea tempus attulerit, quæ multo ante futura præuiderim; cum ea comprobauerit euentus, quæ de te multis iam annis antè prædixerim. Interim vitam uiuis maxime expescendam, atque optandam, perturbationibus vacuam, tranquillitatis plenam, ab erroribus vulgi distinctam, sapientiæ, atque prudentiæ coniunctam. ut merito omnes, qui se Bononiam conferunt, propter doctrinam te admirentur, & propter suauissimos mores amore singulari prosequantur. hinc euenit, ut dum uixerint, te filij loco duxerint propinquitui Gabriel Paleotus Cardinalis amplissimus, & Camillus eius frater Senator Sapientissimus; illi, illi Viri, qui Bononiam ita illustrarunt, ut ea cum multis rebus, tum Gymnasio celeberrimo

rimo clara, his tamen Palæotis fratribus haud paullo mihi clarior esse videatur. at hic horum Clarissimorum Virorum memoria lacrymas elicit, quas in communi omnium fletu continere haud possum, iacturam illam deplorans, quam litteræ fecerunt, quæ illis viventibus floruerunt, morientibus conciderunt. quam quidem iacturam si quis unquam resarciat, tu is certe unus ex omnibus eris, qui litterarum amore incensus es; qui litteratos homines summa humanitate complecteris. tu, inquam, unus & latinæ litteras, & liberales disciplinas iacentes eriges, erectas extipies, & exceptas veterem in dignitatem restitues. cuius quidem rei non obscura signa iam dedisti cum in alios, tum in Vincen-
tium Alzarium nostrum, qui humanitatem tuam expertus iam est, iamq; ex ea maximos cepit fructus; cui quidem cum hanc diuinitus oblatam occasionem sæpe per litteras gratulatus essem, nunquam ille intermisit affirmare, nihil sibi potuisse opportunius aduenire; vestro in iudicio, & benevolentia omnia commoda, & ornamenta sibi posita existimare; Deo Opt. Max. gratias agere, ut tantum nunc sibi dari, ut arbitrato suo multas diei horas in litteris ponere possit. Itaque, eum ipse antea id maxime vellet, nunc vero & velit, & quicquid habeat, multa perficiet, quæ inchoavit, multa perpoliet, quæ iam perfecit, & operam dabit, ut vicissim ex laboribus suis fructus uberrimos capiamus.

Q

qua-

quamobrem illud a te petere, ut in eum studia, atque officia tua conferas, haudquaquam necessarium esse existimo. tibi potius gratias agam, quod precibus meis locum plane nullum relinquens plurima iam studia, atque officia in eum contuleris. quod cum facias, Verendum tibi non est, ne non boni rerum aestimatores te beneficium dantem summo iudicio præditum, illum vero accipientem optime meritum existiment; qui profecto & iudicium dantis, & meritum accipientis prædicabunt, atque summis laudibus efferent. Longius fortasse progressus sum, quam brevis epistola patitur; sed illud me excuset, quod ea, quæ scripsi, ad testificandam meam erga te singularem observantiam omnia scripsi. tuas vero præstantissimas virtutes, quas nunc leuiter attigi, ipsi Vincenzio in eo libro, quem tibi inscripsit, atque dicauit, satis pro dignitate commemorandas relinquam. de quibus si quemadmodum absens multa audiui, ita præsens ea viderem, ac, ut ea audiendo auribus satisfeci, ita quoque ea videndo oculis satisfacerem; profecto tanto magis gaudere, quanto magis in ijs rebus, quas cupidissime expetiuius, oculorum sensu augeri voluptatē intelligimus. Verū, quia illud optare magis, quā sperare nunc possum; quod proximum erit, libenter faciā: virtutes tuas dies noctesq; contēplabor, quātum in me erit, imitari conabor, eroq; alijs incitamento ad eas vberius, atq; ornatius amplificandas. Vale.

HIE-

HIERONYMO FRVGONIO,

Taurinum.

VIX credas, mi Hieronyme, quantam mihi letitiam obtuleris litteris tuis, & versibus etruscis, quos una misisti. nam & illius temporis memoriam renouasti, quo his iucundioribus musis operam dabamus; & amorem in metuum antea satis mihi clare perspectum, eundem his litteris illustrius patefecisti. illud quidem non effecisti, ut his laudibus commotus sim, quas in me tam plena manu contulisti: quas ut reijciā, amorem ipsum tamen, a quo tanquam ex fonte ille fluxerunt, non possum non maxime amplecti. equidem, ut, quod sentio, libere dicam, cum in me ea minime sint, quæ esse dixeris; vereor, ne in me laudando voluptatis potius poetico more, quā veritatis rationē habuisse videaris; & ingenij tui vim, ut illud magis admiremur, ad rem obscuram illustrandam contulisse. itaque, si me audias, me deinceps silentio prætermittas. quod si, quæ tua est humanitas, tuum omnino institutum persequi volueris; dic me litterarum amore incensum, Dispersorum Academiæ amantiſſimum medic esse. hæc vera esse fateor, cetera non agnosco. Sed fortasse sub nomine laudis latet cohortatio, & talem me esse optas, qualem nunc iam esse fingis. quod si

Q 2

Verum

Verum est: ne ad me excitandum, & acucendum tua plurimum valebit auctoritas. Sed hæc omitto. ad ea venio, quæ magis amicitie nostræ interesse iudico. Illud mihi vehementer placet, quod te immutatum non video, quamvis sedem, locumq; mutaueris. me quidem etiam & constantia valde delectat, & in incæpto perpetua permansio. adeo ut, quamvis maximo interiecto spatio alter ab altero distungamur, eodem ipse erga te animo sim, quo semper fuerim. conuenit enim inter nos, diligenter videndum esse, cum quibus amicitia instituitur; instituta vero, omni ope cernendum, ut diutissime conseruetur. quod istam Ciuitatem ad habitandum legeris magnopere gaudeo. spero enim fore, ut quemadmodum nunc ea iucunda, atq; quieta, ita beneuola posthac utaris. Illud molestissime fero, quod tua admodum utili, et iucunda consuetudine careo. Non habeo, quicquid loquar, quicum ea communicem, quæ hanc uitam vel iucundam, vel iniucundam efficiunt. itaque velim, ut quicquid de nostris colloctionibus locorum interuallo amisimus, id litterarum bono sarcire conemur. sed qui eas perferunt, temporis tantum in itinere; & reditu ponunt, ut eas serius, quam nostra ferat voluntas, accipiamus. at, quanto est amoris, quam tabellarij cursus celerior? tui enim desiderio sepe incensus in equum ascendo, Taurinum excurro, tecum sum. quod haud ita facile quisquam crediderit nimis
 amo-

amoris nondum expertus. ac utinam possem vnate-
cum vitam exigere. quid enim aut ad doctrinam com-
parandam, aut ad mores recte conformandos mihi vi-
lius esset, quam apud te virum optimum, & ingenio-
sisimum in contubernio viuere? nec illud in loco metor-
queret, quod hos nitidissimos colles haud amplius vi-
derem: nam istam Ciuitatem circumstant aqua loca,
atque plana, frugibus vestita, quæ æque, ac illi, nos
facile delectent. quæ quidem fruges vento commotæ,
atque agitæ, tanquam undæ paulatim longius se dif-
fundentes, speciem maris præbent, vt maris nostri ad-
spectum haud multum desiderarem. Sed illud qui-
dem optare possum, sperare iam vix audeo; vt omni-
no mihi ad litteras confugiendum sit, quibus & mit-
tendis, & accipiendis aliqua saltem ex parte tui de-
siderium leniam. Itaque, cum per occupationes lice-
bit, libenter ad te scribam, & si quid non habebō,
faciam te certiore. nam de rebus Romanis, deq; Fer-
rariensibus uos certiores factos iam esse arbitror. Deus
Opt. Max. illius belli incendium, quo tota Italia con-
flagratura videtur, manu sua restinguat. De nostris
uero, quod litteris dignum nunc occurrit, hoc accipe.
Ducem habemus Lazarum Grimaldum, optimum
Virum, optimum Ciuem; ex cuius consilio, atque pru-
dentia fore confidimus, vt Resp. nostra fructus capiat
vberrimos. ac illum iam cepit egregium, quod omnes

con-

controuersias sustulit, quas inter Duces, & Archiepiscopos nostros attulerat ambitio. tu, si vicissim de ijs rebus, quæ istic geruntur, me docueris, gratissimum facies. Velim autem, ut opera mea ad omnia utaris, mea uero quæ sunt, tua esse putes. Vale. Genua. Kal. Februarij. CIO. IO. XCVIII.

VINCENTIO ALZARIO,

Bononiam.

LIBRVM tuum auide exspecto. ex eo enim sitim explere cupio, cum pauca, antequam discederes, leuiter degustauerim. & quoniam ea est industriæ tuæ fecunditas, ut semper aliquid parias, tibi quod ornamento, alijs vero usui sit; quid nunc potissimum animo, ac mente conceperis, vehementer scire aueo. nam, cum de litteris colloqueremur, quod fere quotidie, dum hic eras, consueueramus, memini dixisse me, si quis Lygurum nostrorū præclara facta elogijs comprehenderet, Vel si ad imitationem Valerij Maximi multarum virtutum exempla colligeret, cum me existimare maximam esse laudem consecuturum. hæc tu quoque mecum sentiebas; & uoluisses tu quidem, & fecisses libenter, si per occupationes tibi licuisset. ego equidem de nouo tenunc ad hoc genus scriptorum libenter hortarer, nisi

nisi illud maiores fortasse uigilias postulare intelligerem
 quam ut in eo quidquam efficere, & præstare nunc
 ipse possis. Itaque uelim, ut ad ea aggrediaris, quæ
 facilius perfici posse existimes. mihi quidem hoc tempore
 nihil gratius facere potes, quam si in colligendis
 Monumentorum lapideis inscriptionibus, quæ in mul-
 tis Italiæ locis passim leguntur, aliquam industriæ tuæ
 partem exercueris. cuius quoque rei magno me deside-
 rio teneri, de meis sermonibus ipse colligere potuisti. hoc
 igitur munus ut suscipias, quod utile, et iucundum fore
 confido, te etiam atque etiam rogo. quo quidem in mu-
 nere si non modo laboris, sed etiam ingenij partes susci-
 piens, eos laudaueris, a quibus Inscriptiones ipsæ ac-
 ceperis, simulq; ostenderis, quid in unaquaque earum
 excellat, egregie illi satisfacies. & quoniam doctri-
 narum in studio ita uersaris, ut, cum priuæ uolu-
 ptatis, tum communis etiam utilitatis habeas ratio-
 nem, si animum induxeris, ut hanc prouinciam susci-
 pias, de impressione postea statuemus; & ego tibi,
 quantam omnino in hanc rem necesse erit impendere pec-
 uniam, suppeditabo. non enim mihi Sinibaldi Fer-
 rarij nostri sententia probatur; qui, cum luculenter,
 & egregie scribat, nullotamen modo adduci potest, ut
 sua scripta in publicum proferat. Quamquam ipse
 hanc habet rationem, qua sententiam suam tueatur,
 quod incumbenibus ad præclara litterarum studia qui
 opem

opem ferat, ferat autem? immo qui polliceatur, neminem esse uidet. quo quidem nomine omnium uestrum, qui litteras profitemini, ego uicem uehementer doleo, condicionemq; uestram in dies deteriorem fieri, graui-
ter, molesteq; fero. habes, mi Vincenti, quid ego a te nunc potissimum scribi uelim: tu, quid nunc potissimum scripturus sis, liberius si mihi indicaueris, rem mihi gratissimam feceris. quod si, omnibus posthabitis, Bononieta[m] Familiam scriptis celebrandam seligeres, consilium placeret, nec rem digniorem, ubi tu neruos ingenij intendas, ullam esse puto. ecquæ domus est hodie, in qua certius litteris, ac litteratis hominibus perfugium sit? est istuc datum profecto Bononietae Familiae, litteras, ac litteratos homines ut excipiat, amplectatur, & foueat. adeo ut, quemadmodum optimis artibus Italia ceteris Orbis terræ partibus, in Italia uero Bononia ceteris ciuitatibus longe antecellit; ita Bononia litteris, ac litteratis hominibus praesidio, & ornameto Bononieta in primis Familia sit. a qua cum tuis consuli studijs, atque commodis intelligam, facere non possum, quin tuum de mansione consilium probem, & in ista eruditorum hominum celebritate uersari uehementer gaudeam, eoq; magis, quod medicinae studium ita amplexus es, ut Laureæ insignia breui sis consecuturus. quæ quidem ars huiusmodi tibi pariet fructum, ut, ad nos cum te receperis, omnibus curis solu-
tus

tus nobiscum simul quieta, atque tranquilla vita sis
fruiturus. Vale, & Franciscum Bononicum sum-
ma iam virtute adolescentem, meo nomine plurimum
saluta. Genua. Prid. Non. Apr. CIO. IO. XCVIII.

IO. FRANCISCO GROPALLO,
VINCENTII FILIO.

QVIA propter occupationes minus saepe, quam
vellem, tecum sum, idcirco has ad te litteras dare vo-
lui, ex quibus meam de lingua Latina sententiam pla-
ne intelligeres. nam cum saepe ex te audiuerim, cum
diceres Etrusca lingua scribendū esse, & a Latina prorsus
abstinendum, hanc tibi opinionem ex animo euelle-
re statui, antequam radices agat altiores. neque enim,
cum ceteris in rebus nostri sensus maxime congruant,
hac in re una eos maxime discrepare, amicitia nostra,
& affinitatis summa coniunctio postulat. Cum due-
res in controuersiam vocantur, utra ex his præstan-
tior sit; in utraq; dignitas spectanda est, atque utili-
tas, nec voluptatis ratio non habenda. hæc igitur ita
perfecte in Latina lingua reperiri, ita prorsus in Etrusca
desiderari ostendam, ut nemini sit dubium futurum,
quin Latina, quam Etrusca longe præstantior sit. tria
vero sunt, quæ maximam Latine lingue dignitatem
pepererunt, antiquitas, scriptorum elegantia, atque
R aucto.

auctoritas, & Vis quædam in ea insita, atque innata. nam si principium perquirere velimus, eam tunc ortam esse reperiamus, cum Aeneas fugiens a Troia in Italiam peruenit, & cum Latino Aboriginum Rege societatem iniuit. Postea vero simul cum Imperio Romano ea usque adeo creuit, ut, quemadmodum illud in omnes fere gentes peruasit, ita hæc ad Consulatuum summum Romanæ Reip. Imperium viam sibi patefecerit. Cicero enim magis sua eloquentia commendatus, quam Maiorum gloria clarus hunc tantum honorem consecutus est. multa per secula postea viguit, ac nunc etiam viget, ut nihil de pristino iure amississe affirmes, nec quidquam amissuram in posterum existimes. Porro res antiquæ quantam habeant admirationem, quam iucunda sit earum tractatio, quotidie experimur. itaque, si quid in tabula, marmore, ære, argento ve inscriptum videmus, quod ad antiquitatis notitiam pertineat, id libenter describimus, auide arripimus, & in scrinijs nostris veluti thesaurum asseruamus. merito igitur Latinam linguam in delicijs habemus, admiramur, veneratione prosequimur. Etrusca vero non multis abhinc seculis orta est; tunc in Italiam paullatim inducta, cum barbaræ gentes eam sepius occupassent. ut, si quis multarum linguarum colluuiem potius, quam linguam eam esse dicat, verum ille quidem dicere videatur. Cum ea igitur

igitur a confusione principium habuerit, suis quoque progressionibus confusione augeri nulli mirum esse debet. nam, & qui illam profitentur, quo nomine eam appellent, nondum plane deliberauerunt: inde contentio, inde dissensio, & nonnullæ Italiæ Nationes de illius non admodum antiqua origine pugnant inter se, atque contendunt. quod si ego Etruscam appello, id facio, quia vocabulum magis proprium, quo utar, non inuenio. ex præteritis de futuris iudicamus. Malum principium, non dubito, quin exitus peior consecuturus sit. quod utinam Deus Optimus Maximus hanc linguarum congeriem aliquando dissoluat, ut singulis vocibus ex tam confuso aceruo separatis, & in suas regiones migrare iussis, pura illa, & incorrupta Latine loquendi consuetudo Italiæ reddatur. Venio nunc ad veteres linguæ Latine scriptores: at quos scriptores, bone Deus, quam eruditos, quam elegantes in omni genere scriptorum? mihi quidem eorum præclara ingenij monumenta tota mente contemplanti, nec meliora, nec ornatiorem vel ipsi Græci scripsisse videntur. admiramur Ciceronem, Virgilium; alterum Oratorem, alterum Poetarum principem: summis laudibus efferrimus tot claros Viros bellicis rebus, & doctrina præstantes, quorum auctoritatem multorum seculorum auctoritas comprobauit. quem illis oppones ex

immensa Etruscæ linguæ scriptorum turba? proferes
 ne Franciscum Petrarcham, ac Ioannem Boccac-
 cium, quorum alterum Virgilio, alterum vero Cicero-
 ni conferre audeas, cum Virgilius Homero, Cicero
 vero Demostheni multorum iudicio anteferendi sint?
 præterea in lingua Latina summam inesse vim, nos
 ipsa experientia docet. Principes Viri maioribus in
 rebus ea utuntur. intelligunt enim, id quod res est,
 eam haud paullo plus ponderis habere, quam ve-
 stram hanc Etruscam. Si quis in publico Latine di-
 cit, is ita audientium sensus, & animos in sua pote-
 estate habet, ut eos, quo velit impellat, unde autem
 velit, deducat. At quis miretur nos studijs humani-
 tatis deditos Latina lingua maxime affici, cum bar-
 bare gentes humanitatis expertes ea maxime affi-
 ciantur? mira Latine linguæ vis, mira est gravitas;
 ut antiquorum scripta cum legimus, eam statim lin-
 guam agnoscamus, quæ Orbis Terrarum princeps, ac
 domina fuit. At Etrusca lingua nullam vim in sese
 habet, res graviores non admittit, ad ea scribenda
 tantum accommodata, quæ populo familiaria sunt.
 De utilitate sequitur; quæ quidem tanta est, ut La-
 tinam linguam si quis sustulerit, omnes disciplinas,
 atq; artes, omnem denique vitæ communionē sustulisse
 videatur. Quæcunque enim ad Religionem nostram
 pertinent, omnia Latina lingua exstant conscripta.
 quæ

que quidem lingua ad eam propagandam momenti plurimum habet , cum toto pæne Terrarum Orbe sit omnibus nota , vnaq; omnium sit pæne communis . Ingenue artes fere omnes aut Latinis litteris illustrantur , aut Latino sermone passim explicantur . quod si qui fuerunt , qui philosophiam , aut ius civile Etrusca lingua interpretati sunt , eos satis constat non magis probatos fuisse , quam qui Latinis modis , atque numeris ea ipsa lingua versus facere aggressi sunt . Omnibus hominibus loquendi facultatem natura concessit , at non omnes vna eademq; lingua loquuntur . Quodnam igitur huic tanto incommodo comparatum remedium est ? quod ? nisi Latina lingua , quam omnes gentes intelligunt , quæ non minores affert utilitates , quam quæ vere necessaria sunt ? Etrusca vero lingua non ita mihi utilis esse videtur , ut in ea plus temporis conterendum sit , quam quantum nobis sit necesse inter domesticos familiariter loquentibus . Quod si ea , quæ scribimus ad alienam utilitatem dirigi debent , qua ratione id assequi possint , non video , si Etrusca lingua scripta sint . Hæc enim suis quasi finibus contenta in longinquas regiones haud facile excurrit . Itaque qui Etrusce hoc tempore scribunt ; cum hominibus non magnopere profunt , tum gloriæ suæ non optime consulunt . eam enim angusto satis loco includunt , cui

totus

totus pene Terrarum Orbis, illi ipsi Latine si scriberent, theatrum esset futurus. Ego equidem, cum in Etrusca lingua comparanda plurimum operæ, ac industriæ antea posuerim, nunc me non tam lucrum, quod eam mihi comparauerim, quam damnum fecisse existimo, quod in ea comparanda tantum temporis consumpserim. Ceperat me quoque fucata quædam eloquentiæ species, cum huius Etruscæ linguæ studio tenerer. ac, ut si omnes dicendi videres consecutus fuisset, ipse me vehementer amabam. At posteaquam ab eo studio ad Romanæ eloquentiæ pulchritudinem ratio me ipsa traduxit, quasi mihi speculum allatum fuerit, longe me ab ea specie, quam in scribendo optimam quærimus, abesse sensi. Itaque, quod hanc Latine scribendi viam ingressus sim, nunquam me pœnitebit; quin etiam in dies magis incœptum hoc iter percurrere contendam; & veteres illos si minus attigero, propius ad eos accedere conabor. Dixi de dignitate, atque utilitate; nunc Latinæ litteræ quantam habeant voluptatem, ostendam. maxima afficimur voluptate, cum ea, quæ ad humanitatem pertinent, studia tractamus. Quid enim potest esse his studijs humanitatis incundius? ego equidem, omnibus rebus relictis ad ea sæpe confugio, ac in suauissimo earum amplexu libenter conquiesco. An tot labores, quibus est hominum vita referta perferre

ferre possemus, nisi his humanitatis studijs identidem leuaremur? Hæc autem studia merito sibi vindicant. Latine litteræ, & scriptoribus Latinis omnium prope consensu scriptorum primæ in his studijs deferuntur. Quid Cicerone grauius, Virgilio dulcius, Lælio sublimius? neque vero Poetas, Historicos, Oratores habent, Philosophos autem Latine litteræ desiderant. Nihil est enim, quo ipse oblecteris, quo ad legendum inuitari, atque allici possis, cuius non vberissimam tibi Latina lingua copiam suppeditet. est igitur Latina lingua cum propter dignitatem, & utilitatem, tum propter voluptatem vehementer amanda. huiusmodi vero voluptates quanto ceteris omnibus maiores, sincerioresq; sint, ex eo intelligi potest, quod aliæ nobis satietatem sæpe afferunt; hæc indies magis, magisque nos capiunt; quod alias statim perturbatio consequitur, has semper animi tranquillitas comitatur. Hæc igitur cum ita sint, tibi non persuadebitur, quam Latina lingua parit incredibilem voluptatem, hac ut perfruaris? ea enim est Latine lingue puritas, & suauitas, ut non dubitem, quin, si semel eam gustaueris, auidius postea eandem arripias, quasi diuturnam sitim expleturus. Ad eam vero degustandam nunc te præclara inuitat occasio. in amænissimis villulis tuis summo otio frueris. quid obstat, quominus antiquorum scriptis euoluendis totam ætatem

ibi

ibi traducas? neque vero cum fessus eris legendo, tibi
 deerit, in quo subcisiuis horis quasi ludibundus ipse te
 excerceas, cum nullum fore genus artificij sit, in quo
 non ipse ita excellas, ut cum summis artificibus com-
 parari possis. Ut concludam, es naturæ muneribus
 maxime ornatus, ad Latine linguæ Studium
 ea si consuleris, spero fore, ut amplior il-
 lius dignitati ex tuis scriptis, tuæ
 vero gloriæ ex illius usu
 cumulus accedat.

Vale.

Genua ex adibus. Quarto Nonas Iulij.

CIC. 12. XCVIII.

IOANNIS

IOANNIS NICOLAI
SAVLII CARREGAE
GENVENSIS

EPISTOLARVM

LIB. III.

IOANNI VINCENTIO
IMPERIALI.

Ex omnibus rebus, quæ in hoc Orbis Theatro conspiciuntur, nulla me magis afficere solet, quam Varietas illa, quam in hominum ingenijs, atque moribus inesse videmus; cum unusquisque suum vitæ genus magnopere laudet, ceteros vero labi, & errare existimet. res quidem consideratione digna, & quæ maximam nobis utilitatem asferre potest Varios exitus diligenter considerantibus, quos tam dissimiles viuendi rationes sortiuntur. Multi honores ita sitiunt, ut in ijs petendis nullos labores, nullas contentiones subire recusent: fuco, & fallacijs prensant, per alienas aedes cursitant, in subsellijs prima loca occupant, & aura populari tam alte sepe extolluntur, ut, tamquam astra capite tangant, se præ ceteris beatos putent. miseri, atque infelices,

S

lices, qui vulgileuitate, & inconstantiâ nixi sepe de gradu dignitatis deturbantur, & quo magis in sublimē effruntur, eo maiori ruina præcipites ruunt. Alij ita diuitijs inbiant, ut nihil aliud cogitent, quam quomodo arcas, & saccos impleant, nulli nec diurno, nec nocturno labori parcunt, in longinquas regiones commigrant, & questus causa multis se periculis offerunt, in opibus spes suas sitas habent, opibus omnia se consequi posse confidunt. qui nobis sane miserabilia spectacula præbent, dum infelicitè viuunt, & infelicius moriuntur, filijs relictis, qui, quas illi per summos labores tota fere ætate pecunias accumularunt, eas ipsi ludibundi pacto temporis vno talorum iactu sepe amittunt. Non pauci sunt, qui rei militaris studio maxime delectantur, nil nisi arma loquuntur, tubarum sono excitantur, martium furorē oculis spirant. at hi in ipso belli tirocinio, aut pugnando sepe mortem occumbunt, aut, si vinct, eam gloriam referunt, quæ cædæ, cruore, & incendijs paria non usquequaque perfectæ videtur. Plerique autem ceterarum rerum obliti voluptatibus plurimum indulgunt, & amore ita insaniunt, ut noctes insomnes ducant, & mæstis querelis omnia complant, rei amata imaginem perpetuo in oculis, animoq; habent, & illius aspectu frui, & ea potiri si liceat, ad suam felicitatem nihil adli posse affirmant. at illi egregia sane præmia fe-

RUM

runt in hac Veneris militia se exercentes ; nam prima sub ætatis flore aut misere pereunt , aut valetudine in perpetuum amissa miserrimam vitam viuunt. Tu vero, Ioannes Vincenti, longe aliud viuendi institutum secutus es . nulla enim re magis , quam litteris delectaris ; quantum per ætatem licet, in Rep. versaris ; doctissimorum Virorum consuetudine fruëris ; & quæ Adolescentis Amplissima Familia nati, ingenio, opibus, maximisq; Affinitatibus florentis partes sunt, eas egregie sustines , atque tueris . diuitijs quidem plane regijs abundas , & egregijs corporis dotibus a natura ornatus es ; sed ijs vteris , quatenus Virtutis exercendæ instrumenta sunt . præclare quidem. Ego nunquam adduci potui , vt talia bona in hominibus magis , quam animi Virtutes amarem . hanc igitur vitam, quam instituisti, summis laudibus efferendam, ceterisq; omnibus præferendam censeo. Ex ea enim hæc tibi bona fluunt . humana contemnis, ad cælestia aspiras, extra Italiæ fines gloriam tuam dilatas , æquales te imitandi cupiditate accendis . quibus quidem præire lumenq; quasi præferre , vt per hoc iter gloriæ celeri gradu currant , mihi videris . Id verum esse , tibiq; primas in litteris iure deferri illi fatentur . itaque mirifico consensu, semel atque iterum delectus es, qui in Mutorum Academia principatum teneas , vt arbitrio tuo studia dirigantur , vt auspicijs tuis res denique tota geratur.

S

2

at

at vos, eo nomine suscepto, luisse mihi videmini, ac longe alio sensu illud accipiendum esse, quam quo usitata consuetudine accipi solet. Muti scilicet, cum gravissimis de rebus inter vos quotidie disputetis? cum tu præcipue elegantissimas, doctissimasq; Orationes habeas, tanta oris, vultusq; dignitate, tantaq; dicendi copia, atque vbertate, ut audientium animos maxima letitia afficias, eosq; in tui admirationem allicias, simulatque trahas? ac tunc melius videbimus, num hos tibi nomen conveniat, cum ea in apertum proferes, quæ tum versu, tum soluta oratione scripsisti. Ex quibus cum sitim nostram expleo cupiamus, ea a te diutius comprimi iniquo animo ferimus. Quantam letitiam existimandum est capere Parentes tuos ex te. Filio & Virtute, & litteris maxime ornato, cum te vnice ament, & spes omnes suas in te collocaverint? quos quidem intuens, quamvis te, natura duce, ad omnem laudem accendi sentias, non dubito quin acrioribus gloriæ stimulis excitatus, in dies magis, magisque inflammeris. Ecquem exempla non commoveat, & ad veram, solidamq; gloriam non impellat Ioannes Iacobus Pater tuus, Vir Senatoria dignitate, prudentia, & auctoritate præstantissimus? Ego quidem quoties illius magnificentiam in amplissimis ædificijs ad commune potius Urbis ornamentum, quam ad propriam Utilitatem pertinentibus considero; & eum
tam

tam Patriæ amantem, tanto iuuandi mortales studio
 ardentem video, aliquem ex veteribus illis Romanis
 videre mihi videor. quos tales fuisse, quales historia
 narrant, idcirco credo, quod his temporibus nonnulli
 reperiuntur, qui eos aut adæquant, aut vincunt. nec
 minus materna Gens Spinula, quam paterna Imperialis
 ad verum te decus inuitat. Blanca enim ma-
 ter tua primaria, ac lectissima Femina, omnibus &
 animi, & corporis dotibus ita excellit, ut præclarum
 muliebris virtutis exemplar cetera habeant, quod imi-
 tentur. Maximo etiam tibi incitamento sunt Illu-
 strissimus, & Reuerendissimus Horatius Spinula Ar-
 chiepiscopus noster, & Illustrissimus, & Excellentiss.
 Ioannes Andreas Auria Melpheæ Princeps, quibus
 tu sanguine coniunctus es. quorum alter veteres illos
 Sanctissimos Patres nobis repræsentat, alter vero
 prudentiæ laude, & rerum gestarum gloria maxime
 inter omnes excellit. Solestu quidem ex multis par-
 tibus summo studio libros conquirere, & Museum
 tuum excellentium virorū imaginibus exornare, quæ
 mihi superioribus diebus, cum domi tuæ te conuenis-
 sem, maxima delectationi fuerunt. Sed multa ex sum-
 mis illis, grauissimisque Viris. Propinquis tuis nos lau-
 dabilia percipere posse, quæ nunquam ex libris perci-
 peremus; & has viuentes, ac spirantes imagines nos
 virtutis amore magis accendere, quam illas alteras
 manibus

manibus hominum pictas plane intelligis. cum ille tantum corporis effigiem, hæ vero etiam mentis imaginem nobis ostendant. Ea, quæ dixi, maximam ad animos nostros excitandos singula vim habent; cum ea vero uniuersa in te sint, cum tibi a natura virtutis amor ingenuus sit, cum Parentes, & Affines habeas, ex quibus omnium virtutum exempla petere possis; cur ea te præstare, quæ humana condicione maiora sunt, tantopere miremur? quin potius te nobis imitandum, celebrandumq; proponimus? quid cessant id facere illi, quos circum te habes doctissimi viri? cur non omne studium, atque ingenium ad te laudandum conferunt, ut in te laudando maximam ipsi quoque laudem consequantur? num eos materiæ grauitas ab hac mente deterret? num tanto oneri ferendo haud pares sese esse intelligunt? vimam ego eam dicendi facultatem qua ipsi præstant, consecutus essem; omni timore omisso, non aliud certe argumentum, quam eximias tuas virtutes ad scribendum deligerem. Quibus quidem ego tantum excitor, quantum olim Themistoclem illum adolefcentem Miltiadis trophæo haud excitatum fuisse crediderim. Sed cum hoc ego beneficium maximum ducam, quod me in amicitiam tuam amantissime receperis, cumq; ab ingrati animi vitio vehementer abhorream, hanc iniborationem, ut illud aliquo modo compensem: ipsas vir-
tutes

tutes tuas, semper in ore, animoque habeo, eas uni tempore colam, & quantum tenuis ingenij mee vires patientur, apud posteros testatas relinquam. Vale. Genua.

IO. VINCENTIVS IMPERIALIS

IO. NICOLAO SAVLIO

CARREGÆ.

AMICIOR tua, quam verior Epistola. Perlibenter legi. quem mea laus deterruit, me tui filii candor illexit. Humanitati illa, hic tua doctrinæ detur. Viros doctos admirror, atque observo, non amulo. Plane me novi. Tuae in me summe benevolentiae debeo plurimum. Offerat se occasio, tu & meae, quae summa itidem in te est, plurimum debebis. Vale.

PASQUALI SAVLIO F. C.

STEPHANI FILIO.

VIROS doctrina præstantes summa observantia colo, idque cum mea sponte facio, tum magnopere scriptorum auctoritate commoveor multa de illis prædicantium. Itaque, quamvis erga Stephanum Saulium Patrem tuum virum doctissimum incredibili amore incensus sim; vehementius tamen eorum scriptis inflam-

flammor, qui cum summis laudibus extulerunt.
 Viri ita probi, Veriq; cultores, ut eos tanquam men-
 daces nemo refellere possit; ita in eo laudando iudicio,
 atque voluntate consentientes, ut una vox omnium,
 unus omnium sensus esse videatur. hunc vero incredi-
 bilem amorem meum cum multis iam annos celauis-
 sem, diutius demum continere non potui, quin cum
 tibi illius filio indicarem. quæ voluntatis significatio
 tibi fuit adeo grata, ut me in amicitiam tuam huma-
 nissime receperis. cum vero illius scripta legendi miro
 desiderio tenerer, tu eorum mihi copiam libenter fecistis
 & illius imaginem egregie pictam mihi ostendisti, quæ
 ita me delectavit, ut nihil unquam viderim liben-
 tius. Itaque duplici voluptate uno tempore auctus
 a tuo congressu letissimus disceffi. habui in manibus
 cum librum, quem de homine Christiano ipse conscrip-
 psit, de quo quid Viri senserint non minus dignitate,
 quam doctrina præstantes, eo facile declaratur, quod
 conferendum cum antiquorum scriptis iudicauerint.
 Quæ certa, & illustria cum sint, nullum testimonium,
 aut laudationem desiderant. quantum vero doctrina,
 & eloquentia ceteris præstiterit Pater tuus, res ipsa
 declarat. res quidem præstantissimas ad scribendum
 delegit. in sententijs gravitas, in verbis elegantia inest;
 ut illius ingenium, atque scientiam haud satis admi-
 rari possimus. ac mihi quidem, & Patris tui doctri-
 nam,

nam, & elegantiam, & huius libri argumentum consideranti dignior haud ullus videtur, qui materiem tam nobilem, & præclaram tractaret; ulla nec materies dignior, quæ tam docte, & eleganter tractaretur. nam, cum veteres illi optimum virum, ac ex omni parte beatum formauerint, nihil de vera, atque perpetua felicitate cogitantes; ipse quid Christianum deceat hominem docuit, qui non modo beate victurus sit, sed etiam æternam beatitudinem consecuturus. Itaque, si liber ullus est, qui ad studium summi boni homines excitare possit, hic certe est, ut bonis omnibus diutius deberi non possit, qui a te summis precibus contendunt, ut eum nunc in tenebris latentem tandem in lucem prodire sinas. Patris quidem tui Manes dolere summo opere arbitror, quod hunc librum diutius comprimas, quem ille certe fuerit in publicum editurus, si vitam longius produxisset. ex eo autem quanta ipse in Deum pietate flagraret, quanto iuandi mortales studio teneretur, facile intelligimus. ut ipsius honeste acta vita norma quædam nobis esse possit, qua & mores corrigamus, & studia nostra ad honestatē dirigamus. Diues quidem erat, sed vere diues. ut, quamuis multos diuitijs vinceret, ipse nunquam a diuitijs vinceretur. ijs enim & viuens prudenter, & magnifice usus est, & moriens plura ex ijs Christianæ pietatis opera fieri iussit, ut tum humanitatis, tum liberalitatis

T. ralitatis

ralitatis suæ præclara monumenta intueremur. Ego equidem ades vestras in Colle Iani sitas libenter inuiso, quæ quidem me non tam mirifica exstructione delectant, quam recordatione doctissimorum uirorum, qui in hisce ædibus habitarunt. Cum his coniuncte uiuebat pater tuus. alij alios, hos ille semper magnopere dilexit, liberalitate excitauit, copijs fouis. quod utinam plures in Ciuitate nostra patris tui similes hodie haberemus, ea profecto haud paullo plus pulchrior, atque florentior esset. Merito igitur cum Familiæ Sauliæ deditus sum, tum patri tuo huius Familiæ singulari ornamento sum deditissimus. quæ quidem Familia primum Romæ tanquam in pingui, ac feraci solo nata, ex eo deinde Lucam translata, postremo Genuæ diligentius culta, ueluti generosa planta uberrimos semper attulit fructus. nam, & qui purpura insignes fuerunt, hodieq; sunt, quiq; belli, pacisq; laudibus clauerunt, plures ex hac Familia prodire. Ut maiores meos magnopere laudem, qui legibus nostris, quamcunque in Familiam uellent, transendi facultatem cum haberent, in Sauliam potius, quam in aliam transire maluerint. Quod autem ipse litteras, ac litteratos homines amas, hoc Patris imitatione facis. quam præclaram consuetudinem ab eo cum acceperis, forsperamus, ut illius hereditaria, ac iusta possessione nunquam excedas. nam præter ius ciuile, in quo quan-

tum

hoc tempore acquiescam. quarum alteram ut mihi
conserues, te etiam, atque etiam rogo; alteram vitæ
meæ æqualem futuram omni assueuratione tibi affirmo.
Vale. Genua. Ex adibus. Idibus Oct. CIO. IO. IIC.

LAVRENTIO FABRO.

POMPEIUM Arnolphinum tam misere extin-
ctum ita grauitè dolco, ut nulla ex re quidquam so-
latij capere possim. Versatur mihi ante oculos illius in-
teritus, qui cum multis de causis fuerit acerbus, eo-
tamen nomine acerbior fuit, quod improuisus accide-
rit. mors quidem impendit omnibus, & se quisque ad
eam parare debet; sed non parum refert a natura ne,
an a casu proficiscatur. ille enim, si naturali morte in-
terisset, minus certe dolendum esset: sed hanc ob caus-
sam maxime dolemus, quod tam inopinato casu ere-
ptus repente nobis sit; quodq; cum omnia solatia defe-
cerint, quibus discessus a vita leuior est. miseram re-
rum humanarum condicionem, a quibus tunc maxi-
mum periculum est, cum nihil periculi expectas, aut
suspicas. Ille tunc e uita excessit, cum optatis suis
satisfactum iri sperabat. nihil autem magis optabat,
quam ut cum suis in patria uiueret, & in studijs ac-
quiesceret. et sane æquum erat, ut, qui agendis rebus
multos annos dedisset, is suorum laborum eum caperet.
fru-

lices, qui vulgi leuitate, & inconstantiâ nixi sæpe de gradu dignitatis deturbantur, & quo magis in sublimē effruntur, eo maiori ruina præcipites ruunt. Alij ita diuitijs inbiant, vt nihil aliud cogitent, quam quomodo arcas, & saccos impleant, nulli nec diurno, nec nocturno labori parcant, in longinquas regiones commigrant, & questus causa multis se periculis offerunt, in opibus spes suas sitas habent, opibus omnia se consequi posse confidunt. qui nobis sane miserabilia spectacula præbent, dum infelicitè viuunt, & infelicius moriuntur, filijs relictis, qui, quas illi per summos labores tota fere ætate pecunias accumularunt, eas ipsi ludibundi puncto temporis vno talorum iactu sæpe amittunt. Non pauci sunt, qui rei militaris studio maxime delectantur, nil nisi arma loquuntur, tubarum sono excitantur, martium furorem oculis spirant. at hi in ipso belli tirocinio, aut pugnando sæpe mortem occumbunt, aut, si videntur, eam gloriam referunt, quæ cedit, cruore, & incendijs paria non usquequaque perfectæ videtur. Plerique autem ceterarum rerum obliui voluptatibus plurimum indulgent, & amore ita insaniunt, vt noctes insomnes ducant, & mæstis querelis omnia compleant. rei amate imaginem perpetuo in oculis, animoque habent, & illius aspectu frui, & ea potiri si liceat, ad suam felicitatem nihil adli posse affirmant. at illi egregia sane premia fe-

runt

*rent in hac Veneris militia se exercentes : nam prima
 sub ætatis flore aut misere percunt , aut valetudine in
 perpetuum amissa miserrimam vitam viuunt. Tu
 vero, Ioannes Vincenti, longe aliud viuendi institutum
 secutus es . nulla enim re magis , quam litteris dele-
 ctaris ; quantum per ætatem licet, in Rep. versaris ; do-
 ctissimorum Virorum consuetudine fruëris ; & qua
 Adolescentis Amplissima Familia nati, ingenio, opibus,
 maximisq; Affinitatibus florentis partes sunt, eas egre-
 gie sustines , atque tueris . diuitijs quidem plane regijs
 abundas , & egregijs corporis dotibus a natura orna-
 tus es ; sed ijs vteris , quatenus virtutis exercendæ in-
 strumenta sunt . præclare quidem . Ego nunquam ad-
 duci potui , vt talia bona in hominibus magis , quam
 animi virtutes amarem . hanc igitur vitam, quam in-
 stituiſti, summis laudibus efferendam, ceterisq; omni-
 bus præferendam censeo . Ex ea enim hæc tibi bona
 fluunt . humana contemnis, ad cælestia aspiras, extra
 Italiæ fines gloriam tuam dilatas , equales te imitandi
 cupiditate accendis . quibus quidem præire lumenq;
 quasi præferre , vt per hoc iter gloriæ celeri gradu cur-
 rant , mihi videris . Id verum esse , tibiq; primas in lit-
 teris iure deferri illi fatentur . itaque mirifico consensu,
 semel atque iterum delectus es, qui in Mutorum Aca-
 demia principatum teneas , vt arbitrio tuo studia di-
 rigantur , vt auspicijs tuis res denique tota geratur .*

S

2

at

at vos, eo nomine suscepto, luisse mihi videmini, ac longe alio sensu illud accipiendum esse, quam quo usitata consuetudine accipi solet. Muti scilicet, cum gravissimis de rebus inter vos quotidie disputetis? cum tu præcipue elegantissimas, doctissimasq; Orationes habeas, tanta oris, vultusq; dignitate, tantaq; dicendi copia, atque vbertate, ut audientium animos maxima lætitia afficias, eosq; in tui admirationem allicias, simulatque trahas? ac tunc melius videbimus, num hoc tibi nomen conveniat, cum ea in apertum proferes, quæ tum versu, tum soluta oratione scripsisti. Ex quibus cum sit in nostram explere cupiamus, ea a te diutius comprimi iniquo animo ferimus. Quantam lætitiā existimandum est capere Parentes tuos ex te. Filio & Virtute, & litteris maxime ornato, cum te vnice ament, & spes omnes suas in te collocaverint? quos quidem intuens, quamvis te, natura duce, ad omnem laudem accendi sentias, non dubito quin acrioribus gloriæ stimulis excitatus, in dies magis, magisque inflammaberis. Ecquem exempla non commoveat, & ad veram, solidamq; gloriam non impellat Ioannes Iacobus Pater tuus, Vir Senatoria dignitate, prudentia, & auctoritate præstantissimus? Ego quidem quoties illius magnificentiam in amplissimis ædificijs ad commune potius Urbis ornamentum, quam ad propriam utilitatem pertinentibus considero; & eum
tam

tam Patriæ amantem, tanto iuuandi mortales studio
 ardentem video, aliquem ex veteribus illis Romanis
 Videre mihi videor. quos tales fuisse, quales historia
 narrant, idcirco credo, quod his temporibus nonnulli
 reperiuntur, qui eos aut adequant, aut vincunt. nec
 minus materna Gens Spinula, quam paterna Imperi-
 alis ad verum te decus inuitat. Blanca enim ma-
 ter tua primaria, ac lectissima Femina, omnibus &
 animi, & corporis dotibus ita excellit, ut præclarum
 muliebris virtutis exemplar cetera habeant, quod imi-
 tentur. Maximo etiam tibi incitamento sunt Illu-
 strissimus, & Reuerendissimus Horatius Spinula Ar-
 chiepiscopus noster, & Illustrissimus, & Excellentiss.
 Ioannes Andreas Auria Melphie Princeps, quibus
 tu sanguine coniunctus es. quorum alter. veteres illos.
 Sanctissimos Patres nobis repræsentat, alter. vero
 prudentiæ laude, & rerum gestarum gloria maxime
 inter omnes excellit. Soles tu quidem ex multis par-
 tibus summo studio libros conquirere, & Museum
 tuum excellentium. Virorū imaginibus exornare, quæ
 mihi superioribus diebus, cum domi tuæ te conuenis-
 sem, maxime delectationi fuerunt. Sed multa ex sum-
 mis illis, grauiſſimisq; Viris Propinquis tuis nos lau-
 dabilia percipere posse, quæ nunquam ex libris perci-
 peremus; & has viuentes, ac spirantes imagines nos
 virtutis amore magis accendere, quam illas alteras
 manibus

manibus hominum pictas plane intelligis. cum ille tantum corporis effigiem, hæ vero etiam mentis imaginem nobis ostendant. Ea, quæ dixi, maximam ad animos nostros excitandos singula vim habent; cum ea vero uniuersa in te sint, cum tibi a natura Virtutis amor ingenuus sit, cum Parentes, & Affines habeas, ex quibus omnium Virtutum exempla petere possis, cur ea te præstare, quæ humana condicione maiora sunt, tantopere miremur? quin potius te nobis imitandum, celebrandumq; proponimus? quid cessant id facere illi, quos circum te habes doctissimi viri? cur non omne studium, atque ingenium ad te laudandum conferunt, ut in te laudando maximam ipsæ quoque laudem consequantur? num eos materiæ grauitas ab hac mente deterret? num tanto oneri ferendo haud pares sese esse intelligunt? Vinam ego eam dicendi facultatem qua ipsi præstant, consecutus essem; omni timore omisso, non aliud certe argumentum, quam eximias tuas Virtutes ad scribendum deligerem. Quibus quidem ego tantum excitor, quantum olim Themistoclem illum adolescentem Miltiadis trophæo haud excitatum fuisse crediderim. Sed cum hoc ego beneficium maximum ducam, quod me in amicitiam tuam amantissime receperis, cumq; ab ingrati animi vitio vehementer abhorream, hanc inibo rationem, ut illud aliquo modo compensem: ipsas Vir-
tutes

tutes tuas , semper in ore , animoq; habebo , eas omni tempore colam , & quantum tenues ingenij mei vires patientur , apud posteros testatus relinquam .
Vale. Genua.

IO. VINCENTIVS IMPERIALIS

IO. NICOLAO SAVLIO

CARREGÆ.

AMICIOR tua , quam verior Epistola . Perlibenter legi . quem mea laus deterruit , me tui stili candor illexit . Humanitati illa , hic tua doctrinæ detur . Viros doctos admirror , atque observo , non amulor . Plane me noui . Tuae in me summae beneuolentiae debeo plurimum . Offerat se occasio , tu & meæ , quæ summa itidem in te est , plurimum debebis . Vale .

PASQUALI SAVLIO F. C.

STEPHANI FILIO.

VIROS doctrina præstantes summa obseruantia colo , idq; cum mea sponte facio , tum magnopere scriptorum auctoritate commoueor multa de illis prædicantium . Itaque , quamuis erga Stephanum Saulium Patrem tuum virum doctissimum incredibili amore incensus sim ; vehementius tamen eorum scriptis inflam-

flammor, qui cum summis laudibus extulerunt. Viri ita probi, veriq; cultores, ut eos tanquam mendaces nemo refellere possit; ita in eo laudando iudicio, atque voluntate consentientes, ut una vox omnium, unus omnium sensus esse videatur. hunc vero incredibilem amorem meum cum multis iam annos celauissem, diutius demum continere non potui, quin cum tibi illius filio indicarem. quæ voluntatis significatio tibi fuit adeo grata, ut me in amicitiam tuam humanissime receperis. cum vero illius scripta legendi miro desiderio tenerer, tu eorum mihi copiam libenter fecisti. & illius imaginem egregie pictam mihi ostendisti, quæ ita me delectauit, ut nihil unquam viderim libentius. Itaque duplici voluptate vno tempore auctus a tuo congressu letissimus discessi. habui in manibus eum librum, quem de homine Christiano ipse conscripsit, de quo quid Viri senserint non minus dignitate, quam doctrina præstantes, eo facile declaratur, quod conferendum cum antiquorum scriptis iudicauerint. Quæ certa, & illustria cum sint, nullum testimonium, aut laudationem desiderant. quantum vero doctrina, & eloquentia ceteris præstiterit Pater tuus, res ipsa declarat. res quidem præstantissimas ad scribendum delegit. in sententijs gravitas, in verbis elegantia inest; ut illius ingenium, atque scientiam haud satis admirari possimus. ac mihi quidem, & Patris tui doctrinam,

nam, & elegantiam, & huius libri argumentum consideranti dignior haud ullus videtur, qui materiem tam nobilem, & præclaram tractaret; ulla nec materies dignior, quæ tam doctè, & eleganter tractaretur. nam, cum veteres illi optimum virum, ac ex omni parte beatum formauerint, nihil de vera, atque perpetua felicitate cogitantes; ipse quid Christianum deceat hominem docuit, qui non modo beate victurus sit, sed etiam æternam beatitudinem consecuturus. Itaq; , si liber ullus est, qui ad studium summi boni homines excitare possit, hic certe est, ut bonis omnibus diutius deberi non possit, qui a te summis precibus contendunt, ut eum nunc in tenebris latentem tandem in lucem prodire sinas. Patris quidem tui Manes dolere summo opere arbitror, quod hunc librum diutius comprimas, quem ille certe fuerit in publicum editurus, si vitam longius produxisset. ex eo autem quanta ipse in Deum pietate flagraret, quanto iuandi mortales studio teneretur, facile intelligimus. ut ipsius honeste acta vita norma quædam nobis esse possit, qua & mores corrigamus, & studia nostra ad honestatē dirigamus. Diues quidem erat, sed vere diues. ut, quamvis multos diuitijs vinceret, ipse nunquam a diuitijs vinceretur. ijs enim & viuens prudenter, & magnifice usus est, & moriens plura ex ijs Christianæ pietatis opera fieri iussit, ut tum humanitatis, tum liberalitatis

T

hoc tempore acquiescam. quarum alteram ut mihi
conserues, te etiam, atque etiam rogo; alteram vita
meae æqualem futuram omni asscueratione tibi affirmo.
Vale. Genua. Ex ædibus. Idibus Oct. CIO. ID. MC.

LAVRENTIO FABRO.

POMPEIUM Arnolphinum tam misere exstin-
ctum ita grauitèr dolco, ut nulla ex re quidquam so-
latij capere possim. Versatur mihi ante oculos illius in-
teritus, qui cum multis de causis fuerit acerbus, eo
tamen nomine acerbior fuit, quod improuisus accide-
rit. mors quidem impendit omnibus, & se quisque ad
eam parare debet; sed non parum refert a naturam,
an a casu proficiscatur. ille enim, si naturali morte in-
terisset, minus certe dolendum esset: sed hanc ob caus-
sam maxime dolemus, quod tam inopinato casu ere-
ptus repente nobis sit; quodq; cum omnia solatia defe-
cerint, quibus discessus a vita leuior est. miseram re-
rum humanarum condicionem, a quibus tunc maxi-
mum periculum est, cum nihil periculi expectas, aut
suspicas. Ille tunc e uita excessit, cum optatis suis
satisfactum iri sperabat. nihil autem magis optabat,
quam ut cum suis in patria uiueret, & in studijs ac-
quiesceret. et sane æquum erat, ut, qui agendis rebus
multos annos dedisset, is suorum laborum cum caperet
fru-

fructum, qui est in tractatione litterarum suauissimus. Vir doctrina, & ingenio excellens prestitisset, ut non minus otij suiratio exstaret, quam negocij ante exstiterit; & multa scripsisset, quæ & nobis utilitatis, & ipsi laudis plurimum attulissent. cuius quidem otij te certe socium habuisset. uos una eademq; patria suscepit, uirtus coniunxerat; tu eum præ ceteris obseruabas, ille te contra unice diligebat. Itaque tali amico priuatus merito te totum lacrymis tradidisti, cum tibi plures dolendi caussæ, & grauiores sint, & illius interitui maiorem, quam ceteri omnes iacturam feceris. quo interitu audito, Parentes ætate confecti animis ita defecerunt, ut nec se a dolore uindicare, nec omnino uiuere possint. sed boni omnes illius mortem deplorant, quasi ad omnes ea pertineat. Aurius ipse Princeps ea ita commotus est, ut lacrymas haud tenere potuerit: nam, cum Pompeium sibi a secretis adsciuiisset, probe scit, quanto sibi fuerit adiumento ad maximas res perficiendas illius consilium, & uigilantia. quo quidem in munere tantum ceteros Pompeius anteibat, quantum rebus gestis Princeps ipse ceteris antecellit. doctrina enim excelluit, maximaq; prudentia præditus fuit, ut eum non tam in aulis Regum assidue uersatum, quàm in Atticis Gymnasijs altum, & educatum esse dixisses. & cum omnes liberales disciplinas amplexus erat, tum poeticæ artis ardentissimo quodam amore fla-

tum excellas, præclarum illud opus de alienandis rebus
 fideicommisso subiectis maxime testatur, humaniora
 etiam studia complexus es, & in ijs maxima cum lau-
 de versaris. Ego enim nunquam obliuiscar illius tem-
 poris, cum in augustissimo Senatorum confessu de lau-
 dibus Sereñiss. Baptiste Nigroni Reip. nostræ Ducis
 Orationem habuisti. tanta omnium, qui conuenerant,
 approbatione dixisti, ut nemo prorsus inuentus sit, qui
 non perfecti Oratoris exemplum ex te sumendum esse
 affirmauerit. Domus vero tua tanquam optimarum
 artium domicilium a doctissimis viris frequentatur, nec
 ullus fere est litteris deditus, qui hac iter faciat, quin
 te videre, & alloqui velit. hos hilari vultu accipis, con-
 filio iuuas, opibus subleuas, ut litterarum, ac littera-
 torum patrociniū, quod nostra prorsus deserit Ciui-
 tas, solus propemodum suscepisse videaris. Sed nolo
 hic plura de tuis laudibus, ne te offendam, qui ad ve-
 ram gloriam benefactorum conscientiam sufficere exi-
 stimas. Deus ipse tenobis diu incolumem seruet, ut his
 temporibus in maximo omnium Stephani Saulij Pa-
 tris tui desiderio eiusdem nobis veram tum corporis,
 tum multo magis animi, atque ingenij imaginem diu-
 tius repræsentes. Vale. Genua ex ædibus XIII. Kal.
 Septembris. CIO. IO. XC VIII,

IOANNI BAPTISTÆ
PINELLO.

NVLLA res me magis delectat, quam tua consuetudo: nulla uero me magis excruciat, quam ea occupatio, quæ me impedit, quominus tua consuetudine fruar. ea enim uel unius horæ spatio multo mihi plus prodest, quam multorum dierum in libris euoluendis exercitatio. Idq; cum sæpe alias, tum maxime superioribus diebus expertus sum, cum domum tuam uenisssem, tecumq; multis de rebus collocutus essem. nam silentium nostrum iam egre ferebam; quod, qui nunquam concesserim, amantior tui ut quisquam esset, quam ego sum, amoris in te mei nullam darem significationem. Præsens libentissime te audio, absens maximatum uoluptate tua Poemata lego: saltem hoc licebit, si illud per occupationes non licet. nec ulla maior est in summa incommoditate commoditas: quodq; sapientis esse arbitror, alteram altera compensabo. De tuis uero scriptis nonnihil hoc loco dicere constitui, ne, cum ea omnes laudent, solus ex omnibus tacere rideam. Est sane illud uerum, quod dicitur, ad poeticam artem homines nasci: annos XI L nondum natus eras, cum tuis ex laboribus certissimum futura uirtutis argumentum dabas. nam, qui puer a mul-

tis

tis tunc laudabatur, cum aliquando virum factum
 omnes erāt admiraturi. non apud immemorem a Mu-
 sis tot beneficia posita sunt. quam enim a pueritia Poe-
 sim amplexus es, hanc amas, hanc amabilem præ ce-
 teris rebus existimas. Duo in poeta maxime requi-
 runtur, natura, & ars. ipse utraque ita excellis, ut
 nesciamus, utrum magis in te artem, an naturam ad-
 miremur. harum utraq; ita alterius auxilio indiget,
 ut neutra sine altera perfecta esse possit. nam, quam-
 vis poeta natura ipsa maxime valeat, arte tamen non
 parum ornatur, atque expolitur. hinc tot inuenta, quæ
 admiramur; hinc illa omnium disciplinarum cognitio,
 qua maxime præstas, quamq; ex Græcis fontibus
 haustam, ac derivatam videmus. ij sunt laudi pro-
 ximi, qui aut prosunt, aut delectant; tu, qui utrun-
 que simul efficis, omnem gloriam es affectus. hoc certe
 difficillimum est; sed quæ difficillima sunt, facilia
 reddis, eaq; præstas, quæ alij a se præstari posse de-
 sperant. Omnium mentes, & animos mirum in mo-
 dum afficis, nec magis in iocis leporem, quam in serijs
 gravitatem miror. est ita, ut ego dico. Versus in di-
 vum Martinum non sine lacrymis legi; illos alteros
 non sine risu, quos in Baghinum catellum lufisti. in
 quovis scriptorum genere pari es felicitate. quis Cla-
 rorum Virorum res gestas maiori cum dignitate scri-
 bit? illas autem perturbationes, quibus amore sa-
 cius

flagrauit. hoc indicant multa ab eo versibus conscripta, & in primis victoria illa, qua Christiani ad Echinadas potiti sunt. Egregium poema, quod tu bonarum artium studiosis debere non possis. quis in rebus agendis acrior, atque praestantior? non modo enim a litteris, sed a natura etiam ipsa illi prudentia contigit, quam postea usu, & experientia auxerat, atque expolierat. Illius enim Principis arcana tractabat, qui multis cum imperio praest, quiq; Regis omnium maximi personam gerit, atque tuetur. In laboribus vero quis patientior? saepe tu eum vidisti, cum multis epistolis respondisset, paullulum modo lectulo innixum, multa de nocte capere quietem, ut admirareris in uno homine tantam inesse laborum tolerantiam, ut, cum maximis semper occupationibus urgeretur, nunquam tamen defatigaretur. addo doctrinam vero, atque prudentiam summa accessit cum in scribendo elegantia, tum in dicendo suauitas, ut seu aliquid ab alijs nomine Principis, seu aliquid a Principe pro alijs peteret, facile, quod vellet, consequeretur. Quam paucis vero contingat, ut & in scribendo, & in loquendo excellent, nemo ignorat. ijs dotibus animi ad amplitudinem Principis, & ad utilitatem amicorum utebatur. nulla enim ei post Deum cura maior Principe suo: & maiore voluptate afficiebatur, dum bene de hominibus promerebatur, quam si fortunis suis vel plurimum

V

addi-

addidisset. Quid plura commemorem? maximam accepimus plagam, quæ quoniam insanabilis est, illud perficiamus, ut aliqua saltem ex parte leniatur. Id autem assequemur, si animum ad Deum dirigentes in illius unius voluntate conquiescemus; si Pompei Arnolphini nomen, atque virtutem, quantum ingenio possumus, celebrabimus. Ego equidem hoc onus libenter susciperem, nisi gravius esse, quam ut mea sustinere possit infirmitas, intelligerem. Hoc tu suscipias velim, mi Laurenti, qui, cum ingenio excellas, & Pompeij actionibus sæpe interfueris, illius vitam perscribere facile poteris. Hoc a te amicitia postulat; ad hoc te pietas excitat, quæ etiam mortuum Pompeium prosequeris. Opus erit non modo iucundum, sed etiam utile, tum propter rerum varietatem, quæ maxime deletamur, tum propter perfectum exemplum, quod ijs propositum iri video, qui in eodem, in quo ipse excelsit, munere se exercent. omnia enim, quæ in huiusmodi persona maxime requiruntur, ea in Pompeio summa fuisse animadvertent, & cum animadverterint, imitatione consequi studebunt. Hæc singula gravissima sunt, sed ea universa ad impetrandum, quod a te petimus, maioris ponderis futura speramus. Vale. CIO. IO. IC.

IOANNI ANTONIO

GVARNERIO.

Bergomum.

QVEREBAR *mecum de paucitate scriptorum, Verebarq; ne antiqua perfecte scribendi laus omnino amitteretur, cum historia tua de bello Cyprio, deq; memorabili illa nauali victoria in manus meas peruenit. Hanc ego historiam cum auide legissem, ita me delectauit cum sermonis elegancia, tum rerum excellentia, ut nulla iamdiu lectio mihi iucundior fuerit, ac opus suis omnibus numeris, ac partibus absolutum esse duxerim. Eos enim laudas, qui in eo bello vel gloriosam mortem oppetierint, vel strenue, fortiterq; pugnauerint; Principum animos ad concordiam magnopere hortaris: qui si hanc historiam legent, quamuis in illum tæterrimum Christiani nominis hostem inimico animo sint, omnino tamen necesse est, ut, ciuilibus controuersijs restinctis, multo grauius ira exardescant. ac ipse nihil quidquam mallet, quam ut intestinis bellis illi conflictarentur, cum eorum discordia potius, quam sua potentia tantus factus sit. Quæ cum animo agitarem, primum Deo Opt. Max. gratias egi, qui tuam hanc laudẽ esse voluisset, ut vnus in Italia Latinas lit-*

V 2

teras

icas excitares; deinde tibi absenti de ista præclara
 scribendi facultate plurimum sum gratulatus. cuius
 quidem gratulationis dum cogito per litteras aliquam
 tibi dare significationem, ac, ut id commodius facere
 possem, idoneam mihi dari occasionem expecto; illud
 optatissimum accidit, ut amicissimus meus, quicum
 sæpe de te loquor, Oeconomicum Xenophontis legendum
 mihi dederit, quem tu e Græco in Latinum elegantissi-
 me conuertisti. Velim mihi credas, non prius e mani-
 bus eum deposui, quam totum diligenter absoluerim.
 Is ita mihi placuit, ut Ciceronianum Xenophontem le-
 gisse visus sim. hac altera lectione ad te scribendum
 magnopere sum incitatus, ut me diutius opportunioris
 temporis expectatione haud sustinere potuerim. n. et tu
 materiam cepisti nobilem, in qua industriam tuam
 exerceres. Hic enim liber, qui ordo in re familiari do-
 mi præsertim teneri debeat, tradit, & præscribit. por-
 ro ex domibus Ciuitas constat: itaque, si domus labe-
 factetur, Ciuitas corruat necesse est. Equidem sic exi-
 stimo, a quo domus non bene regitur, ei non tuto com-
 mitti Ciuitatem. quod te non fugit virum sapientis-
 simum, qui, cum hunc librum iampridem latinitate
 donasset, qui priuatam cuiusq; disciplinam continet,
 historiam tuam saluberrimis præceptis postea exorna-
 sti ad eam Ciuium disciplinam pertinentibus, quæ
 Remp. spectat. ac tua omnino scripta ad virtutem, &
 iustitiam

iustitiam referuntur, exemploq̃ docent eos sibi, Reiquep.
male consulere, qui ea scribunt, quæ aut mores corrumpunt, aut legibus aduersantur. Ac utinam Pij V.
Pontificis Maximi vitam, quam scribere institueras, ad exitum perducere potuisses; profecto veteris sanctitatis exemplum habituri, & magnum hinc fructum percepturi fuimus: quod amplissimum tuorum laborum præmiumputas. Nihil aliud spectas in tuis scriptis, quam ut homines doctiores, & meliores fiant: quod pietate in Deum, & rerum cognitione assequeris, quarum altera te flagrare, altera vero excellere, ea ipsa scripta testantur. Te felicem, qui paucorum annorum labore eam tibi comparaueris gloriam, quæ in omnium seculorum posteritate admirabilis futura sit. iure fatetur Patria tua plurimum sibi ornamenti ex tuis scriptis accessisse, iure summum a te beneficium litterati homines habuisse prædicant. Ego equidem, qui, ut cum ipsis Romani sermonis cupiditate me conferre possim, ceteris tamen rebus nullo modo sum comparandus; absens tui amore incensus sum, te colo, atque obseruo, idq̃, ut re ipsa perspicias, operam dabo. hoc mirari te certe nolim, cum tua virtus vel absentes, longq̃ disunctos, nedum præsentés facile alliciat. me quidem & allexit, & tibi vehementer addixit, ut nihil magis hoc tempore spectem, quam ut amicitiam tuam consequar. qua nihil mihi carius, vel incundius esse posse, meq̃ præ
ca

158 IO. NICOLAI SAVLII CARREGÆ

*ea omnium Regum opes pro nihilo putare, Velim exi-
stimes. a te igitur peto, Ut aditum mihi ad eam ape-
rire velis, meq̃ in tuorum numerum libenter adscribe-
re. quod confido te esse facturum, cum excellentem do-
ctrinam excellens plerumq̃ humanitas comiteretur.
Vale. Genua. VIII. Kal. Iul. CIO. IO. IC.*

IOANNI NICOLAO SAVLIO
CARREGÆ.

IO. ANTONIVS GVARNERIVS S. D.

*Rvs forte concesseram, cum tuas litteras accepi,
ornatissime Io. Nicolae. ibi ad XX. dies, Ut loci amæ-
nitate, & salubritate fruerer, me continui. ea com-
moratio responsioni diuturniorem moram attulit. sed
ex litteris magnum cepi fructum & officij tui, & iu-
dicij: officij, quod eximia quædam voluntas, & amor
summus erga me tuus ex omnibus partibus se ostendit.
quid autem mihi optatius obtingere poterat, quam Ut
tuam gratiam mihi compararem, qui non solum am-
plissima familia natus esses, sed ingenio, doctrina, con-
silio, magnanimitate, virtutibus deniq̃ omnibus excel-
leres? iudicij, quod tam graue testimonium a te mea
historie impertitum viderem: hoc opus auctoritate
tue sententiæ tantopere probari, meq̃ aliquid dignum
tuis auribus deprompsisse, vehementer gaudeo: modo
id*

id non abundantia magis humanitatis, quam ullo historiæ merito feceris. etsi mihi persuadeo me, quidquid habuerim iudicij, in illum librum contulisse: me tamen melius animatum, quam paratum eam historiam conficiendam suscepisse credo. Etenim scribendæ historiæ munus haud scio an flumine orationis, & varietate rerum, debeat omnium esse maximum. In quo ordo temporum, fortune vicissitudines, rerum ratio, consilia, acta, euentus expendendi: ingenti prudentia tractanda Reipublicæ vulnera: multorum perfidia, prauitas, segnities, falsæq; virtutes grauiter accusandæ: Ducum miserandi casus, vita, mores, natura, instituta subiicienda oculis: regionum situs describendi: eorum ingenia, quos laudaueris, sepe vituperanda: occasionēs, quæ in omnibus rebus dominantur, notandæ. Studium lectoris modo exspectatione, aut euentu, nunc letitia, aut molestia, non nunquam spe, aut metu erectum retinendum: explicandis rerum nouarum causis, & remedijs incommodorum adhibendis, in admirationem rapiendi animi: vbi mendacij notam subeas, non modo si quid falsi dicas, sed etiam si quid veri prætermittas: vbi si res antiquitus gestas persequaris, ignorantie argui possis: si historiam tuæ ætatis æqualem amplectaris, suspicio amoris, aut simultatis egre vitetur: vbi vnica oratio viri fide digni tempestiue habita possit vel languentes acies incitare, vel incitatas repri-

reprimere, & ad tempus moderari. Quanta rerum
 civilium, quanta bellicarum scientia scriptori com-
 prehenda est? ego, qui nullam partem ullius publi-
 ci muneris attigissem, neque unquam hostem, aut ca-
 stra aspexissem, ad sapientissimorum, & eruditissi-
 morum virorum præcepta, & artes confugere, & in-
 de multa mutuari ausus sum. Sed in hoc quoque ve-
 rendum fuit, ne id, quod Annibal Phormioni Peripate-
 tico exprobrasset, in me apte caderet. Sexcentæ aliæ
 difficultates, quibus a scribendo deterrerer, se obtule-
 re, sed una præcipue, quam tu per inuolucra verbo-
 rum attingis, tardare debuit, quod veræ, Germanæq;
 linguæ Latine gustus amissus est. doles, & doles meri-
 tissimo, dignitate, & candore Latini sermonis extin-
 cto, barbariem quandam, & consuetudinem horride;
 & inculte scribendi irrepsisse. tanti mali culpa in no-
 stri sæculi Principes conferenda est. Virtutis uberrim-
 um alimentum est honor. quod vero illi propositis præ-
 mijs ad scribendum non eliciunt eruditissimum quemq;
 ingeniorum fructu carendum est. quid causæ fuisse ar-
 bitramur, cur Alexandri Magni temporibus tot insi-
 gnium scriptorum ingenia floruerint, nisi quia & ipse
 doctrinæ gloria præstitit, & eruditos viros maximo in
 honore habuit? Lycon Scarpensis Poeta, qui in comæ-
 dia, quam agebat, versiculum intexuerat, quo quip-
 piam petentis personam exprimebat, decem talentis
 donatus

donatus est. Ennius, & Polybius ab Africano, Archias poeta a L. Lucullo, Theophanes Miryleneus a Pompeio, alijsq; plurimi ab alijs Principibus & Ciuitate, & alijs præmijs ampliſſimis decorati ſunt. quid igitur mirum, ſi illa tempora, quibus labores honoribus, & commodis compensabantur tantam ſcriptorum vim, & copiam ediderint? ibi libentiſſimis animis labor ſuſcipitur, unde honor, & emolumentum ſperatur. quid mortales non audeant, ſi magna conantibus paria præmia proponantur? cuius enim rei præmium eſt apud Principes, ea magnis incrementis creſcat, necceſſe eſt. nunc calami fluunt de manibus, concidunt animi, ingenia hebeſcunt. cur? quod has artes profeſſi ſpem pro re ferentes a Principibus dimittuntur. quid vero non angantur, cum ſe ijs rebus excludi cernant, quæ ambitioſorum, & aſſentatorum pateant calliditati, & verſutijs; interdumq; accidat, ut, quæ debentur virtuti, ea perſoluantur vitiorum fœditati? Sed longe errant, mea quidem ſententia, Principes, qui ſcriptoribus magnos animos magnis præmijs non faciant; quorum opera nomina eorum memoria alantur, & ſcrmonibus creſcant, exempla q; plena dignitatis, plena decoris, quorum magnam copiam noſtra ætas effudit, poſteritati prodantur. at ſunt illi tam grauib; occupationibus diſtriçti, ut hæc reſpicere magnum ſit. quid? ſi quas curas in res minoris ponderis conferunt, eas ad

X

ſcr-

seruandam sui memoriam conferrent, tum etiam, cum spiritum reddiderint, virtutum laude gloriosius viverent. Ego virtutem emolumentis non metior. me item natura studiosissimum, & appetentissimum honestatis esse fateor: & si id peccare est, fateor id quoque: pingeres Belgicas, aut Pannonicas penicillo meo, & non inertis senectutis grato, & honesto fungi munere, in animum induxeram. Sed quod in ea tempora incidimus, quibus studia Principum ab hoc genere monumentorum auersa comperissem, id quod ego in rebus meis expertus sum, quodq; in remoto hoc Italiae angulo sedem, & domicilium habeo, quo raro, & sero acta certa, & vera perferuntur, multam salutem huic scribendi rationi dicendam duxeram; satiusq; existimaui me in vberiora, & sanctiora sacrarum litterarum penetralia abdere. Nunc tu graui, & polito tuo iudicio, quod de rebus meis fecisti, ad repetenda, quæ deponere statueram, inflammasti, & veterem suauitatem noua iucunditate quasi titillasti. Sed de hoc viderimus posterius. Nunc non dubito, quin huius officij Camillus Tertius, qui rerum capitalium ludex istic delectus est, auctor sit, isq; mihi tuum amorem, & gratiam conciliarit. Mihi cum eo vetus, & sanctior quidam vsus intercessit, & in omni genere controuersiarum, & negotiorum meorum, eius animus, opera, auctoritas mihi præsto fuit: sicq; de me optime me-

meritus est, ut me ei multis beneficijs cum veteribus, tum recentibus deuinctum non solum fatear, sed etiam gaudeam. non modo Iurisconsultus spectatissimus est, sed etiam vir optimus, & tua amicitia dignissimus. In summis eius laudibus vnum illud excipio, quod cum omnia mea dicta, & facta laudat, cum magis amore, & nature consuetudine, quam iudicij acumine vticens. Ut ut res est, plurimum lucri mihi videbor fecisse, si mei absentis causa illum presentem sic diligas, ut eodem amoris loco sit apud te, quo ego esse cupio. Id ut facias, a te omni contentione peto, sic ut maiore cura, maiore animi labore petere non possim. Si ad id, quod te tua sponte facere puto, meae item litterae magnum afferant cumulum, erit mihi gratum, & tibi posthac iucundum. Ego quid possim nescio, uel potius me parum posse sentio; sed tamen quantulumcunque in me est studij, operae, curae, ingenij, id tibi polliceor, ac defero. Tantumq; abest, ut ego meam obseruantiam tibi denegem, ut insuper gratiam tibi habeam maximam, quod facultatem, qua in tuorum numerum adscribi possem, obtuleris. Illud ad extremum studiosissime peto, & oro, ut, quod nostrae necessitudinis initio hoc te facturum recepisti, id ad exitum augeri, & cumulari pro tua humanitate velis. Vale. Datum Bergomi. v. Kal. Augusti. CIO. IO. IC.

IO. BAPTISTÆ CORNERIO,
NICOLAI FILIO.

Panormum.

QUANTVM mihi præsens voluptatis afferebas, tantum postea doloris hinc abiens attulisti. qui quidem dolor non modo longinquitate temporis non minuitur; sed etiam in dies magis augetur. Omnino nonis illis Martijs, quo die ex portu soluisti Siciliam petiturus, nihil molestius. nam, tamen si secundo anni tempore optimo te nauigio commiseras, tamen usque eo sollicitus fui, dum te incolumem Panormum peruenisse cognoui. quod ex tuis postea litteris cum intellexissem, quibus præterea significasti te non modo commode, sed etiam strenue nauigasse, tanto gaudio sum elatus, ut fecerim continuo omnes participes meæ voluptatis. Sed ea cura vix liberatus, nunc alia molestissima conficior. nam ita sum tui videndi desiderio incensus, ut illud ferre non possim. quippe qui tua iucundissima consuetudine delectabar, tuis me officijs adiuuari, humanitate, & lepore recreari intelligebam. quibus ita me tibi deuinxisti, ut ex æqualibus tuis neminem habeam cariorem. Itaque sine te iniucunde prorsus vivo; quia quæ in hac vita amariora sunt, tot ingenij tui suauitatibus

con-

condiebã. hoc me tamen cõsolatur, quod absentes ijdem sumus, qui semper fuimus; & quamuis alter ab altero absit, vtriusque tamen animus ab altero minime abest. Viget igitur amicitia nostra, perpetuoq; vigeat, nec ei aut locorum longinquitas nocebit, aut ipsa dies, quæ omnia conficit. quæ primum similitudine morum inter nos constituta, deinde virtute aucta, atque confirmata ad eam amicitie ideam, & speciem absolutam, quæ animo tantum cernitur, proxime videtur accedere. Illud etiam mihi solatium relinquitur, in quo & acquiesco, & dolorem sæpe depono; quod, cum te istuc negotiandi causa contuleris, spero fore, ut breuiorem augeas, ac summa cum dignitate in patria viuas. Hæc etiam te spes ad illud consilium capiendum, ut hinc discederes, alacriorem reddidit. nihil enim magis desideras, quam ut ad summam voluntatem, quam habes alios iuuandi, atque ornandi, summa quoque facultas accedat. Quod nisi tanta res ageretur, amicitia nostra alterum ab altero diuelli passa non esset: ut paucos annos obdurare nos æquum sit, qui nobis, Deo bene iuuantem, multorum annorum letitiam afferent. Interim desiderium illud; quo alter ex altero conficitur, magna ex parte litteris leniemus. quare velim, ut, quod a negotijs tibi supererit otij, in scribendo consumas. tuis enim suauissimis litteris nihil mihi potest esse incundius amorem in me tuum singularem præferen-

166 IO. NICOLAI SAVLII CARREGÆ

ferentibus. Ego equidem, quantum in me erit, & cupiditati tuæ, & officio meo in hoc genere satisfaciam, & eo libentius, quod meas tibi litteras non iniucundas esse intelligo. Quas quidem crebriores, & longiores mitterem, ni occupationibus distinerer, & parum tranquillo animo essem. Litterarum igitur bono utemur, quæ nos absentes præsentem efficiunt, donec tempus illud appropinquet, quo voti compos in patriam redeas, eaq; nobiscum, ut antea, simul fruaris. quod quidem tempus ego, & Nicolaus Pater tuus vir summa prudentia, & consilio præditus, cui in te amando, pæne dixerim, non concedo, spe, & cogitatione præcurrimus. Vale. Genua. Kal. Octob. CIO. IO. IC.

F. HILARIONI A S. IO. BAPTISTA
GENVENSI, CARMELITAE

DISCALCEATO.

Romam.

QVONIAM amicorum bonis non minus, quam proprijs letari soleo, te in istam Sodalitatem nomen dedisse tantum abest, ut doleam, ut etiam plurimum gratuler. Video enim te tanquam ex incendio humanas miseriae effugisse; solida caducis, certa incertis prætulisse. Quod sane beneficium in ceteris, quæ in
nos

nos Deus liberali dextera confert, vel præcipuum duxerim. nam, si unusquisq; nostrum tum propriæ, tum aliene salutis vult consulere; Deum Opt. Max. totis viribus, totoq; pectore amare debet. hæc omnia, in quo vitæ genere melius a nobis præstari possint, quam in eo, quod ipse instituisti, minime video. Itaque absentiam tuam æquo animo fero, quæ mihi alioqui grauis, & odiosa esset, cum me fructibus priuet iucundissimæ consuetudinis tuæ. Illud, vere dicam, molestum mihi contigit, quod, insciente me, hoc nouum consilium ceperis; cum postularet amicitia nostra, ut non modo ipsius consilij particeps, sed etiam tibi comes, ac socius essem. Cuius quidem amicitia haud rationem habuisse videris, cum secundis vsus ventis in tranquillum te portum contuleris, me vero quotidianis variarum cupiditatum fluctibus expositum reliqueris. nunc ea tibi subsidia adsunt, quibus impetus Sathanae facile superes; & quia Christo seruis, ideo iucundissima frue- ris libertate. Equidem vehementer doleo, cum eadem utrique fuerit voluntas, non eandem item esse viuendi rationem; eam enim demum esse vitam arbitrarer, quam in tui, tuiq; similitudinē virorū contubernio viucrem. Illud me tamen consolatur; quod te mei oblitum esse non suspicor; quodq; spero te haud commissurum, ut istud mihi te nouum vitæ genus immutet. hanc autem spem non sefelleris, si me tuis precibus adiueris,

(t)

& in studio summi boni languentem litteris excitaue-
 ris. Siquidem ob eam potissimum causam vos in Ec-
 clesia Dei tanquam in specula collocati estis, ut consilio,
 & vigilantia nos, qui in huius seculi errore vivimus,
 sanctos rectos ab omni periculo conseruetis. nec dubium
 est, quin ad vestrum omnium preces respiciat Deus,
 qui gratissimam habet hanc religionis professionem ab
 animo casto, puroq; profectam, & apertissimis signis
 vos sibi charissimos esse declarat. Vos Christianæ mi-
 litie nomen ex animo dedistis, sacris rebus, ac ritibus
 præstis; vos non solum de conseruanda, sed etiam de
 augenda Ecclesiæ Catholicæ dignitate assidue cogitatis.
 Hinc summa Dei cura, & providentia perspici potest,
 qui, quo plures ad euertendam Petri nauim procelle
 oriuntur, eo peritiores ad eam confirmandam guber-
 natores accersit. Itaque, quamuis industria vestra
 humano generi semper sit utilis, his tamen temporibus,
 cum mores ad deteriora quotidie magis inclinent, eam
 utilissimam esse, atque salutarem omnes fatentur.
 preces igitur tuæ ad Deum delatæ maximo mihi erunt
 emolumento: tuis uero præceptis, monitisq; ex sæuis
 tempestatibus in ipsum tandem salutis portum me
 conferam. Id enim cogito, id maxime cupio; ut eam
 demum uitam mihi uiuere liceat, quam præclara mors
 terminabit, immortalis uitæ principium datura. Vale.
 Genua. 1111. Kal. Maij. CIO. IO. C.

I A-

IACOBO TISCORNIAE,
HIERONYMI FILIO.

QVOD in describendis marmoreis inscriptionibus, quæ Genuæ leguntur, ijsq; mihi impertiendis tantam adhibeas diligentiam, permihî gratum est. Equidem huius generis monumentorum miro quodam desiderio flagro. Hoc vero desiderium in te vno maxime nititur. nec alium facile reperiam, qui ea cum emendate scribat, tum optime intelligat, quod ipse vtrunque egregie præstas. longe tu quidem, cum annos quindecim nondum habeas, in vtraque lingua processisti, ad summam eloquentiæ laudem in dies propius accessurus. Vel his superioribus mensibus, cum in confesso doctissimorum virorum Græce dixisti, bone Deus, quam perite, quam scienter eo sermone usus es? ut multos fefelleris, qui te in Græcia natum esse crediderint. Ad hanc linguarum notitiam optimarum artium cognitionem adiungis, in quibus ita versaris, ut non tibi tantum, verum & amicis, & patriæ plurimum & utilitatis, & dignitatis aliquando sis allaturus. perge in cursu laudabilis vitæ. Ego equidem, si quis ex nostris hominibus ingenio valet, cum vnice diligo, & quibus studijs, & officijs possum, libenter complector. Nam venit mihi interdum in mentem vereri, ne exteri homi-

nes,

170 IO. NICOLAI SAVLII CARREGÆ

nes, quoniam nobis mercaturæ cura semper præcipua fuit, id magis ingenij vitio fieri existiment, quam necessitate quadam, quæ nos in hanc vitæ rationem deduxerit. officias igitur velim, ut omnes intelligant, cum Genuenses homines bellica laude multos superauerint, eos non facile cuique hominum litterarum gloria cedere. a me certe omnia volo expectes, quæ ab homine tui amantissimo proficisci possint. a te vero nihil magis peto, quam ut mihi in amore respondeas, operamq; des, ut maiorem ætatis partem una iucundissime traducamus. quod commodius nunc facere poteris, cum me nuper in Violaria contulerim, quæ tibi à Gymnasijs recta domum cuncti propemodum occurrunt. hæc amænitate præcellunt, hic sub arboribus, nunc Ciceronis dulces libellos, modo Virgilij aurea carmina legemus, & sua Regibus Regna, & diuitibus diuitias non inuidebimus. Vale. Genua. ex Violarijs. XII. Kal. Iunij. CIO. IO. C.

GABRIELI CHIABRERÆ,

Sauonam.

VT video, in litteris colendis eadem vtriusque nostrum diligentia, non eadem tamen sententia, nec eadem felicitas est. Tu Etruscam linguam in delicijs habes,

habes, eamq̃, lepidissimis scriptis ita exornasti, vt si-
cuti pulcherrima virgo omnium in se oculos facile con-
uertat. Ego Latinam vchementer admiror; sed ad
eam illustrandam vt mihi voluntas non desit, facul-
tatem tamen deesse intelligo. Itaque, quod proximum
est, libenter facio; nihil prætermitto ad eos excitandos,
qui cum ingenio, & memoria præsent, eam facile, si
velint, veterem in splendorem, ac dignitatem resti-
tuant. Cum autem inscriptiones illas, quæ in locis
sacris, vel profanis leguntur, tanto artificio factas es-
se videam, vt Latine lingue elegantiam, atque pro-
prietatem maxime ostendant, ad vsum meum eas col-
ligendas suscepi, vt aliquo nouo quasi pabulo huius
lingue desiderium perpetuo alam. Cumq̃ harum in-
scriptionum magnam istic copiam esse intelligam, te ve-
ro in his rebus, quæ ad amicos pertinent, diligentissi-
mum cognouerim, in summo earum desiderio per te mi-
hi satisfactum iri confido. a te igitur peto, vt eas ex-
scribendi homini diligenti negotium dare ne graueris,
& exscriptas ad me quam primum perferendas cures.
nam, cum Ciuitas ista & Patres amplissimos, &
Pontifices sanctissimos tulerit, qui tam: tsi in tanta Im-
perij mole mentem, & oculos alio defigere cogerentur,
aliquando tamen ad suam ipsorum patriam ornan-
dam respexisse credibile est; eas ipsas inscriptiones mul-
to pulchriores ceteris existimo. Itaque, si huic mee cu-
piditati

piditati satisfeceris, multum me tibi debere fatebor; plurimum vero, si ingenij tui fructus mihi quoque degustandos impertiueris. nihil enim ijs dulcius, nihil mihi optabilius esse potest ad ea studia mitiganda, quæ sine aliquo quasi condimento nobis subaccerba viderentur. Laurentius enim noster; antequam Lucam proficisceretur, certe nobis dixerat poema a te componi de Vita, & moribus diui Ioannis Baptiste, & præclari huius operis maximam apud omnes expectationem commouit: quam quidem expectationem, quia ingenij tui nervos optime nouimus, fore confidimus, ut sustineas, ac tuearis. Vale. Genua. ex Violarijs. pridie idus Iul. CIO. IO. C.

LEANDRO INVREÆ,
SILVESTRI FILIO.

QVIA locorum intervallo alter ab altero disiungimur, has ad te litteras dare volui, ex quibus statu meo aliquid scires, tuos vicissim de valetudine, ac studijs tuis auide expectans. primis illis diebus, quibus me in Violaria contuli, ita graui capitis dolore conflictabar, totumq; corpus lassitudo quadam ita male habebat, ut nec scribere, nec legere, nec ad ullam plane cogitationem me referre possem. quæ signa cum febrem antecedere saepe solcant, ab ijs grauiora metuens magna

gna in sollicitudine, atque timore uersabar. Sed in hac sollicitudine, atque timore plane me leuauit Camilli Boerij medicinae laude praestantis humanitas, & diligentia: cui quidem uiro, quod huius lucis usura perfruor, quod intermissa studia repeto, ni secundum Deum acceptum referam, ingratus sim. Valetudine recuperata, id spectauim maxime, ut in otio potius essem, quam in negotio, & paullo solutior animo mihi uiuendum esse duxi. aedes enim, in quibus nunc habito, amoenissimo loco sitae sunt. est hic etiam hortulus, in quo me saepe recreo, atque colligo. multi praeterea colles spectantur pulcherrimis uillulis undique referti, cum aspectu iucundi, tum fecunditate insignes. Nam, de augustissimo illo in Colle Iani Templo Beatae Mariae Virgini dicato, ad caelum prope exstructo, quid dicam? illud certe quoties uideo, toties aliquode prisca Romanorum monumentis uidere mihi uideor. nunc in eo totus sum, ut ad studia rursus me referam, & quod proxime tempus amisi, pro uiribus sarciam. Sed non quae antea, nunc eadem de litteris sententia est. nam cum ijs libris multos annos dederim, qui me elegantia delectarunt, nunc certum est illos amplecti, qui mihi doctrina prodesse possint. Itaque, quod a negotijs temporis dabitur, id omne sacris in litteris conquiescam; & non mihi gloria deinceps, quam salus erit antiquior. qua quidem in re, ut multis in alijs, cum tuum sensum cum meo:

meo congruere cognouerim, ad eam perficiendam alacrior fiam. Interim dum mihi Sanctorum Patrum opuscula paro, Aristotelis de morali Philosophia libros legere aggressus sum. qua quidem lectione ad vitam sapienter instituendam haud scio, an ulla utilior esse possit. hos tu quoque libros in delicijs habes, & quemadmodum ex eorum cognitione plurimum emolumenti, ita ex ignorantia plurimum detrimenti percipi posse affirmas. ac utinam eos una euoluere, & quae in ipsis notauerimus, inter nos conferre possimus; certe ex colloctionibus nostris incredibilem non modo voluptatem, sed etiam utilitatem caperemus. Hac de statu meo quam breuissime potui: tu, si viciſſim de tuo aliquid scripseris, simulq; ingenij tui fructus ad me miseris, pergratum mihi feceris. Nam, cum Silvester Pater tuus vir sapientissimus suo te exemplo ad gloriam excitet; cum Albaria villa tibi iucundissima otia præbeat; non ita te de Musis male mereri existimo, ut tot subsidijs instructus tuas silere musas patiaris. tuis quidem suauissimis litteris, tuiq; similibus, cum dulci aspectu tuo, colloquioq; caream, nihil mihi carius esse posse, nihilq; iucundius, velim existimes. Vale.

Genua. ex Violarijs. XIII. Kal. Sept. CIO. IO. C.

PAVL-

PAVLO RHAMNVSIO,
IO. BAPTISTAE FILIO.

Venetias.

INCREDIBILIS tuorum scriptorum fitis me tenet, nec eam adhuc expleo, ac Vereri interdum cogor, ut unquam expleri possim. Sæpe enim litteris meam tibi cupiditatem patefeci; quibus cum rescriberes, tua te scripta nunquam diuulgasse, & quidquid scripseris, ut ceteris potius, quam ipse tibi satisfacere, scripsisse affirmabas. quod etiam suis mihi litteris affirmavit Hieronymus tuus. Spem mihi tamen iniiecistis fore, ut historia illa aliquando exiret, quam Patriæ tuæ decreto scripsisti adolescens, cui ea in re, quæ ad illius gloriam spectat, industriam tuam requirenti deesse notuisti. Itaque dici non potest, quanta lætitia affectus sim, quantoq; huius historiæ legendæ desiderio sim incensus. iniquo enim animo ferebam tantum Italiæ eripi ornamentum, ac tantam in litteris iacturam fieri nullo unquam tempore sarcindam. quæ quidem lenior esset, si, quemadmodum exemplo Socratis, qui nullam scripsit litteram, vos fortasse tuemini; ita multos quoque Platones haberetis, qui sermones vestros susciperent, atque immortalitati commendarent.

darent. Sed unius hominis auctoritas tibi pluris esse non debet, quam totius humani generis consensus, qui ad virtutem communicandam nos hortatur, atque excitat. quamquam nulla te res magis ad hoc hortari, atque excitare debeat, quam ipsi maiores tui, cum in Remp. vestram meritis, tum scriptis editis maxime illustres. Sed præclare nobiscum actum est, cum Patres illi sapientissimi domesticæ historiæ scribendæ munere tibi demando de suscepto consilio te deduxerint: quibus omnes, qui Latine scribendi elegantia delectantur, hanc sese historiæ acceptam referre confitebuntur. quæ cum in manus meas nondum venerit, & in summo illius desiderio vix me sustineam, facere non possum, quin iterum ad te scribam, simulq; rogem, ut si iam ea edita est, ad me quam primum perferendam cures: sin minus; quando eam editurus sis, ad me perscribere ne graueris. Nam hoc profecto tibi affirmare possum, mihi nunc nihil rerum omnium esse, ex quo pari letitia, ac ex huius historiæ expectatione afficiar. Interim hac ipsa expectatione desiderium leniam, & Rhamnusie Gentis Splendorem, qui totam Italiam licet ingenij, & eloquentiæ gloria illustrem, multo tamen illustriorem luce sua reddit, mecum ipse animo meo assidue contemplanor. Vale. Genua. ex Violarijs. Non. Oct. CIO. IO. C.

IOANNI ANDREÆ CEVÆ,

Ayelli Lacum.

NON quod amicitie nostræ oblitus sim, multis iam mensibus nullas ad te litteras dedi, sed quod verebar, ne tibi inanibus obstrepere litteris in tuenda animarum salute dies noctesq̃, elaboranti parum considerati hominis esset. Sæpe autem numero de statuerum tuarum ex patre tuo quæsiui, & ea cognoui, quæ multo iam ante euentura prædixi, quæq̃ maximis præmijs ornatum iri auguror: te scilicet omnia præstare, quæ pastoralis officij, & muneris sunt; ex industria tua homines fructus capere vberes, & præstantes; colite, atque obseruari ab omnibus, qui de Religione bene merentur. quæ cum audimus, non ijs quidem invidemus, qui ea vident, sed ea quoque nobiscum communicari certe vellemus. ac utinam ipse negotijs valere iussis ad te accurrere possem; nihil mihi quidquam esset, in quo iucundius tempus consumerem, quam in tua consuetudine, tuisq̃ doctissimis sermonibus fruerdis. quod quando hoc tempore minime licet, sperabam fore, ut tui absentis desiderium litteris lenirem, sed eam mihi spem per locorum interualla eripi video, & ereptam magnopere doleo. Itaque cum te ab Archiepiscopo

Z

piscopo

piscopo Consentino ad Summum Pontificem missum iri
 intellexissem, mirum in modum letatus sum, tum pro-
 pter tanti Viri de te iudicium, tum quod facilius Ge-
 nua Romam litteræ perferentur. quamquam huic læ-
 titiæ non nihil molestiæ aspersum est, quod Christi
 ouibus timeo, quæ tibi commissæ sunt, quibus sine te
 pastore vigilantiſſimo maxima a feris pericula im-
 pendent. Sed ijs quoque absens prospicere poteris, mo-
 do captam erga illas beneuolentiam conserues, & eam
 omnibus studijs, atque officijs auctiorem facias. quod
 a te factum iri illæ sibi persuadent, & eo magis, quo
 latior Romæ virtuti tuæ campus futurus est, in quo
 ipsa commodius excurrere, cognosciq; possit. In qua
 quidem Urbe cum sedem locare cupias, Sanctæ Se-
 uerinæ Cardinalis, ac ipse Summus Pontifex te cer-
 te otiosum iacere non patientur, cum & vitam tuam
 probauerint, & in priuatis, publicisq; negotijs virtu-
 tem cognouerint. Lator equidem, quod spero fore,
 ut dignitatem tuam multarum dignitatum accessio-
 ne cumules; sed dolere simul cogor, quod vereor, ne
 magna studiorum nostrorum iactura id facias. nam,
 cum te natura & ad scribendum, & ad agendum
 ingenio finxerit aptiſſimo; cumq; his duabus maxime
 rebus gloria tua nitatur; velim, ut aliquid litteris
 mandes, quod a posteris legatur, nomenq; tuum im-
 mortalitati commendet. Nonnulla quidem legimus,
 quæ,

quæ, quantum in scribendo excellas, indicio sunt; sed ex ingenij tui fontibus sitim nostram explere cupimus; cum ea, quæ adhuc scripsisti, riuulorum instar primoribus labijs modice dumtaxat irrigandis comparata videantur. Ex hoc meo consilio hæc bona fluent; tibi post mortem immortalem famam relinques; eorum saluti egregie consules, quos tuæ fidei Deus commisit; de Patria tua bene mereberis, quo nihil honestius, nihil præstantius. quæ quidem te ad amplioris Sacerdotij gradum extolli, & maiorem tibi vineam colendam tradi cupit; ut eam incolumem serues, & longe pulchriorem, & fecundiorem efficias. faxit, Deus, ut illa dignum tam pio desiderio sortiatur effectum. Superest, ut de statu meo aliquid scribam, de quo te vehementer laborare, cum me vnice diligas, non dubitauerim. Valetudine vtor satis commoda, quod maximum præpotenti Deo beneficium debeo. In Violarijs me contineo, quæ maxime Urbis parte delector, cum ad meridiem exposita sit, & summa cæli, soli quæ amœnitate fruatur. Hic lego, aut scribo, aut ad cogitandum prorsus me do. sæpe enim cogitatione ita pascor; ut ipsa mihi pæne cogitatio vita sit. non me ambitio exercet, non auri cupiditas, quibus quasi tempestatibus ita iactamur, ut sæpe naufragium faciamus. & cum me solitudini siue natura, siue consuetudo affuefecerit, frequentioribus locis libenter careo; meaq; in

Veteri sententia maneo, tempus illud perire, quod in litteris non consumitur. Sic igitur vino, non plane ut vellem; in reliqua enim vita vni mihi, & Deo omnino viuere meditor. tu, si vicissim de statu tuo aliquid scripseris, de quo quam sollicitus sim, ex meo in te amore conijcere potes, gratissimum mihi feceris. Vale.
Genua ex Violarijs. VI. Id. Mar. CIO. IO. CI.

IO. THOMÆ IVSTINIANO,
CAMILLI FILIO.

Ticinum.

MIROR equidem, quod meis litteris. XVI. Kal. Decemb. datis nihil responderis: nec tamen tuus in me amor in dubium venit. nam ultro ipse cum ad me scripseris, tuaq; erga me voluntatis non obscura signa dederis, nunc eam tam cito immutatam esse mihi persuaderi non potest. Itaque culpam in studia confero, quibus arcta consuetudine adstrictus ab ijs diuelli haud facile potes. hanc igitur causam, cur scribendi officium intermiseris, iustissimam esse video. tanta siquidem ex litteris percipitur uoluptas, ut aliarum omnium rerum nos capiat obliuio. quanquam si diligenter attendas, reperias profecto meum consilium non fuisse, ut in studiorum cursu consisteres, sed ut potius scribendo pro-

progredieris. quod si quis sine stylo, & exercitatione
 ad summam eloquentiæ laudem se peruenturū putat,
 nā is frustra laborem suscipere, & tota errare via mihi
 videtur. Et si non is ego sim, qui te velim totos dies
 in texendis epistolis consumere; quippe te satis mihi de-
 disse existimassem, si de statu tuo, & negotio meo pau-
 cis verbis ad me scripsisses. Idq; si non meus in te a-
 mor, at saltem tua singularis humanitas, quin a te
 facile impetratura esset, non dubitabam: &, quan-
 quam non impetrauerit, nihil tamen de amore erga te
 meo imminutum esse velim existimes. eo siquidem
 amore te prosequor, quo antea semper prosecutus sum;
 & perpetuam quandam in amicitia nostra constan-
 tiam seruo; quæ ita virtute fundata est, ut in perpe-
 tuum duratura videatur. Interim æstatem appropin-
 quare vides, qua amicos inuisas, eisq; te reddas. te
 igitur exspecto. & in reditum tuum multa reseruo,
 quæ præsens sermo suauiora efficiet. tunc vel vna
 ambulatiuncula, si quid a nobis fortasse in amicitia
 peccatum est, alter alteri culpam largietur. Balthaf-
 sar Ayrolus, quod Magni Etruriæ Ducis nomine st-
 ne auctoritate Senatus nostri milites conscripserit, exi-
 lio affectus est. nunc ipsius Ducis auspiciū secutus
 non nullis pedestribus copijs præest. Leander Inurea
 in tuenda valetudine totus est. Exercitationibus vri-
 tur, & Aristotelis de moribus, & Rep. libros assi-
 due

due tractat, ut nemo grauior, nemo ciuilior sit. Ego recte satis valeo. in Violarijs Genuæ oculis Musis tantum, & mihi uiuo, & ut omnino uiuam, operam do. Museum nostrum Illustrium virorum imaginibus exornaui, ut illud, cum redieris, multo pulchrius quam antea, sis reperturus. tu, si quid habes, quod ad hanc rem pertineat, id ut mihi impertias, rogo. Vale. Genua. Ex Violarijs. Prid. id. Apr. CIO. IO. CI.

BARTHOLOMÆO PAGIO,
HIERONYMI FILIO.

AMICITIIS instituendis maximum studium adhibeo, sed ijs præsertim, quæ mihi ad disciplinas, & animi ornamenta comparanda adiumento esse possunt; id quod mihi ex sententia mea in amicitia tua obtigisse magnopere letor. ijs enim moribus, ijsque litteris ornatus es, ut nesciam, utrum consuetudo tua iucundior, an fructuosior sit. Itaque me tecum sæpissime esse vellem, & voluntatem res ipsa consequeretur, nisi mihi negotia negotium ita facerent, ut nihil plane otij relinquunt. nam, cum in studijs humanitatis tantum profeceris, ut cogitationes tuas eleganter exprimere possis; ijs quoque quasi ornamentum picturam addidisti; & in ea iam tantum processisti, ut ab eo, quod in ipsa perfectum est, non longe abesse videaris. nimirum,

rum, cum possem in delicijs habere, eius te quoque
muta imago, & emulatrix pictura delectat; & non
minus coloribus, quam verbis naturam rerum ante
oculos ponis. hæc est illa nobilis ars, in qua Romæ anti-
quis temporibus principes viri se exercebant, quæq; a
summis Regibus ita expetebatur, ut non minus se pi-
ctores esse, quàm Reges natos gloriarentur. Ego equidem,
qui antea imagines ipsas ita intuebar, ut illæ me tan-
tummodo clarorum virorū memoria delectarent, nunc
eas ita contemplor, ut illæ me simul pictorum artifi-
cio valde retineant; & exemplo tuo, velut face subie-
cta, ad picturam perdiscendam exciter, atque in-
flammer. In litteris vero ita versaris, ut tuorum
studiorum rationem exstare velis, & quantum in te
est, domesticam tuorum consuetudinem imitari. nam,
dies fere nullus est, quin aliquid scribas, quod alijs
prosit, veramq; tibi gloriam comparet. Itaque expo-
sitionem expectamus illius Comædiæ, cui nomen Fi-
delitas est; quæ cum digna sit, quæ in manibus omnium
versetur, intra domesticos parietes asseruari haud diu-
tius debet. Præclaram tibi, mi Bartholomæe, ad cle-
ricalem vitam, quam sequi constituisti, virtutum su-
pellectilem comparaſti, quarum splendore hanc ipsam
vitam illustriorem reddes, & clarissimum animi, &
ingenij lumen ceteris huius ordinis hominibus præferes.
ac maximam tu debes præpotenti Deo gratiam, qui

te .

te ex periculosa, & lubrica voluptatis in tutam, & cautam ad immortalitatem ferentem virtutis viam induxit. quam quidem signatam, & impressam vestigijs vides Hieronymi Patris tui, & Ioannis Baptiste Patruj, quorum alter ita ingenio, & industria præstat, ut nihil tam difficile in litteris sit, quin ille inuestigauerit, atque exornauerit; alter vero cum pictura scotum dediderit, in ea ita excellit, ut neminem illi profecto anteponere, paucos vero comparare possimus. Hanc ipsam viam ingressus cursu æquales vicit omnes Alexander Frater tuus, qui medicinae artis præstantiam eximia non modo humaniorum litterarum laude, verum etiam perfecta rerum antiquarum cognitione cumulauit. ne uos maximum hoc vestrum de litteris bene merendi studium pæne cum lacte nutricis suxisse mihi videmini. adeo ut e vobis alij succedat alius, & dum alij adolescant, nascantur alij, qui hunc animum tanquam hereditarium habeant. Itaque Ciuitas nostra ex nobili Familia vestra plurimum & utilitatis, & ornamenti sibi accedere, & in ea optimarum artium in pristinam dignitatem restituendarum, spem non exiguam sibi collocandam esse fatetur. Ego equidem domum uestram eleganti suppellectile instructam, Musis, studiisq; dicatam magna cum voluptate frequento. in ea tabule pulcherrime pictæ; magna librorum copia, & antiqua signa visuntur; omnia ita
belle

belle constituta, ut uno prope in conspectu totam antiquitatem videre mihi videar. est igitur, quod iure optimo letemur, ex animoq; gaudeamus, quando quidem maiorum virtutem in multis prorsus extinctam, in vobis nunc maxime florentem videmus. quicumq; vero litteris dediti sunt, est quod maximas vobis gratias habeant, cum ipsas litteras, quæ se fidei, ac patrocinio vestro commendarunt, vos amandas, tuendasq; susceperitis. Ego certe pro mea erga litteras, & litteratos viros incredibili voluntate, vos singulari benevolentia prosequor, & operam, studiumq; meum omnibus in rebus, quæ ad virtutem vestram ornandam, ac celebrandam pertineant, vobis polliceor, atq; defero. nam initio studiorum meorum id mihi semper propositum fuit, ut, quantum in me esset, eos laudibus prosequerer, qui inter ceteros virtutis splendore refulgent. quod si vobis perinde, ut meriti estis, id nunquam præstitero, maximum ex ipsis studijs fructum me percepisse, & amicitiae satis, atque officio fecisse existimauero. Vale. Genua. ex Violarijs. Id. Maij. CIO. IO. CI.

CÆSARI MORANDO.

POEMATA tua Etrusce conscripta libenter legi, quæ cum mihi antea valde probarentur, nunc in vnum

AA veluti

veluti corpus redacta maiorem afferunt voluptatem :
 quippe qui poetarum versibus mirifice capior, & eos,
 qui poetæ nomine digni sunt, vehementer admiror, at-
 que observo. qui quidem siue alios imitentur, siue ipsi
 ex ingenio aliquid aggrediantur; ita sua scripta utili-
 tate, & delectatione temperant, ut auribus simul, &
 animo satisfaciant, & diuini nescio quid habere vi-
 deantur. Itaque cum tuos in poetica facultate pro-
 cessus didissem, te sæpe, ut scriberes hortatus sum,
 & ea, quæ iam scripsisti, ut ederes, suasi. quorum
 alterum te raro admodum facere, alterum vero nullo
 modo facturum esse mihi affirmasti, cum poeticis stu-
 dijs animi tantum caussa indulgeas, non ut ex ijs ali-
 quam laudem aucuperis. Itaque in ea sententia diu-
 tius permansisses, nisi huiusmodi se tibi obtulisset occa-
 sio, cui si defuisses; & humanitatis officium deferuisse,
 & in amicos ingratis fecisse visus esses. victus es igitur,
 ut ea, quæ tu tibi multis laboribus collegeras, cum
 alijs tandem communicaueris, & eam gloriam, quam
 angustioribus terminis concluderas, latius peruagari
 passus sis. quod quidem consilium magnopere probor;
 ex quo tibi plurimum laudis, Ciuitati vero nostræ
 splendoris non minus, & ornamenti redundare video.
 quæ, si quemadmodum præclara ingenia profert, ita ea
 summo studio, & diligentia excolerentur, non dubi-
 tare futurum, ut inter ceteras Italiae Ciuitates ipsa
 quoque

quoque sicut bellica, naualiq; virtute, ita etiam litterarum scientia, ac laude floreret. uerum uiderint ij, quorum hoc munus esse deberet. tu certe diligenti cultura effecisti, ut ea, quæ tibi innata fuerunt poeticae artis semina, ad uberrimos, letissimosq; fructus perducerentur. nam vsque a puero illius amore inflammatus fuisti, nec postea ab eo ulla te unquam res auertere potuit, ut, quem Musæ nascentem sinu exceperint, in suauissimo earum amplexu cum toto uitæ tempore acquiescere verissimum esse ostenderit. Pulchra quidem res, sed æque difficilis poësis est; ut non plures illius pulchritudine capiantur, quam difficultate deterreantur. cuius quidem ratio non eadem, ac ceterarum artium mihi uidetur; siquidem in hac una mediocritatem homines non ferunt, quam in alijs tolerabilem esse contendunt. nam poetæ nomē nemo egregie sustinebit, nisi qui omnibus rebus erit instructus. quominus mirum est perpaucos esse, qui uoti compotes facti sint, quamuis diu in hoc negotio plures desudarint. In eorum autem numero, qui poetica studia feliciter tractant, ipse merito habendus es, cum haud longo intervallo ab eo absis, quod imitaris, quodq; optimum omnes existimant. tua enim scripta cum multis luminibus ingenij referta sunt, tum in ijs ita elucet inuentio, ut ipsi poetarum Coryphæi eam suspiciant, atque admirrentur. quæ quidem res tibi haud interrompere debet

institutum ad gloriam cursum, quasi confectum iam
 iter sit, sed eo te magis currentem incitare, ut optatam
 metam aliquando contingas. Itaque tibi haud satis
 esse debet, quod in Latina lingua multum procefferis,
 sed tibi enitendum est, ut ad intimos illius recessus per-
 uenias, & occultos, reconditosq; sensus intelligas. nam
 perfecta Latina linguæ cognitio ijs admodum utilis est,
 qui pangendis uersibus Etruscis egregiam sibi gloriam
 quærent. siquidem antiqui illi Vates tot poeticis lumi-
 nibus effulgent, ut, si qui ex nostris aliquo splendore
 præditi sunt, ab eis lucem eam, quam possident, mu-
 tuati esse uideantur. Poetas uero Etruscos tibi assidue
 legendos, & penitus imitatione exprimendos esse cen-
 seo; & eos præsertim, quorum ita uiget auctoritas ob
 singularem eorum doctrinam, & eloquentiam, ut ea
 demum, quæ illi scripserint, firma, & rata ab omni-
 bus habeantur. nam, cum præclari operis fundamen-
 ta ieceris, ex quibus quod postea excitatum est, id
 eiusmodi fuit, ut multorum luminibus obstruxerit;
 nunc tibi laborandum est, ut quod in utraque lingua
 perfectum est, id assequaris, & suscepti operis sum-
 mam absoluas. Itaque quamuis magnum ingenij tui
 specimen dederis, maiora tamen adhuc superesse ue-
 lim existimes. non enim iam cum alijs, sed ipse tecum
 certes, te ipsum uincas, necesse est. difficilis quidem,
 & ardua res: sed si immortalitatem quasi uictoriæ
 præmium,

præmium, tibi propositam esse consideraueris, non dubito, quin ea tibi facillima futura sint, quæ alijs laboriosa esse solent. nam multa in te sunt, quæ si singula ceteros ornant, admirationem nobis maximam commouent: sed in ijs ingenium ita excellens, ut in quauis lingua te exerceas, ea perite, ac scienter utaris. nam & Hispanico carmine multa lufisti, & patria lingua tam festiua poemata composuisti, ut nihil lepidius, nihil uenustius esse possit. Id quod multi ex nostris pari uoluntate adducti facere conati sunt, quos tamen dispari exitu in ipso pæne conatu uires defecerunt. tibi nulla res obstitit, quominus perfeceris, quod uolueris, & quæ alijs rudis, & incompta lingua uideatur, eam æque ac alias uberem, & elegantem esse ostenderis. Vides, mi Cæsar, quot bona in te natura contulerit. ea igitur nosce, ut in dies magis tuum erga poeticen studium, & propensionem declares, quod & assidue scribendo, & tua scripta in apertum proferendo efficies. Ego equidem tuæ gloriæ magnopere faueo. itaque scriptis iam editis alia uelim addas, & maius tandè corpus efficias. hoc ipsa a te uirtus postulat, quæ, celata, ut ait ille, PAVLLVM sepulta distat inertie, et ideo longe distribui, et communicari gaudet. hoc ipsa denique Patria petit, quæ Ciuēs optime de se meritos tuis scriptis illustrari, & celebrari magnopere cupit. huius quidem uoces auersari non debes,

bes, sed eo alacrius illi obtemperare, quod præstanzium virorum famam ab iniuria mortalitatis haud vindicaueris, quin immortalem ipse quoque gloriam consequaris. Vale. Genua. ex Violarijs Kal. Sept. CID. ID. CI.

CHRISTOPHORVS VARSEVICIVS C.C.

IOANNI NICOLAO SAVLIO,

CARREGÆ. S.

QVOD me domum vocaueris tuam, humanitatis est; quod scriptis monstrandis, & ingenij præclaris monumentis, prudentiæ. Utroque nomine gratias ago, & habeo tibi singulares. Equidem virtutis, quam ætatis tue, cursum video esse celeriore. qui vix dum trigesimum egressus annum tali, tantaq; ingenij cultura præstas, ut haud dubie decori, & ornamento patriæ esse videare. Macte virtute, quod facis, in hoc laudis, & gloriæ cursu perstare ne graueret. Magna ingenij, virtutis, bonitatis, & omnium, quæ in nobilem virum cadere possunt, ornamentorum manet te commendatio. Ego, ut longissimis locorum, & temporum interuallis disjunctus abs te fuero, perpetuo in oculis te feram, virtutemq; & humanitatem tuam, quam mihi non obscure testatus es, voce, & lit-

*litteris meis ubique celebrabo. Vale. Genua. IV. Non.
Octob. CIO. IO. CI.*

CHRISTOPHORO VARSEVICIO C. C.

IOANNES NICOLAUS SAVLIUS

CARREGA. S.

LÆTISSIMVS ille mihi dies illuxit, quate de
facie noui. mei enim in te amoris, & in-vniuersum
Polonorum nomen testificandi facultas data est.
qui quidem amor a lectione tuorum scriptorum ini-
tium sumpsit, quæ ita mihi probantur, vt cum ipsa
antiquitate contendere existimem. Sed ad singula-
rem doctrinam, & eloquentiam, humanitatem quo-
que singularem adiunxisti; cum & domum meam
venire, & varios mecum sermones conferre volue-
ris, intentis oculis intuebar hominem inter suos summo
loco natum, nobilissimis legationibus honestatum, &
cunctis animi, naturæq; bonis ornatum. ac ita mihi
feriebat oculos tantus iste splendor, vt, cum ex tempo-
re elegantissimam epistolam conficeris, nix ego ad eam,
eadem hora, eodemq; stylo respondere potuerim. næ uos
ingenij, atque eloquentiæ gloria effecistis, ut Polonia
ad h. alicum splendorem proxime accedat; vt nobilif-
sima Natio vestra cum armis, & litteris floreat,
om-

192 IO. NICOLAI SAVLII CARREGÆ

omnium sibi exterarum Gentium mire deuinciat animos. Ego equidem tuarum virtutum imaginem semper in ore, animoque habebō, & ea mihi ad ipsam uirtutem capeſſendam maximo erunt incitamento. Interim, quando magni amoris indicium fuit, ut me in tuorum numerum adſcriberes, hanc mentem ut retineas, quod tuæ constantiæ erit, te etiam atque etiam rogo. me uero, & ædes meas, etſi quid poſſim, pro tuis habeas, iſſq; utaris uelim, ut, quæ maxima tibi debeo beneficia, ea aliqua ſaltem ex parte ſoluere poſſim. Vale. Genua. Ex Violarijs. 1X. Non. Octob. CIO. IO. CL

IO. IACOBO BLANCARDO,
LAURENTIO.

NÆ tu me tibi ualde deuinxisti epistola tua humaniter scripta, in qua non modo me laudas, ſed etiam ſcripta mea magnopere expetis; ut nihil potius habeam, quam ut, quibuſcunque officijs poſſim, hanc tuam erga me uoluntatem amplectar, & meam erga te beneuolentiam aliqua ſignificatione teſtatam poſteris relinquam. quamquam dubius ſum, utrum accipiam, an potius reiſciam, quas in me plena manu laudes contuliſti; quod alterum eſſet gloriam nimium querentis; alterum uero tuum iudicium improbantis. ſed certe
in ijs

in ijs laudibus cohortatio continetur, & ea iam excitator, & maiore animi alacritate in litterarum studia incumbo. quæ quidem laudes tibi merito debentur, qui maxime curas, ut ijs rebus nulli sis inferior, quarum potestas omnis in nobis sita est; cum ijs, quæ in nostra manu haud posita sunt, multis superior sis, ne plus in te natura, quam virtus ipsa contulisse videatur. nam in floridissimis philosophiæ pratis sic animum pascis, ut etiam in amœnissimos Musarum hortos te sepe recipias. Ex quo factum est, ut in ista tenera etate fructus iam afferas, cum satis esset, si flores tantummodo apparerent; ut, cum etatis maturitas aderit, quanto ipsi fructus uberiores, & præstantiores futuri sint, conijcere possimus. Nec vero ulla caussa est, quamobrem te tanta scriptorum meorum aviditas teneat, cum ex optimis scriptoribus præclarissima quæque ita hauseris, ut de tuo fonte aliorum facile ingenia irrigari possint. Ego equidem Romane eloquentiæ studio incensus sum, & alios quoque, in eorum animis quibusdam quasi igniculis excitatis, ad eandem laudem accendere conor. cuius excellentem formam, quasi quandam ideam, si quemadmodum mente, & animo comprehensam habeo, ita alijs scribendo repræsentare possem, illud profecto me consecutum esse existimarem, quod cunctis rebus humanis maxime excellit. Sed ab incæpto non desi-

BB

stam,

itam, & si minus in me res ipsa, at voluntas tamen
 certe laudabitur. quod autem ad Dominicum no-
 strum attinet, ego idem, quod tu, de scriptis illius exi-
 stimo; ea scilicet horridiora, & incomptiora esse, quam
 ut ab ijs, qui paullo elegantiorē doctrinam colunt,
 iterum legi possint. adeo ille obscuritati, asperitatiq;
 orationis studuisse videtur. itaque, ut concedatur eum
 poetica laude excellere, oratoria certe, multis inferio-
 rem esse negari non potest. Sed hoc tolerabile esset, cum
 hominum nostrorum scripta si perlustremus, ex multis
 vix unum, aut alterum reperiamus, qui utrunque
 consecutus sit, atque perfecerit. at illud non ferendum,
 quod sua ipse suspiciens aliena despicit, quod sese ex-
 tollens ceteros deprimit. sed certa iudicii ratio posteri-
 tati reservatur, quæ in rebus æstimandis non amore,
 aut odio, sed ratione ducetur; & a qua pro suis quis-
 que meritis vel laudabitur, vel reprehendetur. Itaque
 tibi vehementer gratulandum est, qui cum ceteris mi-
 nime errans recte scribendi viam ingressus es, eos du-
 ces secutus, quos omnis antiquitas admirata est, qui-
 bus nulla posteritas similes habuit, aut habitura vide-
 tur. ut in hanc spem adducar fore, si hunc tenueris
 cursum, ut per eorum uestigia ad summam eloquen-
 tia laudē peruenias, vel certe proxime accedas. Gra-
 tulator igitur mihi de amicitia nostra, cui nullum finem,
 nisi eundem, quem vitæ nostræ, futurum esse confido.

libet

*libet hoc mihi de ea augurari, cum ita virtute nitatur, ut nullis unquam temporum iniurijs, aut locorum interuallis euersum iri existimem. nam mihi quamuis absens in memoria semper hærebis, & ero tecum animo, quamuis corpore disjunctus, illud profecto effecturus, ut, quod amantiſſimis me litteris appellaue-
ris, & tam propensam in me voluntatem declaraue-
ris, nunquam te pœniteat. Vale. Genua ex Violarijs
 prid. Nonas Nou. CIO. IO. CI.*

IO. AVGVSTINO CAPONIO,
IO. DOMINICI FILIO.

*SOLVO quod debeo, & ad litteras rescribo tuas singularis erga me beneuolentiæ notis insignes: serius omnino, quam ipse volueras; sed hanc moram occupationes excusant: excusatq; etiam illud, quod ipsarum litterarum argumentum huiusmodi erat, ut rescribendi officium haud necessarium esse ducerem. quippe multas in me laudes contulisti, quarum commemoratio mihi molestior fuit, quominus eas mihi deberi intelli-
go. Itaque omnem hanc partem in tuis litteris aut prætermisſam esse velim, aut ea te tantummodo se-
legisse, quæ vera omnino esse compereris. ibi te nemo extra veritatis fines egressum dixerit, ubi me litterarum studio magis, quam diuitiarum inflammatum esse
BB 2 scripseris,*

scripseris, & in eam vitæ viam ingressum, in qua nulla vulgi uestigia cernuntur; cum cetera amore magis, quam me prosequeris, quam quod ea in me esse cognosceres, facile te quivis scripsisse existimauerit. Amor sæpe fallitur, iudicioq; ueluti tenebras offundit, quominus id, quod uerum est, perspiciamus. hunc tamen facere non possum quin exosculer, pariq; amore complectar, cum ea tibi suggererit, quæ in me tam abundanter effudisti earumq; laudum, quibus me ornaasti, principium fuerit, atque fons. neque, si uerum fateamur, parum nobis proficimus, cum eiusmodi litteras legimus, cum in ijs tanquam in speculo nosmetipsos perfecte cernamus, & quæ uere nobis tribuuntur, aut aliqua accessione cumulemus, aut ad illud exemplar, quod nobis proponitur, omnes nostras actiones effingamus. Itaque tuis excitatus litteris multo alacrius posthac litterarum studia colam, & ad illa præclara, quæ me iam consecutum esse dicis, si minus peruenero, at saltem ab eis propius, quoad eius fieri poterit, ut absim, acriore studio contendam. in tuis præterea litteris, ut recipiam te in amicitiam rogas, cum ego tuæ cupidus meam tibi ultro detulerim. non est igitur, cur illud a me precibus petas, quod in tua potestate positum sit, & arbitrato tuo uti, vel abuti etiam possis. quod autem ex consuetudine mea, quæ tua est sciendi auaritia, fore confidis, ut ad sitim tuam explendam aliquid haurias; in hoc etiam

etiam amor errare te cogit, cum ex hac mea ingenij, naturaq; sterilitate nihil boni in te ipsum refundi possit. quod tamen tua nihil interesse puto, cū ex Ioanne Dominico Patre tuo, omnibus tum oratoriae, tum poeticae facultatis copijs instructo, tanquam ex perenni fonte multo plura, multoq; vberiora petere queas. qui quidem Romanae eloquentiae studijs instaurandis, reparandisq; natus, illius dignitatem, & decus in Ciuitate nostra, aut solus, aut cum paucis, his temporibus tueatur, & sustinet. Itaque abunde quod imiteris domi est, nec aliunde melius, quam ex domestica disciplina Latine scribendi viam percipere potes. Sed calcaribus non indiges, cum vix septem, & decem natus annos eloquentiae iter ingressus sis, & quantum ingenio, atque industria perfici potest, tantum quotidie progrediaris; ut aequales omnes tuos facile anteuertas. Iam in te paternae facundiae imaginem cernimus, iam Familia Vestra, potentia, & opibus Florentiae clara, Genuae literis clarior est. quae cum laudabilia sint, tum nihil hoc laudabilius, quod ita in Deum pietate flagras, ut te sacris addicere, & illud vitae laudabile institutum omnino suscipere velis. Itaque quas alijs facile tribuis, omnes in te ipsum laudes iam conferunt, & se in amicitiam tuam cum propter humanitatem incundam, tum propter doctrinam fructuosam, libenter insinuant. quorum alterum ego tantum assequar quantum potero,

alte-

alterum vero cum affecutus sim, quantum in me erit efficiam, ut amicitia nostra ceteris hominibus notior, atque illustrior sit. Vale. Genua. Ex Violarijs. XIIII. Kal. Iuny. CIO. IO. CII.

ADMODVM REVER. PATRIBVS,
CANONICIS REGVLARIBVS,
SANCTI SALVATORIS.

QVIA negotijs ita dislineor, ut rariùs omnino, quam vellem, istuc me recipere possim, hanc ad vos epistolam scribere volui mei singularis erga vos amoris indicem, testemq^{ue} futuram. Non autem eo solum nomine vos amo, quod singulari humanitate, & doctrina præditi estis, sed multo magis, quod vos in clientelam Potentiissimæ, Sanctissimæq^{ue} Virgini Dei Matri tradidistis, illiusq^{ue} cultum cum in vobis, tum in alijs promouere conanimi. Nam quamuis omnes Religiosos viros in honore habeam, in eos tamen, qui Beata Virginis cultui se manciparunt, animo multo propensior sum. Quæ licet nobis, quocunque loco simus, præsto semper sit; in templis tamen ei in honorem Dei consecratis eam impensius imploramus, eandemq^{ue} nobis præsentiori numine adesse cognoscimus. Itaque magno in dolore versor, quod hanc negotiosam urbem relinquere, & istuc in sinum quasi quietis, atque orij sepe
con-

confugere haud possum, & vos praesens omnibus officijs prosequar, & assidue in Deipara Virginis laudes incumbam: cum ipsa me praeterea loci pulchritudo, atque amœnitas maxime capiat, qui quattuor millia passuum distat ab urbe, & in acclivi colle sese attollens propinquum mare, & duo praeclara suburbia spectat. In ipso collis vertice Templum visitur Beatæ MARIAE Virgini Coronatæ dicatum, cui vos praestis, & in quo divina officia ita pie, ac sancte celebratis, ut ij, qui interfunt, animo plane immutati, longe alij, quam acceperint, pijs officijs peractis, recedant. mihi quidem illud ingredienti quot, quantaq; occurrunt? quam multa admirabilia considerata sese offerunt? considero enim quomodo Mariam Virginem Deus ab aeterno elegerit, ut Filij sui mater esset, & quomodo omnes excellentias in eam contulerit, ut opus unum efficeret, & omnes admirarentur. Ipsam nascentē contem-
plor, cælum, terramq; letitiâ perfundentem; quæ licet a Clarissimis Regibus originem ducat, ijs tamen sanctitatis splendore magis praelucet. quam quidem sanctitatem ex Matris utero secum afferens, iam ex ore, & oculis spirat, certissima indicia præbens, ea se bona mortalibus allaturam, quæ ipso Mariæ nomine, in quo admiranda mysteria latent, abunde promittit. eam pro-
nectiore ætate video, vultu quidem omnium pulcherrimo, sed ita virginali splendore decoro, ut ex aspicien-
tium

tium animis, omnes impuritatis tenebras expellat; ita omnium virtutum comitatu instructam, & pulcherrimum, & absolutissimum exemplar ad imitandum omnibus præbeat. eam denique post tres, & sexaginta annos sanctissime peractos ad dulcissimos Filij amplexeus euolandi cupidam, corpore, & anima in cælum receptam, & supra omnes Angelorum choros in celsiori folio collocatam aspicio, ipsis Angelis Reginam, hominibus vero apud Deum aduocatam, & interpretem futuram. Hæc, & alia multa meditor, dum hoc in Templo, matutinis sacrificijs vestris spectator intersum, quæ meam in Mariam Virginem religionem, & pietatem mirum in modum augent. At quantopere nobis letandum est, cum eandem Virginem habeamus, quæ pro nobis Deum precetur, eumq; nobis conciliet, cum ad eam in omnibus periculis confugere possimus, quo nullum aduersus ea præsidium melius potest, efficaciusue comparari? quoties Deus intentum in homines iustitiæ suæ gladium, eadem scilicet Virgine deprecante, e manibus deposuit, iustamq; iram suam ab illis auertit? nostra quidem Ciuitas huic Virgini acceptum refert, quod diuersis temporibus pestilentia, & fame oppressa, diuino plane miraculo liberata sit, & ad renouandam tantorum erga se beneficiorum memoriam solennes singulis annis supplicationes celebrat. Nullus nimirum sua se spe frustratum vidit, qui huius Virginis

ginis opem, & auxilium implorauit. id verum esse, muti parietes loquuntur. tot in templo votiue tabellæ undequaque acruatim suspensæ maxime testantur. hic ex diuturna febri conualuit, ille seueri Iudicis manus euasit, alius ex tempestatibus in portum peruenit, alius alijs periculis defunctus est. Itaque ego, qui grauioribus morbis laboro, qui peccatorum vinculis tenor, & in hoc vitæ pelago misere iactor, hanc Virginem precor, ut animi vulnera sanet, ut me in libertatem restituat, ut in salutis locum reducat. Et has preces dum itero, me magnopere excitat aliorum precantium aspectus, meq; bona spe implet fore, ut ille apud hanc Virginem plurimum valeant. Nam frequentissimi ad hoc Templum mortales undique confluunt, alij voti compotes votum soluturi, alij a Sanctissima Dei Matre, quod in votis habent, petituri: quanquam Idibus Augusti, & vi. Id. Sept. in quos ipsos dies illius in cælum Assumptio, & Natiuitas incidit, maiores solito concursus fiant. Omnes nimirum ad hanc Beatissimam Virginem veluti fontem omnium bonorum leti confugiunt; nec ullus fere est, qui non aliquid in se, quod sibi vtile sit, redundare sentiat, qui non ex impuro purus, ex immundo mundus efficiatur. Homines enim, cum loci religione, tum exemplo vestro ducti, mente in melius conuersa, vitia detestantur, virtutes amplectuntur, & domum melioris

lioris. vitæ propositum referunt. hi sunt nimirum ani-
 mi fructus, quos locus iste a vobis cultus producit,
 quorum excellentia, & pulchritudine, quia diutius
 frui haud possum, vitam mihi aserbam esse duco.
 Nam, cum biduum, aut triduum præterijt, in Ciui-
 tatem trahor, in qua tanquam in malo, ac sterili cam-
 po, omnia spinis obsita video, quæ vel ipsa virtutis se-
 mina facile enecant. Itaque me sæpe ad hunc locum
 cogitatio ducit, & quantum per occupationes licet, vos
 animo contemplor a curis omnibus liberos, precationi,
 orationiq; vacantes, quibus tanquam alis sublatis, su-
 peras partes petitis, ad cælumq; euolatis; cum ipse gra-
 ui peccatorum mole oppressus adhuc humi iaceam, nec
 vos ante me longe volantes sequi possim. erit igitur ca-
 ritatis vestræ me iacentem erigere, ut terrena despi-
 ciam, amem cælestia, & æternæ felicitatis iter vobis
 commonstrantibus ingrediar. quod vos quidem facitis,
 ac deinceps facturi estis, cum vobis nihil antiquius
 sit, quam ut errantes oves ad salutaria pascua redu-
 catis, eisq; viam muniatis, ut ad illa cælestis beatitu-
 dinis pabula tuto peruenire possint. Itaque, cum vos
 munus vestrum sine ullo monitore perfecte obeatis, &
 ad virtutem, & Beatæ Mariæ Virginis cultum om-
 nes excitetis, hæc epistola, quæ vos alioquin admone-
 ret, ut eorum me quoque loco haberetis, mecumq; ali-
 quam cælestium bonorum partem communicaretis,

quando

quando id neceſſe non eſt, erit cum mei in vos amoris, ut initio dixi, tum meæ in eandem Virginem præcipuæ propenſionis, & pietatis perpetuum monumentum. Valete. Genua, ex Violarijs. xvi. Kal. Dec. cio. id. cil.

ADMODVM REVER. PATRI
APOLLONIO PAINO,
SERVITAE,

Bononiam.

EGO equidem plurimum me debere fateor admodum Reuerendo Patri Ioanni Baptiſtæ Perſighellio, cuius opera factum eſt, ut ad te, dum hic eras, ſalutatum acceſſerim, & tecum amicitiam inſtituerim. Vnam, & alteram horam dulci ſermone traduximus; nec ante a te diſceſſi, quam ſingularis tua me virtus in ardentem tui amorem rapuerit. Magna proſecto vis a natura inſita in animis noſtris abdita latet, quæ eos ad ſe mutuo amplectendum incitat, virtute præſertim, & morum ſimilitudine inter ipſos amorem conciliantibus. cum autem magno me deſiderio flagrare cum veterum, tum recentium monumentorum cognuiſſes, non modo multos tu mihi libros narraſti, quibus hoc deſiderium explerem, ſed amicis etiam tuis plurima ex marmoreis lapidibus deſcribendi negotium te

CC 2 da-

daturū pollicitus es. quod promiseras egregie prestitisti. paucos post dies ex multis Italiae partibus epistole mihi redduntur, quibus Variæ inscriptiones continebantur, quæ tam mihi caræ sunt, quam nec avaris thesauri, quam nec honores ambitiosis. qua quidem in re, Valerius Rinerius vir, elegantium doctrina, tum singulari probitate præditus, ita mihi satisfecit, ut, quam alij sitim promissis incenderant, re unus ipse sedasse videatur. cuius benevolentiam cum mihi conciliaueris, eam ut mihi tuearis, atque conserues, te etiam, atque etiam rogo. Nam ad cetera officia, quæ in me contulisti, illud etiam accessit, quod operam dedisti, ut Clarorum Virorum amicitias consequerer, ad quos quidem ea de me scripsisti, quæ utinā ita alicui meo merito, ut tuo in me amor, accepta referre possem. In his vero Leonardus Sanudus, summa non minus virtute, quā nobilitate vir, ita me sibi deuinxit, ut si quid habeo, si quid ipse sum, id totum, quantumcunque est, in eius potestate positum sit. Itaque cum ipse, qua pietate præditus est, omnibus, qui laude poetica florent, Iesu Christi Saluatoris nostri, vitam, & mortem epigrammatis Etruscis celebrandam proposuerit, ego illi hac in re, quantum quidem in me est, adiutor sum, magniq; beneficii loco numero, quod opera mea uti velit, quod illi gratificari possim. Sed tuus in me amor nullis terminis circumscriptus ulterius semper progreditur. nam cum Bono-

niam

niam patriam tuam Italiae lumen, Academicarum florem reuersus esses, quid non tentasti, quid non molitus es, ut quaecunque postulaueram, a te obtinerem? omitto inscriptiones, in quibus mittendis nihil de diligentia remisisti; cum tibi per litteras significassem me Clarorum Virorum imaginibus mirifice delectari, hanc tu quoque curam eas perquirendi libenter suscepisti, & Tiburtij Passeroti Pictoris eximij opera usus multas ex ijs, quas optabam, quasq; in Bononiensibus Museis reperire potuisti, ad me quam primum perferendas curasti. quas quidem quotiescunque contemplor, aequae ac si in via virtutis praecuntes, meq; excitantes, quos referrunt, videam, ita quantum in me est, eorum vestigia sequi, atque eundem vitae cursum tenere conor, quo illi ad immortalitatem peruenerunt. tu vero, cum huius mihi utilitatis auctor exstiteris, in hoc etiam clarum humanitatis tuae specimen dedisti, qua Bononienses, inter omnes praestare audieram antea sepe, atq; etiam legeram, sed nunc id mihi re, ac factis ipse multo clarius testatus es. cum summa autem humanitate summam doctrinam coniunctam sic habes, ut omnes te non modo ament, sed etiam admirentur, reque ista Societate dignissimum iudicent, quae siue splendorem, siue antiquitatem spectemus, inter primas numeranda videtur. ac plane diuinitus factum esse existimo, ut in hanc ipsam Societatem nomen dederis, cum maximo illis praesidio,

*fidio, & ornamento, modo Concionatoris munere homi-
 nes ad pietatem excitando, modo Prouincialis mini-
 stri varia loca obeundo. nunquam ex animo meo di-
 scedet illius temporis memoria, quo hic te concionantem
 audiebamus. quam docte, Deus immortalis, res diui-
 nas explanabas, quanta rerum pulcherrimarum va-
 rietate nos audientes retinebas, quibus argumentis,
 qua exemplorum copia ad studium summi boni nos ex-
 citabas? suauissimis tuis concionibus nos demulceri,
 quasiq; deuinciri sentiebamus, nihilq; nobis molestius
 accidere poterat, quam quod ille vnius horæ terminus
 tibi finiendi necessitatem imponeret. præclara res, quod
 in dicendo excellas; at longe præclarior, quod omnia ad
 Deum referas, nec ex ineptis populi plausibus glorio-
 lam aucuperis; cum satis magnam te credas affecu-
 tum gloriam, si a recto virtutis tramite aberrantes in
 viam redeant, & si qui in tenebris peccatorum vitam
 degunt, ijs expulsis, cœlestem tandem lucem aspiciant.
 Dei enim gloria, & hominum utilitas omnino tibi pro-
 posita est. quibus, non modo dum viuis, uoce prodesse
 studes, sed ijs etiam post mortem scriptis profuturus es.
 hi fructus labores tuos minuunt; quos debitis olim præ-
 mijs a Deo Opt. Max. compensatum iri confido. At ne-
 scio quo pacto a commemorandis tuis in me officijs de
 tuis laudibus dicere ingressus sim, cum tu, quamuis om-
 ni laude dignissimus, tuas tamen laudes libenter non
 audias.*

audias. tua quidem officia tanti ego aestimo, ut omnem mihi spem vltius tibi gratiæ referendæ præcisam existimem. nam quantum tibi ad facultatem de me optime merendi addi video, tantum mihi de meis viribus ad meam erga te uoluntatem aliquo facto declarandam detrahi sentio. Sed hoc vno me maxime consolor, quod ita vitæ tuæ rationem a natura comparatam esse cognouerim, ut satis magnam tibi gratiam relatam arbitreris, si, quod amicorum causa feceris, id eos memoria tueri, & te ab ijs diligi uideas. quæ quidem ego cum adhuc diligentrr præstiterim, posthac etiam diligentius præstabo, ita ut tuorum in me meritum, quoad dixerō, memor futurus sim; & quanquam ceteris rebus a te superer, amore tamen, nunquam me superatum iri confidam. Vale. Genua. Ex Violarijs. VI. Id. Ian. CIO. IO. CIII.

PETRO HIERONYMO GENTILI;
RICCIO.

NON aliande certe, quam ex singulari tuo in me amore, consolatio illa profecta est, quam mihi in Mariæ matris morte attulisti. quos enim uehementer amamus, omnium malorum expertes esse cupimus; quibus illi opprimuntur, ad eos subleuandos statim accurrimus, ea ipsa mala propria existimantes. quod in hoc
meo

meo casu ipse diligenter præstitisti, cum multa ex Græcis, Latinisq; monumentis, in unum quasi locum collegeris, & ijs dolorem meum minuere conatus sis. ea veronunquam mihi ex animo excident, sed tanto firmitus hærebunt, quanto tu magis in me amando ceteros antecedis. at magnopere gaudere debes, quod ex studijs tuis uberrimos fructus percipias, cum hominibus in maximis calamitatibus opem feras, quo nihil homine dignius, nihil Deo gratius fieri potest. nam, si tempus ullum fuit, consolatione cum indigerem, nunc profecto est, cū Matre priuatus sim, & ea Matre, quam unice amabam, & a qua plus quam materne redamabar: cum ita omnibus solatijs destitutus iaceam, ut mea me uita pigeat, meq; illi, si fas sit, mortis comitem præbere cupiam. Domus quidem nostra ex eo tempore, quo Nicolaus auus & uita decessit, multas ærumnas perpessa est; sed hæc una, quam nunc maximam fero, ita me animi excruciat, ut ceterarum omnium sensum obruere uideatur. In rei cuiusque amissione maximo afficimur dolore, si eam diutius in potestate habuerimus; si aliquo excellenti bono prædita, atque amore nostro dignissima fuerit. quod in obitu Matris multo certius, quam antea experior, cum qua multos per annos suauiter uixi, quæq; animi dotibus ita erat instructa, ut ad sese amandam omnes impelleret. nam, ad eam animi propensionem femineo sexui ad diuinum cultum ingennitam

nitam tantum adiecerat ipsa, quantum pia, atque honesta educatione adiuuante, adijci potuit. Ideoq; maxima in Deum, & Beatam Virginem pietate flagrabat; deq; rebus diuinis loquebatur ipsa libenter, & loquentibus non sine lachrymis aures præbebat. Sacro Sanctæ Missæ sacrificio, sacrisq; concionibus ingenti alacritate, ac studio aderat, confessionis, communionisq; sacramenta frequenter obibat, nec ulla res illi impedimento erat, quominus hanc præclaram consuetudinem seruaret. cum autem hoc fere toto proximo triennio ita aduersa valetudine laborauerit, ut pedibus haud incedere posset, vehiculo ad templum se deferri iubebat, cum ei vires inualetudo, nō Religionis studium adimeret. ac ipsa quidem Religione omnes reliquæ virtutes continentur. nam quæ tanto in Deum amore erat incensa, suos, & proximos non poterat non ardenti charitate complecti. quæ doloris signa non dedit in obitu Iulij Patris viri sui, & Ioannis Francisci fratris mei admodum paruuli? cum ab ipsa se vita diuelli sentiens, quod ab illis diuelleretur, nullum lachrymis finem imponeret, nec ullo modo ijs superstes esse vellet? in ijs uero excipiendis, qui aliqua calamitate premerentur, ijsq; aut consilio, aut etiam re ipsa adiuuandis, quanta illius benignitas, quanta humanitas? omnino fuit in omnes, & in liberos præcipue amore singulari, quos præsentis intueri semper voluisset agre ferens cos.

DD

vel

Vel ad breue etiam tempus a se recedere. Itaque cum Cæsar meus item frater Neapolim profectus esset, tanto illius videndi desiderio tenebatur, ut non ante destiterit, quam perfecerit, ut ille in patriam sese reciperet. qui cum expectatus, desideratusq; venisset, dici non potest, quantâ ei voluptatem aduentu suo, præsentiaq; attulerit. nec mirum. si quidem ea, quæ nobis carissima sunt, non procul ab oculis nostris abesse, eaq; maxime cura esse cupimus. ea igitur de salute nostra vehementer laborabat. animi salutem, non corporis tantum intelligo. eratq; de illa tanto magis sollicita, quanto magis solida caducis, æterna temporarijs antepõda sunt. Itaque in primis operam dabat, ut in officio nos contineret, & non tam verbis, quam factis ad pietatem nos excitaret; nullum bonæ, prudentisq; matris familias officium prætermittens, quod ad rem familiarem tuendam, domumq; recte gubernandam pertineret. factum est igitur, cum illius animus æque curis, ut labore corpus exerceretur; cum toto fere vitæ tempore non admodum firma valetudine, his vero tribus proximis annis multo infirmiori uteretur, ut XIII. Kal. Dec. decimo autem tertio, post quam decubuerat, die, quatuor, & quinquaginta ferme annos nata, sacris armis munita, pie tranquilleq; decesserit. Dies infestus, atque infelix, dies, qui omnem mihi voluptatem exstinxit. Sol mihi ab oculis auferri visus est, densis omnia tenebris

tenebris, omnia molestijs circūnuolui. quod mihi deinceps gaudium erit tali Matre orbato? quid ego amplius in vita maneo? cuius caussa labores nunc perfero? me mirifice recreabat illius suauissimus, iucundissimūq; aspectus. erat illud mihi maxima laborum alienatio, quod ex ijs, quantum poteram, aliquam ei quietem comparare studebam. ac equidem fore sperabam, ut pro tantis in me collatis beneficijs aliquam ei referendi gratiam facultas mihi daretur, cum ea, quæ adhuc feceram, ita leuia fuerint, ut ne nominanda quidem existimauerim. Sed spes meas inanes fuisse, & omnia contra, ac putabam, cecidisse video. Laudabilis vita laudabili exitu claudi, ac terminari solet. Illam sese quieti tradidisse existimasses. non illi mors, sed dulcis somnus oculos clausisse, sensusq; omnes abstulisse videbatur. contemplantur os illud, atque vultum, vel mortuum quamdam humanitatem, comitatemq; spirantem, eoq; ardentius, quo magis eo me breui cariturum videbam. cuius quidem species adhuc animo hæret, hærebitq; tandiu, quoad in vita permanebo. nunc pietatem illius imaginem aspicio lubens, hanc sæpe alloquor, & loquentem audire mihi videor. Nocte, quæ illius obitum insecuta est, in somnis eam vidi, candida veste indutam, hilari, maternoq; vultu hæc mihi dicentem: desine flere fili, & bono animo esto: in perfectam illam felicitatem, & bonis omnibus cumulatam breui recipiar.

recipiar. hæc locuta, meq̃, amplexa incredibili celeritate ex oculis abiit. Id iam euenisse, aut breui euenturum esse confido, cum ea mecum reputo, quæ Mater mea in hac vita perpeſſa eſt. Deus enim ijs, quos diligit, alterius vitæ pœnas ad tempus duraturas cum huius vitæ calamitatibus ſæpe commutat; ut hi, cum e vita migrauerint, omni labe purgati, in cælum ſoluti, ac liberi euolare poſſint. quod fuſius explicatum eſt in eo libro, in quo Ioannes Andreas Rouetus noſter, adoleſcens tum oratoria, tum poetica facultate inſtructus, multa de Beatorum ſede, deq̃, ſempiternis illis præmijs diligenter exponit. quæ res mihi conſolationis loco eſſe, ac tanto vulnere mederi debet; ſed a dolore conſolatio vincitur, & a malo medicina ſuperatur. qui quidem dolor ab ipſo tempore vires ducit, & veluti ſumpto ſpatio me grauiori impetu ferit. multa mihi ſuccurrunt, quæ docti viri in huiusmodi caſibus nos conſolandi gratia litteris mandarunt, & præceperunt; omnibus ſcilicet moriendi neceſſitatem impendere; illud æquo animo ferendum eſſe, quod immutabili lege ſancitum eſt; eos ſatis diu vixiſſe, qui pie, ſancteq̃, vixerunt; nec eos mortuos eſſe, cum ad immortalitatem demigrauerint, & in hominũ memoria victuri perpetuo ſint; ipſos in tuto iam eſſe, nec mali quidquam amplius pati; ex hoc exilio, ex hiſtenebris eduçtos, in cæleſti patria, in illa æterna luce collocatos; ibi digna laboribus ſuis
præmia

præmia ferre; ibi Deum præsentem intueri, & perfecta felicitate frui; itaque eorum mortem laudibus, non lachrymis prosequendam esse; eorum vitam imitandam, memoriamq; colendam. Sed hæc omnia, quæ tu etiam, maiore tamen orationis vbertate, commemorasti, cum antea maximam mihi vim habere viderentur, ad minuendum recentem dolorem meum nunc parum proficiunt. Itaque Deum oro, atque obsecro, ut parces mihi vires præbeat, quibus tanto dolori resistam, & omnium meorum delictorum oblitus mihi concedat, ut post obitum Matrem meam videre, & cum ea, sempiterna, ac beata vita perfrui possim. tibi vero, qui me non secus amare videris, quam temetipsum, qui meis incommodis, perinde ac tuis proprijs commoueris; quando ego pro tam propensa in me voluntate, dignas nec habere, nec referre gratias possum, eundem Deum precor, ut in hac vita omnia leta, & secunda largiatur, in altera uero cælestibus te præmijs remuneretur.

Vale.

Genua, ex Violarijs. Kal. Aprilis.

CIO. IO. CIII.

I N D E X.

ALDO <i>Manutio.</i>	<u>70</u>
<i>Alexandro Pagio.</i>	<u>32</u>
<i>Alexandro Sertinio.</i>	<u>24</u>
<i>Alexander Sertinius</i> Io. Nicolao Saulio Carrega.	<u>27</u>
<i>Antonio Maria Speltæ.</i>	<u>42</u>
<i>Apollonio Paino.</i>	<u>203</u>
<i>Augustino Mainerio.</i>	<u>35</u>
BALTHASSARI <i>Ayrolo.</i>	<u>8. 113</u>
<i>Bartholomæo Pagio.</i>	<u>182</u>
CAESARI <i>Morando.</i>	<u>185</u>
<i>Canonicis Regularibus Sancti Saluatoris.</i>	<u>198</u>
<i>Christoph. Varsenicus</i> Io. Nicolao Saulio Carrega.	<u>190</u>
<i>Christophoro Varsenicio.</i>	<u>191</u>
<i>Constantino Montobio.</i>	<u>86</u>
<i>Cornelio, & Aug. Spinulis, ac</i> Io. Baptista <i>Marino.</i>	<u>109</u>
FABIO <i>Bellonio.</i>	<u>88</u>
<i>Fabius Bellonius</i> Io. Nicolao Saulio Carrega.	<u>21. 22. 23</u>
<i>Fabio Paulino.</i>	<u>41</u>
<i>Francisco Bononietto.</i>	<u>118</u>
GABRIELI <i>Cesarino.</i>	<u>19</u>
<i>Gabriel Cesarinus</i> Io. Nicolao Saulio Carrega.	<u>22</u>
<i>Gabrieli Chiabrera.</i>	<u>15. 170</u>
HIERONYMO <i>Frugonio.</i>	<u>123</u>
<i>Hilarioni & Sancto Ioanne Baptista.</i>	<u>166</u>
<i>Horatio Lombardellio.</i>	<u>65</u>
IACOBO <i>Tiscornia.</i>	<u>169</u>
<i>Ioanni</i>	

INDEX.

<i>Ioanni Andrea Ceua.</i>	<u>2.43.177</u>
<i>Ioanni Antonio Guarnerio.</i>	<u>155</u>
<i>Io. Ant. Guarnerius Io. Nicolao Saulio Carrega.</i>	<u>158</u>
<i>Ioanni Augustino Caponio.</i>	<u>195</u>
<i>Ioanni Baptista Cornerio.</i>	<u>164</u>
<i>Ioanni Baptista Pinello.</i>	<u>148</u>
<i>Ioanni Francisco Gropallo.</i>	<u>122</u>
<i>Ioanni Iacobo Blancardo Laurentio.</i>	<u>192</u>
<i>Ioanni Paulo Iolito Ferrario.</i>	<u>99</u>
<i>Ioanni Petro Maffeo.</i>	<u>46</u>
<i>Ioanni Petro Mediolanensi.</i>	<u>52</u>
<i>Ioanni Thomæ Iustiniano.</i>	<u>L. 180</u>
<i>Ioanni Vincentio Imperiali.</i>	<u>137</u>
<i>Io. Vincentius Imperialis Io. Nic. Saulio Carrega.</i>	<u>143</u>
<i>Ioanni Vincentio Pinello.</i>	<u>77</u>
LAVRENTIO Fabro.	<u>103.151</u>
<i>Leandro Inurea.</i>	<u>3 L. 26.172</u>
CCTAVIO Amaltheo.	<u>68</u>
PASQUALI Saulio.	<u>143</u>
<i>Paullo Khamnufio.</i>	<u>175</u>
<i>Petro Hieronymo Gentili Riccio.</i>	<u>207</u>
ROBERTO Titio.	<u>81</u>
<i>Robertus Titius Io. Nicolao Saulio Carrega.</i>	<u>83</u>
SINIBALDO Ferrario.	<u>62</u>
VINCENTIO Alzario.	<u>126</u>
*	<u>58.73.107</u>

DIE XX. MAII. MDCIII.

F. Baptista de Finario Inquisitor Genuæ vidit
hos tres Libros Epistolarum D. Io. Nicolai
Saulij Carregæ. fol. 216. & nil inuenit quod sit
Catholicę Fidei, & Bonis moribus contrarium,
& in fidem manum propriam apposuit.

F. Baptista Inquisitor qui supra manu propria.

Camillus Hectorius Vicarius Archiepiscopalis.



G E N V A E,
EX TYPOGRAPHIA PAVONIS.

M D C I I I.

DIE XX. MAII. MDCIII.

F. Baptista de Finario Inquisitor Genuæ vidit
hostres Libros Epistolarum D. Io. Nicolai
Saulij Carregæ. fol. 216. & nil inuenit quod sit
Catholicę Fidei, & Bonis moribus contrarium,
& in fidem manum propriam apposuit.

F. Baptista Inquisitor qui supra manu propria.

Camillus Hectorius Vicarius Archiepiscopalis.



G E N V A E,
EX TYPOGRAPHIA PAVONIS.

M D C I I I.